

# Luk

## *Od Uyu Irouya*

<sup>1</sup> Musei idi, amã atun ereb ereb wowã yen anĩ, ditotauf nigin age difen, <sup>2</sup> are biya od nẽ kabĩ tamo uyulil dibod ken, meledim dilen anidi bun tamal, anĩ wogõ difaman. <sup>3</sup> Age fiya nigin, aya yug bagai, gariya bunem ereb wowã yen anĩ ganan amir ailen, are aya kisi afen, tamo odug Teofilus õ bun el fe, itotoya nigin biya bagai aun, <sup>4</sup> anĩ bunem, õ ereb ereb difelnon are momoi yeya anĩ keleĩ youf.

## *Jon Naan Igunẽdiya Tamo Gõ Fiya Sã Mog, Anĩ Ket Wogõ Yen*

<sup>5</sup> Herod Judia nẽ king ibodon sain bun, pris taka ibodon, in yana Sekaraia, ã Abiya nẽ pris bun tamal taka, in aiwa Elisabet ãg Aron nẽ ibor bun tamal. <sup>6</sup> Idi urom Negur mala bun madur dibodon, idi Odug nẽ ãtãfiya ganan ado nun el de, tutuk dõ difedig. <sup>7</sup> Anĩ ere, idi urom kesu sã, ere nigin, Elisabet ã dali, kesu gõ fiya kisi feleya sã, agef fen, idi urom tubau bagai.

<sup>8</sup> Sain taka bun, Sekaraia, ne kabĩ tura tar geid kabĩ dale mog, ã Negur nẽ pris kabĩ yale fen, <sup>9</sup> pris idi neid tobonunã bunem, Odug nẽ tempel namen ile fen, aa gaula sumeĩ biya tõ fiya nigin aisaĩ kodẽ bunem ã digirnen. <sup>10</sup> Aa gaula sumeĩ biya tõ fiya saine di, idi Odug yana dalesedig ganan mayarẽ kosẽ den.

<sup>11</sup> Agef mog, Odug nẽ engel, ã bun wõ ye, alta aa gaula sumeĩ biya tõ fiyadig anĩ ima biyalẽ ifaren. <sup>12</sup> Age fe di, Sekaraia ã ile fen, ã terẽ ye mã, kumĩ ye fen, dẽ yelen. <sup>13</sup> Anĩ ere, engel ã irokenen, “Õ to kumĩ wo, Sekaraia, ogon kosẽya are Negur ã karĩ yen. Ogon aiwã Elisabet ã, ogon kesu monog gõ fouf, age fe di, in yana ã, Jon wouf. <sup>14</sup> ã bunem waũ kulĩya ado waũ al fiya õ bun ibodõf, age fe di, musei ã gõ fouf bun waud al fouf, <sup>15</sup> ere nigin, Odug mala bun ã yana odug adouf, ã wain be, aai naan total falei difef anĩg to yãf, agef fen, ã sina namenem Awa Uur Fateulem aura fiyẽf. <sup>16</sup> Israel tamo kayau musei fau inim, Odug, nedi Negur wagen kel gurif irou ilauf. <sup>17</sup> Agef fen, ã Eliya nẽ uur ado megeir bunem, Odug fau ileya sã mog, ã ket uyu irou ile fen, temeid tar, naaluid tar nigin waud yenẽf nigin ado, fe temeleid idi madur ibodõya nẽ kisi biya bun ileya nigin falei fe fen, tamo kayau Odug nẽ anidi saika fediyouf.”

<sup>18</sup> Sekaraia engel to fiyen, “Naig afe fen, aya enei keleĩ youf? Aya neu kayau ado urom ma-bodok masi, tubau bagaif.”

<sup>19</sup> Engel aiten yale iron, “Aya Gabriel. Aya Negur mala bun afaredig, anĩ nigin, aya õ wogõ yõya nigin ado, biya od enei irokonõya nigin sur fiyal. <sup>20</sup> Anĩ gama õ ait ufokol fen, od to wogõ wof ule, anĩ wõ youf naa bun, ere nigin, õ neu od to momoi wol, od enei are fau yogon sain bun bagai, kaũ wõ youf.”

<sup>21</sup> Age fe di, tamo kayau Sekaraia tari de fen, idi ã sain meluk tempel namen ibodon nigin kisi musei dalen. <sup>22</sup> ã ulõ yesin sain bun, ã wogõ

fiyēdiya kisi feleya san. Age fe di, idi kelein, ī tempel namen mala seleulā kurāf fen, ereb taka ilel, ere nigin, ī imam dogol ifelneīd fen, ī wogōya sã ibodok ilen.

<sup>23</sup> In kabī nē sain bure fele di, ī fō bun kel ilen.

<sup>24</sup> Anī bure fele di, in aiwa Elisabet bou adon, agef fen, ogō faif ī iminkel ibodon. <sup>25</sup> Ī iron, “Odugem enei age fanan. Naa eneidi bun, ī yogon oroya ado wau ifenēya ifelnan, agef fen, neu mama tamo kayau atun yalelkanan.”

### *Jesus Gō Fiya Sã Mog, Anī Ket Wogō Yen*

<sup>26</sup> Ogō sigis bun, Negur, engel Gabriel Nasaret taun, oun Galili teneub, sur fiyē di, ile, <sup>27</sup> kayau taulei, tamo yana Josef, Dawid nē ibor bun tamalem yalouf nigin digirin gein ilen. Kayau taulei yana Maria. <sup>28</sup> Engel ī gein ile fen, iron, “Fel, ō nigin Negur fatuk el yok. Odug ō ado ibodok.”

<sup>29</sup> Maria in od nigin wau fatuk togu fen, aanya enei naig fiya nigin ye fen, kisi musei yalen. <sup>30</sup> Anī ere, engel ī irokenen, “Maria, ō to kumī wo, ō Negur nē wau el fiya gurug wol. <sup>31</sup> Ō fau kesu ado fen, kesu monog gō wouf, ago fen, yana ũ, Jesus wouf. <sup>32</sup> Ī fau odug wō ye di, Negur Ilun Bagai Naal douf. Negur Odug yogo, king nē modoū tama Dawid nē anī, ī ifenēf. <sup>33</sup> Age fe di, ī Jakop nē ibor bun king gai ibodkalauf, in tano to sa kalauf.”

<sup>34</sup> Maria engel to fiyen, “Aya fau mois, eī naig fe wō youf?”

<sup>35</sup> Engel ī aiten yale iron, “Awa Uur Fateul ō bun isiyouf, age fe di, Negur Ilun Bagai nē megeir kerub yōf. Anī bunem fateul bagai gō wouf are,

yana Negur Naal douf. <sup>36</sup> Ogon sirag Elisabeteg tubau mog, kesu yalouf, ã dali den, anĩ mogo ogõ sigis ã bou ado ibodok. <sup>37</sup> Ere nigin, ereb taka anĩ Negur bun malai sã.”

<sup>38</sup> Maria ã aiten yale iron, “Aya Odug nẽ kabĩ kayau, aya bun od sã, õ urok kilei od sã agef wõ youf.” Age ye di, engel ã itornẽ ilen.

### *Maria Elisabet Ki Fiyen*

<sup>39</sup> Sain anĩ bun, Maria dodok fel, kaisã bagai taun taka arei bun, Judia distrik nediwon ilen. <sup>40</sup> An ã Sekaraia nẽ fõ bun wõ ye fen, Elisabet fel fiyen. <sup>41</sup> Sain Elisabet Maria nẽ fel ya anĩ karĩ ye fen, kesu sina namen ibodon anĩ okĩ yen, age fe di, Elisabet Awa Uur Fateulem aura fiyen. <sup>42</sup> ã ait odugem iweig iron, “Kayau ganan atun, Negur õ el yok. Agef fen, kesu gõ wouf anĩg, Negur ã el fiyek! <sup>43</sup> Anĩ ere, aya naig fiya bagai nigin, neu Odug nẽ sina anĩ aya bun isif? <sup>44</sup> Ogon fel ya nẽ ait wederoun ile mog bagai, momou nameun al fe fen, okĩ yel. <sup>45</sup> Kayau taka, ã ereb Odug ã irokenek are agef kisi fel wõ youf, ye fen, momoi yef, are Negur ã el fiyek!”

### *Maria Nẽ Seg*

<sup>46</sup> Age fe di, Maria iron:  
 “Neu malaukanon Odug yana yalesef,  
<sup>47</sup> agef fen, neu uur Negur Isennaya nigin kulĩ yef,  
<sup>48</sup> ere nigin, ã, aya yogon kabĩ kayau maleg nigin kisi fatuk yalen.  
 Sain enei bunem ilauf ganan, ibor ganan Negur ã el fiyen douf,

- 49 ere nigin, Negur Megeir Barikã ã aya bun ereb odug age fel, ã yana fateul ibodok.
- 50 In wau yũya, ã nigin anini def bun tobol foug, ibor gama ibodok enei ado, dumen isiyouf idi buneg gai gai ibodkalauf.
- 51 ã yogo imam kabã total odug biya age fedin, ã idi neid kisi bun yeneid dalesef anã irudi di, fragagaũ difen.
- 52 ã yeneid adodo, nedi modoũ bun yalelneĩd fen, maleg anã yalesnẽdin.
- 53 ã idi naũ fedif anã, ereb ereb biya ifeneĩd fen, idi safineid adodo daku irudin.
- 54 ã amã tubumã tar irokenẽdin kilei, ã yogon kabã tamo Israel isennen,
- 55 agef fen, Abraham ado in ibor nẽ tubu tar bun faimud, wau yũya ifenẽdiya nigin karã yeledig.”
- 56 Maria, Elisabet ado ogõ towo age fiya dibod ken, fõ bun kel ilen.

*Jon Naan Igunẽdiya Tamo Gõ Fen*

- 57 Elisabet nẽ kesu gõ fiya sain wõ ye di, ã kesu monog gõ fen. 58 ã ne tã tar, in sirag tar geid, Negur nẽ wau yũya odug ifelnen anã karã de fen, idi weim waud al fen.
- 59 Naa eit bun, idi mulũ nigin kesu bou gudũ fiya nigin disin, age de fen, ã yana dũ, tama nẽ dait Sekaraia douf nigin age difen. 60 Anã ere, ne sina aitedin yale iron, “Age fiya sã! ã yana Jon ye yauf.”
- 61 Idi ã dirokenen, “Ogon sirag tar atun, yana age fiya taka sã.”

<sup>62</sup> Age de fen, in tama bun kesu yana aib youf anĩ karĩ douf nigin, uris difenen. <sup>63</sup> Age dife di, ĩ itotoya nē safina nigin to fiyēdin, agef fen, “Ī yana Jon,” ye itoto di, idi ganan terē den. <sup>64</sup> Sain anĩ bun bagai, ĩ awa kakã ye di, bale faraf yale ulō yalaisi di, ĩ wogō ye fen, Negur yana yalesen. <sup>65</sup> Ne tã tar terē de fen, anini den, age de fen, Judia neid arein, fonō fonō wogagã de fen, ereb wō yen anĩ ganan wogō den. <sup>66</sup> Adok anĩ karĩ de fen, kisi musei dale fen, to difen, “Kesu enei naig fiya wō youf?” Ere nigin, Odug nē ima ĩ bun ibodon.

### *Sekaraia Nē Seg*

<sup>67</sup> In tama Sekaraia Awa Uur Fateulem aura fiyē di, ĩ profet od eig ye wogō yen:

<sup>68</sup> “Odug seli tabiyouf, Israel neid Negur,  
ere nigin, ĩ isi fen, in tamo kayau kafĩ fiya bun tamal kel gei fel.

<sup>69</sup> Ī yogon kabĩ tamo Dawid nē fō bun,  
isennadaya megeir ado yalesel ifaref,

<sup>70</sup> (are ĩ yogon profet fateul kulu temeleid sigoreid bun wogō den kilei).

<sup>71</sup> Nemã kiwai tar ado,  
amã nigin to orodif anĩ imeid bun tamal, kel yalemãf.

<sup>72</sup> Nemã tamamã tar nigin wau yūya anĩ ifelneĩd fen,  
ĩ yogon bar itenēya fateul anĩ karĩ yelen.

<sup>73</sup> Ī wau kuturol fen, nemã tamamã Abraham irokenen.

<sup>74</sup> Nemã kiwai tar imeid bun tamal kel gei famãf, agef fen, amã kumĩ sã ĩ aruna yaleya kisi falauf nigin.

- 75 Amã nemã mabodok malauf bun, ï mala bun  
gai fateul bagai fen, madur bagai mabodõf  
nigin.
- 76 “Age fe di, õ neu kesu, Negur Ilun Bagai nẽ  
profet douf,  
ere nigin, õ uyu urou fen, Odug nẽ naab  
dodok wouf.
- 77 In tamo kayau neid mosor nigin wedereid tu  
kalauf bunem,  
kel yalediyouf nẽ keleï wenëdiyouf.
- 78 Are nemã Negur molol nem wau yũya bunem,  
anĩ bun gaa kurã fiya, saa ilunem amã bun  
isiyouf.
- 79 Are idi gugum bun difaref ado,  
laa nẽ buri bun difaref anidi bun, fula fouf,  
age fe di, nemã yemã delẽ anidi bun madur marã  
di, wau inosiya bun malauf.”
- 80 Age fe di, kesu biya fen, uur orib yen, ï gerere  
tuan ibodok ile, dum ï Israel tamo kayau meleid  
bun wõ yen.

## 2

### *Jesus Gõ Fen* (*Matyu 1:18-25*)

1 Sain anĩ bun, Sisa\* Ogastus, Rom teneub  
ganan bun, tamo kayau an temeleid anĩ yeneid  
yaleya nigin od inon. 2 (Eĩ urug bagai, sain  
Kwirinius ï Siria nẽ gawaman mudur ibod mog,  
tamo kayau yeneid dalen.) 3 Anĩ nigin, ganan

---

\* **2:1:** Rom neid king odug.

dogo dogo neid taun bun yeneid inoya nigin dilen.

<sup>4</sup> Anĩ nigin, Josef ãg, oun Galili teneub Nasaret taun bun tamal Judia iselen, Betlehem Dawid nẽ taun bun iselen, ere nigin, ĩ Dawid nẽ fonõ ado in ibor bun tamal. <sup>5</sup> Ĩ Maria ado yeneid dinouf nigin diselen, ĩ Maria aiwauƒ nigin digirin, anĩ ĩ bou ado. <sup>6</sup> Idi an dibod mog, kesu gõ fiya sain wõ yen. <sup>7</sup> Age fe di, kesu monog matu gõ fen. Maria ĩ gabar nem silef fen, yaro neid beĩ bun inenen, ere nigin, tamo irouya fõ bun modoũ isokosen.

### *Gaar Lo Fediya Tamo, Engel Geid*

<sup>8</sup> An gaar lo fediya tamo, melsã fonõ yerin dibod ken, bõ nedi gaar lo difedin. <sup>9</sup> Age de mog, Odug nẽ engel idi bun wõ yen, age fe di, Odug nẽ fula fiya medeĩya kerub fedi di, idi kumĩ tererẽ den. <sup>10</sup> Anĩ ere, engel idi irokenẽdin, “Ã to kumĩ wog, aya od biya, tamo kayau ganan waud al foug nigin arou asif. <sup>11</sup> Ere nigin, gama Dawid nẽ taun bun, ãgenei isenneĩya wõ yel, ĩ anĩ Kristus Odug. <sup>12</sup> Enei ã bun uris. Ã momou taka gabar nem sile de fen, yaro neid beĩ bun dinenem yenek anĩ ulougouf.”

<sup>13</sup> Kaisã bagai, engel musei saa ilun temeleid ulolõ deis, engel anĩ geid Negur yana dales diron, <sup>14</sup> “Negur ilun bagai bun fula fiya medeĩya, age fe di, tenebur ein tamo kayau ĩ el fedif bun, wau inosiya ibodõf.”

<sup>15</sup> Sain engel idi ditorneĩd, saa ilun disele di, gaar lo fiya tamo abob dirokenen, “Odug ada irokanadal anĩ nigin, ada Betlehem teleg, ereb wõ yel anĩ taileg.”



<sup>16</sup> Anĩ nigin, idi kaisã bagai dile, Maria, Josef ado diledin, momou yaro neid beĩ bun yen mog, dilen. <sup>17</sup> Idi ĩ dile fen, idi kesu anĩ nigin wogõ fiyēdin anĩ od wogõ de diyon. <sup>18</sup> Age dife di, ganan karĩ den idi, gaar lo fiya tamo wogõ difiyēdin anĩ nigin terē den. <sup>19</sup> Anĩ ere, Maria od anĩ ganan yale fen, waun ino fen, kisim dogol fen. <sup>20</sup> Gaar lo fiya tamo keku de fen, idi wogõ fiyēdin kilei, erēb idi karĩ den ado dilen anĩ ganan nigin, Negur seli dabi fen, yana dalesen.

### *Jesus Tempel Bun Dirou Dilen*

<sup>21</sup> Naa eit bun, ĩ mulũ ileyā saine di, ĩ yana dũ, Jesus den, yana are sina fau bou ado ya sã mog, engelem yun.

<sup>22</sup> Idi neid nonorou lilik fiya naa, Moses nē Lo ifaref kilei anĩ bure fele di, Josef Maria ado, Jesus Jerusalem, Odug ifenēya nigin dirou diselen, <sup>23</sup> (are Odug nē Lo itotoya bun ibodok kilei, “Kesu matu monog wõ douf ganan, Odug wenēdigouf”\*), <sup>24</sup> idi Negur sesewi fiya difenēf nigin diselen, Odug nē Lo eig ye irok kilei, “kuburir uru be, kukutir balas uru be.”\*

<sup>25</sup> Gama Jerusalem an tamo yana Simeon ibodon, ĩ madur bagai fen, Odug nigin karĩ yeledig. ĩ Israel waud inosiya dalouf anĩ tari fedig, Awa Uur Fateul ĩ bun ibodon. <sup>26</sup> Awa Uur Fateulem, ĩ fau to laaf mog, Odug nē Kristus wõ ye di, ilouf nigin irokenen. <sup>27</sup> Awa Uurem toli fiyē di, ĩ tempel nē modoũ bun ilen. Sain tama sina ado, Lo irok kilei age difouf nigin, kesu Jesus dirou dile

---

\* **2:23:** Eksodas 13:2, 12      \* **2:24:** Levitikas 12:8

di, <sup>28</sup> Simeon imam ã yales fen, Negur yana yales iron:

<sup>29</sup> “Odug, õ uron kilei, õ gama ogon ferfer wau inosiya ado sur wo di, ilauf.

<sup>30</sup> Aya malaum bagai ogon isennëya anñ ailel.

<sup>31</sup> Are ganan meleid bun saika won.

<sup>32</sup> Are haiden Israel sã anidi bun, Negur në oroya kurõ falaisiya në lalan, ago di, are ogon tamo kayau Israel bun fula fiya medeïya.”

<sup>33</sup> Kesu tama sina ado, od anñ karĩ de fen, kisi bun terefeit den. <sup>34</sup> Age dife di, Simeon el fiya ifeneïd fen, sina Maria irokenen, “Kesu enñ, Israel tamo kayau musei kuku douf, musei fafã douf nigin ado, ã daũ gen ifare di, ã dumen od sane dirõf në uris wõ youf nigin igirnen. <sup>35</sup> Anñ bunem, musei waud bun dinokok are yaorouf. Age fe di, ogon malãkanon anñg dig otem borũ fouf.”

<sup>36</sup> Profet kayau takag ibodon, Ana, Fanuel ne barai, Aser në ibor bun tamal. Ñ gai tubau bagai, ã tamo yale fen, aiwa ado yar sewen dibodon.

<sup>37</sup> Agef fen, ã waab ibodok ile, in yar eiti-fo. Ñ tempel to itoron, bõ ado gaa ado kuri ye fen, kosë ye, Negur yana yalesedig. <sup>38</sup> Sain anñ bun bagai, ã idi gein isel, Negur de fiye ken, Jerusalem tamo kayau kafĩ fiya bun tamal kel yalediyouf nigin ganan tari de difaren anidi, kesu anñ nigin wogõ fiyëdin.

<sup>39</sup> Josef, Maria ado, Odug në Lo irok anñ ganan dõ de kisi fele di, idi baban ke de, Galili teneub oun, nedi taun Nasaret dilen. <sup>40</sup> An, kesu ã biya fen, totol adon, ã kisi biya barikan, agef fen, Negur në wau ifenëya ã bun ibodon.

### *Jesus Kesun Tempel Bun Ilen*

<sup>41</sup> Yar ganan bun, in tama sina Pasa Sifa naa bun Jerusalem taun diledig. <sup>42</sup> Sain ĩ tuwelf yar mog, idi neid tobonunã dõ de fen, Sifa bun diselen. <sup>43</sup> Sifa bure fele di, in tama sina fonõ ke de dile mog, kesu Jesus ĩ fau Jerusalem ibodon, anĩ ere, idi to kelein. <sup>44</sup> Idi weim melef den, age de fen, naa tekelei diyon. Age dife fen, idi mogo nedı sirag tar bun ado, nedı tã tar atun dimirnen. <sup>45</sup> Idi ĩ to dile mã, idi ĩ dimirnẽ fenẽ nigin, Jerusalem taun baban ke de dilen. <sup>46</sup> Naa towo bure fele di, idi ĩ tempel modoũ bun ifelnẽdiya tamo atun ibod, karĩ fiyeĩd fen, to fiyeĩd mog, fotou difiyen. <sup>47</sup> Ganan ĩ karĩ difiyen are, in karĩya nigin ado aiteid solo fen anĩ nigin, terefeit den. <sup>48</sup> Tama sina ado ĩ dile fen, fatuk bagai terẽ den. Sina ĩ irokenen, “Neu kesu, ere nigin eig wamam? Aya tamã ado waumã morõ ken, mamirnom.”

<sup>49</sup> ĩ to fen, “Ere nigin ã aya umirnegel? Aya neu Dei nẽ fõ bun abodõf ya, ã keleĩ sã de?” <sup>50</sup> Anĩ ere, ĩ ereb irokenẽdin are, idi to kelein.

<sup>51</sup> Age dife di, ĩ weim Nasaret disil fen, sigoreid dõf el fen. Anĩ ere, in sina anĩ ganan yale, waun inon. <sup>52</sup> Jesus kisi biya ado bouwa orib yen, Negur ado tamo nẽ lo fiya bun biya len.

## **3**

### *Jon Naan Igunẽdiya Tamo Naab Dodok Fenen (Matyu 3:1-12; Mak 1:1-8; Jon 1:19-28)*

<sup>1</sup> Taiberius, Sisa mudur ibodon yar fiftin bun, Pontius Pailat ĩ Judia distrik nẽ gawaman mudur ibodon, Herod ĩ Galili distrik lo fen, ĩ tura Filip

Ituria distrik ado Trakonitis distrik lo fen, age fe di, Lisantias ĩ Abilene distrik lo fen. <sup>2</sup> Anas Kaiafas ado pris mudur dibodon sain bun, Negur nē od gerere tuan oun Jon, Sekaraia naal bun isin. <sup>3</sup> ĩ Jordan naan kalilī fiya ganān bun iyo ken, waud falei de fen, naan digū di, mosor yalel kenēdiyof nigin biya od wogō yen. <sup>4</sup> Are profet Asaia nē itotoya bun ibodok kilei: “Ait taka gerere tuan iweig irok, ‘Odug nē naab dodok ge fen, madur wenēg. <sup>5</sup> Uus ganān bun kurokirīya yoso foug, arei ganān mudu ganān ado gudū falaisi tenebur ouf. Naab goigul yedin, madur foug, naab koūkī yediya yoso fediyof. <sup>6</sup> Age fe di, tamo kayau ganān, Negur nē tamo kayau kel gei fiya anī dilouf.’ ”\*

<sup>7</sup> Tamo kayau Jonem naan igunēdiyof nigin guru difen anidi Jon irokenēdin, “Ā, gogour sane gere tar! Negur nē didi isiyof anī wal ge fen, uyagauf nigin, aim irokenein? <sup>8</sup> Wauī falei gef are, faat biya ū goug. Ā aug nigin to eig ge urōg, ‘Abraham nemā tamamā.’ Aya arokeneik, meein enidi Negur sā irō di, Abraham gere tar wowā douf. <sup>9</sup> Safor aayū gariyan mogo ibodok, aayū ganān faat biya to yuk, are itu ira ken, yā malan irāf.”

<sup>10</sup> Tamo kayau guru difen anidim to difen, “Age fiyauf are, amā naig mafoug?” <sup>11</sup> Jon aitedin yale iron, “Tamo ĩ gabar uru adoug are, aib ĩ sā anī taka ifenēf, takag, taka ĩ saaf adoug, areg de age foug.”

---

\* **3:6:** Asaia 40:3-5

<sup>12</sup> Takis yaleya tamog, naan igūya nigin disin, idi to difen, “Tise, amã ere naig mafouf?”

<sup>13</sup> Ì irokenēdin, “Å yaleya kilei anĩ to wal woseg waleg.” <sup>14</sup> Age fe di, kusĩ tamo tunĩ to difiyen, “Ba amã ere naig mafouf?” Age de di, ì iron, “Å nedi moni nigin ge fen, to fefu wiyēdig fen, idegēya bunem tamo kayau bouweid bun od to ũg. Ågenei kabĩ mala walegedig anĩ bun dogol al gouf.”

<sup>15</sup> Tamo kayau Kristus nigin tari difen, anĩ nigin, idi ganan waud bun Jon anĩ Kristus be de fen, kisi musei dalen. <sup>16</sup> Jon idi ganan aitedin yale irokenēdin, “Aya naan nem naan aguneik. Anĩ ere, taka ì in megeir neu wal fiya fau isif, aya to biya nigin, ayam in su nē malũ biru felediya kisi feleya sã. Ì Awa Uur Fateul yã ado nem naan iguneĩf. <sup>17</sup> Ì es fiya nē fok iman ado, ì yogon mayã waĩ fouf, yogon wit biya are yogon ki bun kuruf fen, wit ido yã mala faimud bun an irãf.” <sup>18</sup> Agef fen, Jon od musei bunem, tamo kayau waud yale fen, biya od wogõ fiyēdin.

<sup>19</sup> Anĩ ere, Jonem, Herod tano anĩ nē mudur, tura nē aiwa Herodias nigin ado ereb ereb sane ganan age fen nigin ou fiyē di, <sup>20</sup> Herod mosor ganan mosor enei ado baguf fen, ì Jon kalabus bun inenen.

*Jesus Naan Igun Ado In Ibor Nigin (Matyu 1:1-17; 3:13-17; Mak 1:9-11)*

<sup>21</sup> Sain Jonem tamo kayau ganan naan iguneĩd fen, Jesus ìg naan igunen. Age fe di, Jesus kosē ye mog, saa kã fele di, <sup>22</sup> Awa Uur Fateul kuburir bouwa bun genem ì bun isin. Age fe di, ait taka

saa ilunem isin, “Õ neu Kesu, õ nigin aya wau laa fedig, õ nigin aya wau kulĩ yedig.”

<sup>23</sup> Gama Jesus yogo ĩ yar teti age fiya bun kabĩ gariya inon. Tamo kayau kisi difen, ĩ Josef naal den,

Heli naal, <sup>24</sup> Matat naal,

Lewi naal, Melki naal,

Janai naal, Josef naal,

<sup>25</sup> Matatias naal, Amos naal,

Nahum naal, Esli naal,

Nagai naal, <sup>26</sup> Mat naal,

Matatias naal, Semen naal,

Josek naal, Joda naal,

<sup>27</sup> Joanan naal, Resa naal,

Serubabel naal, Sieltiel naal,

Neri naal, <sup>28</sup> Melki naal,

Adi naal, Kosam naal,

Elmadam naal, Er naal,

<sup>29</sup> Josua naal, Elieser naal,

Jorim naal, Matat naal,

Lewi naal, <sup>30</sup> Simeon naal,

Juda naal, Josef naal,

Jonam naal, Eliakim naal,

<sup>31</sup> Melea naal, Mena naal,

Matata naal, Natan naal,

Dawid naal, <sup>32</sup> Jesi naal,

Obed naal, Boas naal,

Salmon naal, Nason naal,

<sup>33</sup> Aminadab naal, Ram naal,

Hesron naal, Peres naal,

Juda naal, <sup>34</sup> Jakop naal,

Isak naal, Abraham naal,

Tera naal, Nahor naal,

<sup>35</sup> Serug naal, Reu naal,

Peleg naal, Eber naal,  
 Sela naal, <sup>36</sup> Kainan naal,  
 Arpaksad naal, Sem naal,  
 Noa naal, Lamek naal,  
<sup>37</sup> Metusela naal, Enok naal,  
 Jared naal, Mahalalel naal,  
 Kenan naal, <sup>38</sup> Enos naal,  
 Set naal, Adam naal,  
 Negur naal.

## 4

### *Satan Jesus Kisi Fiyen* *(Matyu 4:1-11; Mak 1:12, 13)*

<sup>1</sup> Jesus Awa Uur Fateulem aura fiyen, Jordan naanum kel fen, Awa Uurem itonē, gerere tuan irou ilen. <sup>2</sup> An ï naa foti ibod mog, Satanem kisi fiyen. Ï sain anï bun ereb taka to yon, naa foti bure fele di, ï naū fen.

<sup>3</sup> Agef mog, Satanem Jesus irokenen, “Õ Negur Naal ouf are, meein enei urokenē di, bret falei fouf.”

<sup>4</sup> Jesus Satan aiten yale iron, “Negur nē Itotoya bun eig ye irok, “Tamo bretem dogol to mata ifenēf.”\*

<sup>5</sup> Satan Jesus yale irou, modoū ilun isel fen, kaisā bagai teneub enei nē tano ganan ifelnen.

<sup>6</sup> Agef fen, Satan Jesus irokenen, “Aya õ teneub enei nē biya fiya megeir ado ganan afonōf, ere nigin, are aya ifanan, anï nigin, aya aib taka ifenēya orouf are afenēf. <sup>7</sup> Anï nigin, õ aya selu wabiyouf are, onou ganan are ogon ouf.”

---

\* **4:4:** Diuteronomi 8:3

<sup>8</sup> Jesus Satan aiten yale iron, “Negur nē Itotoya bun eig ye irok, ‘Odug ogon Negur seli wabi fen, ã dogol aruna walouf.’\*”

<sup>9</sup> Satan Jesus yale irou, Jerusalem taun ilen, an tempel fõ soko ilun bagai inenē, ifaren. Satan iron, “Õ Negur Naal ouf are, ogo einenem ufũ urã.

<sup>10</sup> Ere nigin, Negur nē Itotoya bun eig ye irok:

“ ‘Negur õ nigin yogon engel ari fedì di,  
kulatun diyõf,

<sup>11</sup> idi õ imedim ololon daleyõf,

age dife di, õ yē meein takam to itutu ouf.’\*”

<sup>12</sup> Jesus Satan aiten yale iron, “Eig ye irok, ‘Odug ogon Negur kisi fiya bun to unenē.’\*”

<sup>13</sup> Satan kisi fiya enei ganan bure fel fen, ã Jesus itorne ken, ã fau sain taka anĩ tari fen.

*Nasaret Tamo Kayau Idi Jesus Dudum Difiyen  
(Matyu 4:12-17; Mak 1:14, 15)*

<sup>14</sup> Jesus Awa Uur nē megeir bunem Galili kel ilen, age fe di, ã nigin od Galili teneub fonõ fonõ ganan iyokelen. <sup>15</sup> Ì idi neid uub fõ fõ bun biya od ifelnēdi di, ganan ã yana dalesen.

<sup>16</sup> Ì Nasaret ilen, ã an biyan nē, agef fen, Sabat naa\* bun, idi neid uub fõ namen ilen, gai age fedig gen. Agef fen, ã iwesauf nigin fã ye ifaren.

<sup>17</sup> Age fe di, profet Asaia nē itotoya buk kori fiya anĩ difenen, age dife di, ã fara fel fen, eig ye itoton anĩ imiren:

<sup>18</sup> “Odug nē Awa Uur aya bun ibodok,

---

\* **4:8:** Diuteronomi 6:13      \* **4:11:** Sam 91:11, 12      \* **4:12:**

Diuteronomi 6:16      \* **4:16:** Juda neid uub naa, are Sarere.



ere nigin, ï aya maleg anidi biya od wogõ  
 afediyouf nigin, igirna fen,  
 mudurou bun moul fi felen.  
 Ï, aya kalabus bun difaref anidi karika dalouf  
 nigin ado,  
 meleid ifofakeleya anidi meleid fara falauf  
 nigin, kurõ afalaisiyouf nigin sur fiyan.  
 Tamo kayau tunim kiwai difeneïd fen, morõ  
 difenëdif anidi yalel kenëdiya nigin sur  
 fiyan.

19 Takag, Odug nē biya fiya nē yar anī kurõ  
 afalaisiyouf nigin sur fiyan.”\*

20 Age yel fen, ï gaar gabar itotoya ado are korif  
 fen, itotoya anī lo fedig tamo, kel ifen ken, ibodon.  
 Juda neid uub fõ anī bun difaren ganan bagai,  
 Jesus lo difelen. 21 Age dife di, ï gariya ino fen,  
 irokenëdin, “Gama naa enī bun, Negur nē Itotoya  
 enei, āgenei karīya bun kisi felel.”

22 Ganan ï yana dales fen, ï sigoron, wau ifenēya  
 od wogõ yen anī nigin terē den. Age de fen, idi to  
 difen, “Eï Josef naal anī sã de?”

23 Jesus idi irokenëdin, “Momoi bagai, aya nigin  
 od enei tamo kayau musei wogõ dedig wogõ gouf,  
 ‘Dokta, õ ogo ogon dagi el wo! Ereb Kapenaum  
 taun oun agon karī maun anī, ogon fõ gariyan ein  
 ago wo.’ ”

24 Ï od tobol fe fen, iron, “Aya ã momoi aro-  
 keneik, profet taka ï yogon fõ gariyan to karī  
 difiyēf. 25 Aya ã momoi bagai arokeneik, Eliya  
 nē sain bun, Israel oun kayau waab musei difar  
 mog, yar towo ogõ sigis saa katī fele di, teneub

---

\* 4:19: Asaia 61:1, 2

ganan bun uyě sã naũ odug difaren. <sup>26</sup> Age de mog, Negur idi anidi taka bun Eliya to sur fen, anĩ ere, waab taka Sarefat oun Saidon teneub bun sur fen. <sup>27</sup> Takag, Israel oun profet Elisa nē sain bun, musei lepra dagi ado dibodon, anĩ ere, idi atun taka lepra dagi to loko felen, Naman, Siria tamalem dogol.”

<sup>28</sup> Juda neid uub fõ bun, ganan anĩ karĩ de fen, waud sanen. <sup>29</sup> Age de fen, idi fafã de fen, ã taun anĩ itor ilauf nigin dirun. Nedi taun are, arei bun nigin, siya sane bun dirãf nigin dirou dilen. <sup>30</sup> Anĩ ere, ã tamo kayau atu iyok ile fen, yogon naab ilauf nē anĩ dõf ilen.

*Jesus Kaa Sane Irun*  
(Mak 1:21-28)

<sup>31</sup> Agef fen, ã Kapenaum taun isilen, taun are Galili distrik bun ibodok, an Sabat naa bun, ã tamo kayau ifelnēdiya gariya inon. <sup>32</sup> Idi ã ifelnēdin anĩ nigin terē den, ere nigin, in od wogõya are megeir ado.

<sup>33</sup> Juda neid uub fõ bun, tamo taka kaa sanem ironen anĩ an ibodon. ã ait ilun feis iweig iron, <sup>34</sup> “O, Jesus Nasaret tamal, õ amã ere naig wamã fenē? Õ amã daũ wamã fenē nigin usil de? Aya õ nigin keleĩ, Negur nē Fateul anĩ!”

<sup>35</sup> Jesus total ado iron, “Foro wol! ã namen tamal ulõ weis!” Age ye di, kaa sane anĩ, tamo kayau ganan atun, tamo anĩ tou fiyě ira ken, ulõ yeis ilen, tamo are bouwa to daũ fen.

<sup>36</sup> Tamo kayau ganan terē de fen, abob diroke-nen, “Eĩ ere keleĩ eig fiya? ã yana megeir adom irõ

di, kaa sesen ulō deis dilef.” <sup>37</sup> Anī bunem, ī nigin od teneub anī kalilī fiya ganam bun iyokelen.

*Jesus Musei El Fedin*  
(*Matyu 8:14-17; Mak 1:29-39*)

<sup>38</sup> Jesus Juda neid uub fō itor ken, Simon nē fō bun ilen. Simon nē mam, ī bouwa uruwa odug ado nigin yenen anī, isennēf nigin Jesus to difiyen. <sup>39</sup> Anī nigin, Jesus ī itirne ken, bouwa uruwa dagi ou fiyē di, itornen. Age fe di, kayau anī kaisā bagai fā yale, aruneid yalen.

<sup>40</sup> Gaa kuru kel mog, tamo kayau, dagi tamo dagi gariya fire fire adodo ganam, Jesus wagen guri difeid disin, age dife di, idi mugu mugu bun ima tetedin ino fen, ī idi el fedin. <sup>41</sup> Kaa sesen, tamo kayau musei bun, ulolō deis fen, diweig diron, “Ō anī Negur Naal!” Anī ere, ī sakā fiyeīd fen, to wogō douf nigin sigoreid ifofan, ere nigin, idi keleī, ī Kristus.

<sup>42</sup> Bonimeī gugum ado, Jesus moilin ilen. Tamo kayau ī dimirnek dile, ī ibodon nē disi fen, ī idi to itornēdiyof nigin katū difiyen. <sup>43</sup> Anī ere, ī iron, “Aya Negur nē tano nigin biya od, taun taka takag wogō auf, ere nigin, aya anī nigin sur fiyan.” <sup>44</sup> Age ye fen, ī Judia distrik oun Juda neid uub fō fō bun, biya od wogō yef iyon.

## 5

*In Dō Fiya Tar Enidi Ket Jesus Iweignēdin*  
(*Matyu 4:18-22; Mak 1:16-20*)

<sup>1</sup> Naa taka bun, Jesus Genesaret daliyou\* yerin ifaren. Agef mog, tamo kayau ã salili difiye ken, Negur nê od wogõ ye di, karĩ de difar mog anĩ, <sup>2</sup> ã mala ira kel, waag uru naan yerin difar mog, ilen, are gau yaleya tamom an ditor yen ken, nedi kakãg kulo difen. <sup>3</sup> ã waag anidi taka bun sõ yen, are Simon nê waag, agef fen, waag naanũ naal godof irou ilauf nigin to fiyen. Agef fen, ã waag bun ibod ken, tamo kayau biya od ifelnêdin.

<sup>4</sup> Sain ã wogõya bure fel fen, ã Simon irokenen, “Waag naan mala bun urou ule fen, gau yaleya nigin kakãg urofosil.”

<sup>5</sup> Simon aiten yale iron, “Odug, amã bõ odug kabĩ total malel, anĩ ere, ereb taka to malel. Anĩ ere, õ urok nigin aya kakãg baban arofosilauf.”

<sup>6</sup> Sain idi age difen, idi gau musei bagai gei difen, age dife di, nedi kakãg serek fou fenê melsan. <sup>7</sup> Anĩ nigin, idi, nedi tã tar waag taka bun temeleid disi disennêdiyof nigin, gale difiyêdin, age dife di, disi, waag uru bun gau dife isokos fen, waag uru are dimutũ fenê melsan.

<sup>8</sup> Sain Simon Pita enĩ ile fen, Jesus iboron bobou fe fen, iron, “Odug, aya utorna ule, aya mosor nê tamo!” <sup>9</sup> Ere nigin, ã ne tã tar geid gau gei difen anĩ nigin, terefeit den. <sup>10</sup> Sebedĩ gere tar Jems Jon ado, are Simon ne kabĩ tura tar idig age difen. Age dife di, Jesus Simon irokenen, “Õ to kumĩ wo, gama naa enĩ bunem ilauf ganan, õ tamo gei wouf.” <sup>11</sup> Age fe di, idi neid waag fiteiwõ didĩ dife di, isel fen, ereb ereb ganan ditorara ken, Jesus dõ difen.

---

\* **5:1:** Are, Galili Maaĩ.

*Tamo Lepra Dagi Ado*  
(*Matyu 8:1-4; Mak 1:40-45*)

<sup>12</sup> Jesus taun taka bun ibod mog, tamo taka lepra guruma barikā anī isin. Sain ī Jesus ile fen, ī tenebur kubū ye kumokur fe, Jesus igone ken, iron, “Odug, ō oroyōf are, el wiyauf.”

<sup>13</sup> Jesus ima irā, tamo anī kobū fiye ken, iron, “Aya wau irok, ō bouwā biyau f.” Age ye di, kaisā bagai, lepra dagi ī itornen.

<sup>14</sup> Agef fen, Jesus tamo anī irokenen, “Ō aib taka to urokenēf, anī ere, ō pris wagen ule, ō bouwā ufelnef, ō bouwā biyal anī nigin Moses nē od irok anī dō fen, sesewi fiya wenēf, anī bunem yaore di, tamo kayau dilouf.”

<sup>15</sup> Anī ere, ī nigin od fau fau iyok ilen, anī nigin, tamo kayau musei ī karī difiye ken, idi neid dagi yalel kenēdiyof nigin disin. <sup>16</sup> Anī ere, Jesus sain taka taka moilin ile fen, kosē yedig.

*Jesus Tamo Bouwa Ilolaisin Anī El Fiyen*  
(*Matyu 9:1-8; Mak 2:1-12*)

<sup>17</sup> Naa taka bun, ī biya od ifelneid mog, Farisia tamo, lo ifelnēdiya tamo geid, Galili distrik fonō ganan, Judia distrik ado Jerusalem temeleid idi an dibodon. Age de mog, dagi el fediyof nigin Odug nē megeir, ī bun ibodon. <sup>18</sup> Tamo tunī, tamo ilolaisin anī, gabgab bun faali de dirou disi, Jesus wagen dinenēf nigin fō namen dirou dilau fenē age difen. <sup>19</sup> Idi anī age fiya nigin naab taka to dilen, ere nigin, tamo kayau ino yalen, idi fō sokoron disel, soko korō difel fen, ī gabgab ado folo folō dife di, tamo kayau atun, Jesus wagen bagai isilen.

<sup>20</sup> Jesus idi neid momoiya ile fen, ã iron, “Mou, ogon mosor alelkonok.”

<sup>21</sup> Farisia tamo, lo ifelnēdiya tamo geid, idi dogo namedin kisi difen, “Eĩ aim bagai, kono fiya od wogõ yef? Taka nem mosor yaleleya to yenek, Negur yogo dogol.”

<sup>22</sup> Jesus idi kisi difen anĩ kelei ken, to fen, “Ã ere nigin nameĩ bun agog kisi gef? <sup>23</sup> Od nanĩ anĩ aya wogõya nigin karika, ‘Ogon mosor alelkonok’ de, ‘Fã wale fen, uyok ule’? <sup>24</sup> Anĩ ere, Tamo Naal ã tenebur ein mosor yaleleya nigin yana ado anĩ, ã kelei youf nigin...” Ì tamo ilolaisin anĩ irokenen, “Aya õ arokonok, fã wo, ogon gabgab wale fen, fonõ ule.” <sup>25</sup> Age ye mog bagai, ã fã ye, idi wagedin ifaren, yogon yenen gabgab yale, Negur yana yalesef, fonõ ilen. <sup>26</sup> Ganan terẽ de fen, Negur yana dalesen. Idi waud bun terefeit ye fen, diron, “Ada gama tobonunã fire bagai tailer.”

*Jesus Lewi Iweignen*  
(*Matyu 9:9-13; Mak 2:13-17*)

<sup>27</sup> Enei bure fel fen, Jesus ile, takis yaleya tamo yana Lewi, an yogon takis yaleya fõ bun ibod mog, ilen. Jesus ã irokenen, “Aya dõ wiya.” <sup>28</sup> Age ye di, Lewi fã ye, ereb ereb adok itor yen, Jesus dõ fiyen.

<sup>29</sup> Agef fen, Lewi yogon fõ bun, Jesus nẽ saaf odug yabi di, takis yaleya tamo musei, tunĩ geid weim saaf don. <sup>30</sup> Anĩ ere, Farisia tamo, idi neid lo ifelnēdiya tamo geid, Jesus nẽ dõ fiya tar bun nauseir den, “Ã ere nigin takis yaleya tamo, mosor adodo geid, saaf ado naan wõgef?”

<sup>31</sup> Jesus idi aitedin yale iron, “Dagi sã anidim dokta nigin waud to yenēdig, dagi adodom dogol.  
<sup>32</sup> Aya madur tamo anidi iweignēdiya nigin to asin, mosor adodo tamo anidi waud falei douf nigin asin.”

*Kuriya Nigin Jesus To Difiyen*  
*(Matyu 9:14-17; Mak 2:18-22)*

<sup>33</sup> Farisia tamo idi ī dirokenen, “Jon nē dō fiya tar, idi kuri de fen, kosē dedig, Farisia tamo neid dō fiya tar idig age fiya, anī ere, ogon idi dobu dirak.”

<sup>34</sup> Jesus aitedin yale iron, “Mois ī fau ne tā tar weim dibod mog, ā ne tā tar idi kuriya nigin urokenēdigouf anī kisi feleya de? <sup>35</sup> Anī ere, naa fau isi di, anī bun mois tamo idi bun tamal yalelnē di, naa anidi bun idi kuri douf.”

<sup>36</sup> Jesus yaab od enei idi irokenēdin, “Taka nem gabar masak mata serek fe fen, gabar tubu bun to iwadig. Ī age foug are, ī gabar mata anī serek foug, takag, gabar mata bun tamal masak are tubu anī ado to susu falauf. <sup>37</sup> Takag, taka nem wain mata meme gabar\* tubu bun to itinēf. Ī age foug are, wain mata anī, meme gabar gē ye fen, serek foug. Age fe di, wain anī oho yeis fen, meme gabar sane lauf. <sup>38</sup> Age fiya sã, wain mata, meme gabar mata bun itinēf. <sup>39</sup> Agef fen, taka nem wain tubu yakas fen, mata to orodig, ere nigin, ī irok, “Tubu are de biya.’ ”

---

\* **5:37:** Juda neid tobonunã, idi meme gabar nem darum diwadig.

## 6

*Jesus Ī Sabat Naa Nē Odug*  
*(Matyu 12:1-14; Mak 2:23-3:6)*

<sup>1</sup> Sabat naa taka bun, Jesus in dō fiya tar geid, wit kabī atu diyok dile fen, in dō fiya tar wit biya tunī fito difen, imeid bun orok de fen, nedi ilo don. <sup>2</sup> Farisia tamo tunim to difen, “Ā ere nigin Sabat naa bun ĩtāfiya ufoduleg fen, tobonunā enei ago gef?”

<sup>3</sup> Jesus aitedin yale irokenēdin, “Sain Dawid, ne tã tar geid naū fedi di, age fen anī, ã to uwesegen de? <sup>4</sup> Ī Negur nē fō namen ile fen, bret fateul prisem dogol dōdig\* an ibodon anī yokon, ĩ bret tunī ne tã tareg ifenēdin.” <sup>5</sup> Age ye fen, Jesus idi irokenēdin, “Tamo Naal ĩ Sabat naa nē Odug.”

<sup>6</sup> Sabat naa taka bun, ĩ Juda neid uub fō bun ile, biya od ifelnēdin, sain anī bun, tamo taka ima biya melem gege fefu fiya anī an ibodon. <sup>7</sup> Farisia tamo, lo ifelnēdiya tamo geid, idi Jesus bouwa bun od dinouf nigin naab dimiren, anī nigin, idi ĩ Sabat naa bun dagi el fe mog, mailauf de fen, ololo difen. <sup>8</sup> Anī ere, Jesus idi neid kisi kelei ken, tamo ima gege fefu fiya anī irokenen, “Fã wo fen, ganan meleid bun ufar.” Age ye di, ĩ fã yale, an ifaren.

<sup>9</sup> Age fe di, Jesus idi irokenēdin, “Aya ã to ayeik, nanī anī Sabat naa bun lo dō fiya? Biya age fiya anī de, sane age fiya anī, oo, isennē di, mata ibodōya anī de, daū fiya anī?”

---

\* **6:4:** Lo bun, bret fateul anī, prisem dogol dōdig.



<sup>10</sup> Jesus idi ganan fele feid le fen, tamo anī irokenen, “Imā yaī wo.” Ī yaī fe di, in ima oditekei biya len. <sup>11</sup> Anī ere, idi waud fatuk sane fen, mogo Jesus naig tafiyēf de fen, dogo tutur katō difen.

*Jesus Aposel Tuwelf Igirnēdin*  
(*Matyu 10:1-4; Mak 3:13-19*)

<sup>12</sup> Anī sain bun naa taka, Jesus arein kosē youf nigin iselen, bō anī bun Negur kosē fiyen. <sup>13</sup> We fele di, bonimei, Jesus in dō fiya tar wagen iweig laisi fen, idi atun tuwelf geif fen, idi anidi aposel wowā douf nigin igirnēdin. <sup>14</sup> Simon (Jesus ĩ yana yun Pita), in tura Endru, Jems, Jon, Filip, Batolomyu, <sup>15</sup> Matyu, Tomas, Jems Alfeus naal, Simon ĩ anī Selot\* taka, <sup>16</sup> Judas ĩ Jems naal, Judas Iskariot, inim dum Jesus kiwai imeid bun inenen.

*El Fiya Ado Malalon*  
(*Matyu 4:23-5:12*)

<sup>17</sup> Jesus idi geid weim disil, teneub uus bun difaren. In dō fiya tar musei ado, tamo kayau musei biya, Judia distrik kalilī fiya ganan temeleid, Jerusalem temeleid, Taia Saidon taun ado neid ubun temeleid, an difaren, <sup>18</sup> tamo kayau anidi Jesus karī difiyē fenē nigin ado, idi neid dagi el fediyouf nigin, disin. Idi kaa sesenem morō difenēdin are el fedin. <sup>19</sup> Tamo kayau ganān ĩ kobū difiyē fenē age difen, ere nigin, megeir ĩ bunem isi fen, idi ganān el fedin.

<sup>20</sup> Jesus in dō fiya tar lo fiyeid fen, iron:  
“Ā aib maleg are el yeik,

---

\* **6:15:** Juda neid kusī mala taka, idi Rom gawaman ado kusī dedig.

ere nigin, Negur nē tano are āgenei.

<sup>21</sup> Ā gama naū ufaregef are el yeik,  
ere nigin, ā nameĩ isokosauf.

Ā gama maruĩ isif are el yeik,  
ere nigin, ā kasā gouf.

<sup>22</sup> Tamo Naal nigin, tamo kayau sane diyeik,  
diruyei ken, kono diyeik,  
ā yeneĩ sane dile fen, to orodif are,  
Negur ā el yeik.

<sup>23</sup> “Naa anĩ bun, wauĩ kulĩ ye fen, wauĩ al foug,  
ere nigin, āgenei mala solo odug oun saa ilun  
ibodok. Ere nigin, temeid tar profet nigin de age  
difedin.

<sup>24</sup> “Anĩ ere, safineĩ ado ā meleĩlon ado,  
ere nigin, āgenei wauĩ isenneĩya mogo  
walegel.

<sup>25</sup> Nameĩ gama isokosef ā meleĩlon ado,  
ere nigin, ā naū ulagauf.

Gama kasā gef ā meleĩlon ado,  
ere nigin, ā fau wauĩ gudũf fen, maruĩ isiy-  
ouf.

<sup>26</sup> Ā nigin tamo ganan biya de fen, wogō def ā  
meleĩlon ado,  
ere nigin, temeid tar idegēya profet nigin de  
age difedin.

### *Kiwai Tar Nigin Wau Laa Fiya*

*(Matyu 5:38-48; 7:12a)*

<sup>27</sup> “Anĩ ere, ā aib aya karĩ wiyagef anĩ aro-  
keneik: Āgenei kiwai tar nigin wauĩ laa foug, ā  
kiwai difeneik anidi nigin biya ago gouf. <sup>28</sup> Idi ā  
disisneik el fiya wenēdig, idi ā to biya diyeik anidi  
nigin kosē gouf. <sup>29</sup> Tamo taka ogon walā sitakā

fakã fouf, falei wel, walã sitakãg wenê. Tamo taka ogon saket yalouf are, ogon kolos yalouf nigineg to katũ wiyê. <sup>30</sup> Wenêdiyouf nigin to diyok are, wenêdiyouf, aib taka ogon safinã yalef are, anĩ baban kel yaleya nigin to urokenêf. <sup>31</sup> Ereb taka idim age difekeneĩf anĩ oroyeik age fiya gen, ãg idi bun ago gouf.

<sup>32</sup> “Idi ã nigin waud laa fef anidi nigin dogol wauĩ laa fef are, ã nigin ere mala ado? Mosor adodo idig, idi nigin waud laa fef anidi nigin, waud laa fedig. <sup>33</sup> Idi ã nigin biya diyeyik anidi nigin biya ago gouf are, ã nigin ere mala ado? Mosor adodo idig age difedig. <sup>34</sup> Idi anidi bun moni kel walogouf nigin kisig fen, moni wenêdigouf are, ã nigin ere mala ado? Mosor adodo idig, moni ganan kel yaleya nigin kisi de fen, mosor adodo tutur moni difenêdidig. <sup>35</sup> Anĩ ere, ãgenei kiwai tar nigin wauĩ laa fouf, idi nigin biya ago wedigouf, erab taka kel yaleya nigin to kisig fen, wenêdigouf. Ago gouf are, ãgenei mala solo odug biyauf, agef fen, ã Negur Ilun Bagai nê gere tar wowã gouf, ere nigin, Negur ĩ idi to de difiyêdig sesen anidi ado, biya fiyêdidig. <sup>36</sup> ãgenei Temeĩ wau yũdig gen, ãg idi nigin wauĩ ineĩf.

*Ne Tã Es Fiyêya*  
(*Matyu 7:1-5*)

<sup>37</sup> “Taka to es wiyêg, to ago gouf are, ãg Negur to es yeĩf. Taka bouwa bun od to ũg, to ago gouf are, ãg Negur bouweĩ bun od to yũf. Mosor nigin wedereĩ tu kalauf, ago gouf are, Negur ãgenei mosor nigin weder tu kalauf. <sup>38</sup> Wenêdig, ago gouf are, Negur ifeneĩf. Ima su karikauf, lai fesil

fen, baban teten ino isokose di, yokū fe di, awa gere fasauf, ã nigin gogū foug. Tunĩ es wedigef gen, Negur ãg agef es yeif.”

<sup>39</sup> Jesus yaab od eneig irokenēdin, “Mala ifofakeleya tamo taka, mala ifofakeleya tura itonēya kisi feleya de? Idi urom bebeigir to kuku douf de? <sup>40</sup> Skul kesu in tise to wal fef, anĩ ere, taka ĩ keleĩ ganan yalef, yogon tise gen wō youf.

<sup>41</sup> “Õ ere nigin turã mala teteur lo fen, õ ogon aa masak malã bun ibodok anĩ to ulef? <sup>42</sup> Õ ogo aa masak ogon malã bun to ule fen, naig fe di, turã nigin dogol urokenek, “Turau, utor len, aya ogon malã teteur alelkonõf”? Õ mala yaleya tamo, õ ogon malã bun ketem aa masak walel fen, anĩ malã kare kele di, turã bun mala teteur walelauf.

*Aa Taka Yogon Faat Ado  
(Matyu 7:16-20; 12:33-35)*

<sup>43</sup> “Aa biya ĩ faat sane to imadig, aa sane are faat biya to imadig. <sup>44</sup> Aa mugu mugu yogon faat bun, tamo ĩ keleĩ youf. Tamo kayau idi, wei biya barik bun to daledig, gira udum bun to daledig. <sup>45</sup> Tamo biya ĩ, yogon wau bun ereb biya kuru fedig anĩ bunem, tobonunã biya yaor fedig, age fiya gen, tamo sane, yogon wau bun ereb sane kuru fedig anĩ bunem, tobonunã sane yaor fedig. Yogon wau bun isokosef, yogon sigor bun wogõ yedig.

*Fõ Inoya Nē Keleĩ Tamo, Neneya Tamo Ado  
(Matyu 7:24-27)*

<sup>46</sup> “Ere nigin ã aya nigin ‘Odug, Odug,’ ge fen, aya orok anĩ to ago gedig? <sup>47</sup> Taka ĩ wageun isi, neu od karĩ ye fen, dõf age fef, ĩ naig fiya anĩ aya

ã afelneĩf. <sup>48</sup> Ĩ fõ inoya tamo taka, ku fatuk yale fen, meein teten fõ gariya inon gen. Sain kuwei isin, wĩ ye fen, fõ yun, anĩ ere, fõ anĩ yokũ fiya kisi feleya sã, ere nigin, fõ are total ado inon. <sup>49</sup> Anĩ ere, taka ĩ neu od karĩ ye fen, to dõf age fef, ĩ tamo taka teneub bun fõ gariya sã inon gen. Sain kuwei wĩ ye fen, fõ yun, fõ anĩ kala fel, oditekei daũf irailen.”

## 7

### *Kusĩ Tamo Neid Orowa Nẽ Momoiya (Matyu 8:5-13)*

<sup>1</sup> Jesus tamo kayau karĩ douf nigin enei ganan wogõ bure fel fen, ĩ Kapenaum taun ilen. <sup>2</sup> An kusĩ tamo neid orowa nẽ ferfer taka, in odug ĩ nigin wau laa fedig anĩ, dagi fen, laa fou fenẽ age fen. <sup>3</sup> Kusĩ orowa Jesus nigin karĩ ye fen, Juda neid mudur adodo Jesus garan susur fedi di, ĩ isi fen, yogon ferfer el fiyẽf nigin to difiyen. <sup>4</sup> Idi Jesus garan disisi fen, total bagai digonen, “Tamo enei, õ enĩ agouf nigin kisi feleya bagai, <sup>5</sup> ere nigin, ĩ nemã tamo kayau nigin wau laa fedig, nemã uub fõg inon.” <sup>6</sup> Anĩ nigin, Jesus idi geid dilen.

Ĩ mogo fõ sirin mog, kusĩ orowa ne tã tar Jesus dirokenẽf nigin sur fedin, “Odug, õ kabĩ total to walouf, ere nigin, aya to biya nigin aya kisi afef, õ neu fõ bun to usiyouf. <sup>7</sup> Aya to biya nigin, aya õ garan isiya nigin to kisi afen. Anĩ ere, õ od urõ di, neu kabĩ tamo dagi fara falauf. <sup>8</sup> Ere nigin, aya yug nigin age fiya, ayag neu odug anĩ farumen abodok, kusĩ tamo idig aya farumeun dibodok.

Aya taka enĩ arokenek, ‘Ule,’ afiyek, ĩ ilauf. Aya taka arokenek, ‘Õ usi,’ au di, ĩ isidig. Neu kabĩ tamo enĩ ago afiyek, ĩ anĩ age fedig.”

<sup>9</sup> Kusĩ orowa od enĩ irõ di, Jesus karĩ ye fen, ĩ nigin terē yen, agef fen, tamo kayau dõ difiyen anidi bun falei yel iron, “Aya ā arokeneik, aya Israel bun, momoiya odug eig fiya taka to ailen.”

<sup>10</sup> Age ye di, kusĩ tamo sur fedin anidi, fõ bun ke de dile fen, ferfer anĩ dagi sã ibod mog, fotou difen.

### *Jesus Kayau Waab Taka Nē Kesu Turĩ Fen*

<sup>11</sup> Anĩ dumen, Jesus taun taka Nain ilen, in dõ fiya tar, tamo kayau musei, ĩ geid weim dilen. <sup>12</sup> ĩ mogo taun bobog kelē fiyē mog, laa tamo taka faali de disin, laa tamo anĩ kayau waab nē kesu tekelei bagai, tamo kayau musei taun temeleid kayau waab geid. <sup>13</sup> Sain Jesus kayau waab anĩ fele fiyen, in wau ĩ nigin gudūf fen, iron, “To inã wale.”

<sup>14</sup> Age ye fen, ĩ isel, dege kobũ fe di, faali difen idi, dē delen. ĩ iron, “Tamo gaũ, aya õ arokonok, fã wale!” <sup>15</sup> Laa tamo anĩ fã ye ibod ken, od yen, age fe di, Jesus tamo anĩ ĩ sina kel ifenen.

<sup>16</sup> Age fe di, idi ganan kumĩ ado terefeit de fen, Negur yana dalesen. Idi diron, “Profet odug taka, ada atun wõ yel. Negur yogon tamo kayau isennēdiyof nigin isil.” <sup>17</sup> Jesus nigin, od enei Judia distrik kalilĩ fiya ganan iyokelen. Jesus,

*Jon Naan Igunēdiya Tamo Ado  
(Matyu 11:2-19)*

18 Jon nē dō fiya tar, enei ganan nigin Jon dirokenen. Jon idi uru iweigneĩd fen, 19 Odug eig de to difiyēf nigin sur fedin, “Tamo isiyouf den, ò ogo yeir de, amã fau taka nigin malamã manouf?”

20 Tamo Jesus garan disi diron, “Jon Naan Igunēdiya Tamo, ò to mayōf nigin amã sur famam, “Tamo isiyouf den, ò ogo yeir de, amã fau taka nigin malamã manouf?” ”

21 Sain anī bun bagai, Jesus, tamo kayau musei dagi adodo, darau adodo, kaa sesenem dirounēdin el feid fen, meleid ifofakeleya el fedid, kelē den. 22 Jesus solof irokenēdin, “Kekug uleg fen, ã wedereim karī gel, meleim ulegel anī Jon wogō wiyēg, meleid ifofakelen kelē def, to diyon mogo diyok, lepra dagi adon mogo el fedin, wedereid daabun od karī def, gare den turī fedif, maleg bun biya od wogō fedif. 23 Tamo aya nigin wau to firagagaũ fef, Negur ĩ el fiyek.”

24 Jon nē arũ tamo ditornē dilele di, Jesus, tamo kayau guru difen anidi, Jon nigin irokenēdin, “Ã ere bagai anī ulogouf nigin, gerere tuan ulegen? Ã unin yaum walala fe di, ulogouf nigin ulegen de? 25 Anī sãf are, ere bagai ã ulogou fenē, ulegen? Tamo taka kolos biya bagai ifonun de? Sã, idi kolos medeĩya biya difoun ken, safineid inid adodo are, king nē fõ bun dibodok. 26 Ere bagai anī ã ulogou fenē, ulegen? Profet taka de? Ariya, aya ã arokeneik, ĩ profet wal fediya. 27 Tamo anī, ĩ nigin eig ye itoton:

“ ‘Aya neu arũ tamo sur afe di, ĩ uyu ilauf,

im ket ogon naab dodok fouf.’\*

<sup>28</sup> Aya ã arokeneik, kayau onudi kesu dalen idi atun, taka nem Jon to wal difiyen, anĩ ere, aib taka Negur nẽ tanon yana naal bagai ado, ĩ Jon wal fiya.”

<sup>29</sup> (Tamo kayau ganan, takis yaleya tamog, sain idi Jesus nẽ od kari de fen, Negur nẽ naab anĩ biya den, ere nigin, idi Jonem naan igunẽdin. <sup>30</sup> Anĩ ere, Farisia tamo, lo keleĩ tamo geid, idi dogo nigin Negur nẽ oroya ditoron, ere nigin, idi Jonem naan to igunẽdin.)

<sup>31</sup> “Tamo kayau sain enei bun, idi nigin ere bunem aya kisi afouf? Idi ere gen? <sup>32</sup> Idi simõ maket modoũ bun dibod ken, abob diweignẽdidig gen:

“ ‘Amã ã nigin kelel maun,  
anĩ ere, ã to kui gen;  
amã kanon seg malen,  
anĩ ere, ã to inã walegen.’

<sup>33</sup> Aya enei wogõ auf, ere nigin, Jon naan igunẽdiya tamo isin, bret to yon, wain to yon, ã urõgef, ‘Ĩ kaa sane ado.’ <sup>34</sup> Tamo Naal isin, saaf yon, naan yon, ã urõgef, ‘Eĩ dobu irãya tamal, ĩ, takis yaleya tamo, mosor tamo adodo geid, uyu kũ difedig.’ <sup>35</sup> Anĩ ere, kisi biya ĩ, in dõ fiya ganan bunem, biya yaorouf.”

### *Mosor Kayaum Jesus Bun Moul Fi Felen*

<sup>36</sup> Farisia tamo takam, Jesus ĩ ado saaf dãf nigin iweignen, anĩ nigin, Jesus ĩ Farisia tamo anĩ nẽ fõ bun ile fen, tebol bun ibodon. <sup>37</sup> Taun anĩ bun, kayau taka mosor ado ibodõdig, Jesus Farisia

---

\* 7:27: Malakai 3:1



tamo anĩ nẽ fõ bun, saaf yoko yeya karĩ ye fen, kayau, moul sumeĩ biya bagai anĩ gulub\* ado irou isin. <sup>38</sup> Kayau ĩ Jesus dumen ye garan ifar, maru isi fen, Jesus ye lũ fen. Agef fen, kayau yogon fatiyam Jesus ye waĩf, umã fe, moul sumeĩ biya bagai, ye bun fi felen.

<sup>39</sup> Sain Farisia tamo Jesus iweignen anim, enei ile fen, ĩ yogo kisi bun iron, “Tamo enei profet takauf, ĩ aibem kobũ fiyek, ĩ ere kayau, ĩ mosor kayau taka anĩ, keleĩ youf.”

<sup>40</sup> Jesus ĩ irokenen, “Simon, aya ereb taka arokonõf.”

Ĭ iron, “Tise, urokana.”

<sup>41</sup> Jesus iron, “Tamo uru, moni tamo taka bun wareg dalen, taka faif tausen kina, taka faif handred kina. <sup>42</sup> Idi urom wareg ifenẽya moni sã, anĩ nigin, moni tamo dogo neid wareg gudũ felen. Gama nanim anĩ, moni tamo nigin wau fatuk laa foun?”

<sup>43</sup> Simon solof iron, “Aya kisi afef, taka ĩ wareg odug yalen anĩ gudũ fel kenen anim.”

Jesus iron, “Õ tutuk es wol.”

<sup>44</sup> Age ye fen, Jesus falei yel, kayau wage ifen ken, Simon irokenen, “Õ kayau enei ulef? Aya ogon fõ bun asil. Õ yeu kulo fiya nẽ naan taka to wanal, anĩ ere, kayau ĩ yogon marum yeu lũf fen, yogon fatiyam waĩ fel. <sup>45</sup> Õ to umã wiyal, anĩ ere, kayau enei, aya asour alel sain bun, ĩ yeu umã fel anĩ, fau fau umã fiyek. <sup>46</sup> Õ mudurou bun moul to unol, anĩ ere, kayau ĩ moul sumeĩ biya bagai, yeu bun fi felel. <sup>47</sup> Anĩ nigin, aya õ arokonok, kayau

\* 7:37: Meein alabasta nem dinon.

enĩ nẽ mosor musei yalelel, anĩ nigin, ã fatuk wau laa fen. Anĩ ere, aib taka mosor naal yalelen, ã wau laa fiya naal.”

<sup>48</sup> Age ye fen, Jesus kayau irokenen, “Ogon mosor alelkonok.”

<sup>49</sup> Tamo Jesus geid dibodon, tutur dogo dogol diron, “Eĩ aim, ã mosoreg yalelef?”

<sup>50</sup> Jesus kayau anĩ irokenen, “Ogon momoiya anim isennom, waũ inosiya ado ule.”

## 8

### *Faat Irarãya Tamo Nẽ Yaab Od (Matyu 13:1-23; Mak 4:1-20)*

<sup>1</sup> Anĩ dumen, Jesus taun ado fonõ fonõ iyo ken, Negur nẽ tano nigin, biya od wogõ yen. In dõ fiya tar tuwelf weim, <sup>2</sup> kayau tunĩ idi kaa sesen iruid fen, dagi el fedin idig weim: Maria (Magdala tamal) ã bun kaa sesen sewen irudi di, diyan, <sup>3</sup> Joana Kusa nẽ kayau, Kusa ã Herod nẽ fõ lo fiya tamo, Susana, musei tunĩ geid. Kayau eneidi, idi neid safineid nem disennedin.

<sup>4</sup> Tamo kayau taun ganan bun temeleid, Jesus garan disi, moku de mog, ã yaab od enei iron, <sup>5</sup> “Kabĩ marau taka, faat irarãf nigin ilen. Sain ã irarak ile mog, tunĩ naab luwen kuku ren, are teten diyon, ninã ilun temeledim dakasin. <sup>6</sup> Tunĩ mein tuar kuku ren, are bali fokũ yeid fen, laasi yedin, ere nigin, idi lumi sã. <sup>7</sup> Faat tunĩ malũ duri atun kuku ren, are malũ duri, faat anĩ ado, odudug fen, malũ durim sile feledin. <sup>8</sup> Faat tunĩ teneub biya bun kuku ren, are fokũ yedin, biya

imadin, gariya tekelei yogon biya wan handred iman, biya anim gariya anī wal fiya.”

Sain ī enī wogō ye fen, ī iweig iron, “Taka ī karīya nigin weder ado, ī karī youf.”

<sup>9</sup> In dō fiya tar, yaab od enī nē gariya nigin, ī to difiyen. <sup>10</sup> Jesus iron, “Negur tano nigin, iminēya od nē keleī are, Negur ā mogo ifenein, anī ere, tunī bun aya yaab od nem wogō auf, anī bunem, “ ‘idi meledim diledig, anī idi meleid fokōya sā, idi wederedim karī dedig, anī idi gariya keleī sā.’\* ”

<sup>11</sup> “Yaab od anī nē gariya eig fiya. Faat are Negur nē od. <sup>12</sup> Faat tunī naab luwen kuku ren are, tamo idi od karī den, Satan isi, biya od idi namedin ibodok anī yaleledig, anī bunem, idi to momoi de di, to isennēdiyof. <sup>13</sup> Faat tunī meein tuar iraran are, tamo idi od karī de fen, waud bun kulīya ado od daledig, anī ere, idi warumutei sā. Idi sain naal bagai momoi def, anī ere, kisi fiya isi di, fara furu de diyaleledig. <sup>14</sup> Faat malū duri atun kubū yen are, tamo idi od karī den, anī ere, idi diyok dile mog, tenebur mata ibodōya nē suwēya, safina ado ibodōya nē kisi, bouwa nē oroya anidim idi sile fedi di, idi faat to yūf. <sup>15</sup> Anī ere, faat teneub biya bun kubū yen are, tamo idi, kisi biya, karīya biya ado, waud bun ibodok, od karī de fen, kafī difelef, anī total difaref, faat biya yūf.

*Lam Yoki Bun*  
(Mak 4:21-25)

---

\* **8:10:** Asaia 6:9

16 “Taka nem lam tōf fen, mis kur be, fatar farumen to inodig. Age fiya ban, ï yoki bun iseginē di, idi aaben disif, lalan dilouf. 17 Ereb ereb ganan iminēya yenek anī ganan yaor fouf, ereb ereb ganan nar fen yenek anī ganan irou isi, biru fel fen, yaau du fe di, keleï youf. 18 Anī nigin, ã kisi el ge waleg fen, ã karī gouf. Aib taka ï ado, aya toru afouf, age fe di, ï musei adouf. Taka ï sã bagai, ereb taka ï ado nigin ï kisi fef areg, ï bun tamal son fouf.”

*Jesus Nē Sina, Tura Tar Geid*  
(Matyu 12:46-50; Mak 3:31-35)

19 Jesus nē sina, tura tar geid, ï dilouf nigin disin. Anī ere, idi ï wagen ileya kisi feleya sã, ere nigin, tamo kayau musei. 20 Takam Jesus irokenen, “Ogon sinã, turã tar geid, õ dileyōf nigin serē difaref.”

21 Jesus solof iron, “Neu naai ado turau tar, are idi Negur nē od karī de fen, dō difef anidi.”

*Jesus Yau Uyē Ado Irokenēdi Di, Kee Delen*  
(Matyu 8:23-27; Mak 4:35-41)

22 Naa taka bun, Jesus in dō fiya tar irokenēdin, “Ada daliyou sitakã talauf.” Anī nigin, idi waag bun sō de dilen. 23 Idi solī de mog, Jesus mulaï yenen. Yau odug daliyou bun isi di, maaï waag namen isokosen. Idi morō odug fotou difen.

24 In dō fiya tar dile, Jesus turī difiyē diron, “Odug, Odug, ada naanũ talalau fenē!”

Ï fã yale, yau naan moloun wī yen ado, sakã fiyēdi di, yau uyē ado irorou kel, ganan dē delen.

<sup>25</sup> Jesus in dō fiya tar to fiyēdin, “Āgenei momoiya nain?”

Idi kumĩ terē de fen, abob toti difen, “Eĩ aim bagai? Ī yau ado naaneg irokenēdi di, ĩ ait dō difef.”

*Jesus Tamo Taka Kaa Sesen Musei Ado El Fiyen  
(Matyu 8:28-34; Mak 5:1-20)*

<sup>26</sup> Idi Galili tamal daliyou dibal, Gerasa teneub bun dilen. <sup>27</sup> Sain Jesus ubun kutū yesin, taun anĩ bun tamal, tamo taka kaa sesen ado ĩ tarabā fiyen. Sain meluk, tamo enei kolos sã, fõ buneg to ibodōdig, anĩ ere, ĩ matmat bun ibodōdig. <sup>28</sup> Ī Jesus ile fen, kaĩ ye, Jesus ye gariyan kubũ ye, ĩ ait odugem iweig iron, “Õ aya ere naig wiyau fenē, Jesus, Negur Ilun Biya nē Naal? Aya õ agonok, õ aya to daig wiyauf!” <sup>29</sup> Ere nigin, Jesus mogo kaa sane tamo anĩ bun tamal ulõ yesiyouf nigin irokenen. Sain musei kaa sanem ironē di, ye ima ado, sen nem difofādig, age de fen, tari difiyēdig, anĩ ere, ĩ sen kokour fele di, kaa sanem wala ino di, moilin iledig.

<sup>30</sup> Age ye di, Jesus ĩ to fiyen, “Õ yana ai?”

Ī solof iron, “Aya yanau Ami,” ere nigin, kaa museim ĩ namen disilen. <sup>31</sup> Idi ku isil idīya sã modoũ bun to sur fediyouf nigin, baba baban Jesus digonen.

<sup>32</sup> Arei wala sirin, bor musei biya an saaf doko difaren. Kaa sesen idi, bor namedin dilauf nigin, Jesus digonē di, Jesus idi yo fedin. <sup>33</sup> Kaa sesen, tamo anĩ bun tamal ulolõ deis fen, bor namedin dilelen. Age dife di, bor gududu de, bebeig sane baurin daliyoun disil, naanũ gare desin.

<sup>34</sup> Bor lo fiya tamo, ereb ereb wõ yen anĩ dile fen, diya dile, od anĩ, taun ado fonõ fonõ wogõ den. <sup>35</sup> Age dife di, tamo kayau, ereb wõ yen anĩ dilou fenē dilen. Sain idi Jesus garan disin, kaa sesen tamo anĩ bun tamal diyalelen tamo anĩ, garab yel, kisi biya ado, Jesus ye gariyan ibod mog, dile fen, idi kumĩ den. <sup>36</sup> Tamo idi meledim dilen anidim, kaa sesenem tamo diroun anĩ, naig be el fiyen anĩ, tamo kayau wogõ difiyēdin. <sup>37</sup> Age dife di, Gerasa teneub bun, tamo kayau ganan, Jesus itorneĩd ilauf nigin, ã dirokenen, ere nigin, idi kumim lai fedin. Anĩ nigin, Jesus waag bun sõ ye fen, itornēdin.

<sup>38</sup> Tamo ã bun tamal kaa sesen diyalelen anĩ, Jesus ado dilauf nigin igonen, anĩ ere, Jesus ã sur fiye ken, iron, <sup>39</sup> “Fonõ kel ule fen, Negur õ nigin age fen anĩ wogõ wouf.” Age ye di, tamo anĩ itor ilen, Jesus ã nigin age fen anĩ, taun ganan bun iyo ken, wogõ yen.

*Kayau Naal Laa Fen Ado Dagi Kayau Taka  
(Matyu 9:18-26; Mak 5:21-43)*

<sup>40</sup> Sain Jesus kele di, tamo kayau musei, ã aan difiyen, ere nigin, idi ganan ã nigin ololo difen. <sup>41</sup> Age de mog, Juda neid uub fõ lo fiya nē mudur taka, yana Jairus isi, Jesus ye gariyan kubũ ye fen, yogon fõ bun ileyã nigin igonen, <sup>42</sup> ere nigin, ã ne barai tekelei bagai, ã kayau naal tuwelf yar age fiya, mogõ laa fou fenē.

Jesus naab ile mog, tamo kayau musei kiti de fen, kafĩ difiyē genen. <sup>43</sup> Kayau taka an ifaren, ogõ dagi faimud ado, yar tuwelf iyon. Anĩ ere, taka nem ã to el fiyen. <sup>44</sup> Kayau ã Jesus dume ise,

in kolos iri kobũ fen, age fe di, kaisã bagai, kayau nẽ naud segẽ yelen.

<sup>45</sup> Jesus to fen, “Aim aya kobũ fiyal?”

Idi ganan wa dife di, Pita iron, “Odug, tamo kayau musei kiti de fen, kobũ diyok

<sup>46</sup> Anĩ ere, Jesus iron, “Aibem aya kobũ fiyal. Aya keleĩ, totol aya bun tamal ul fe yalel.”

<sup>47</sup> Age ye di, kayau ĩ imin ken, ileya kisi feleya san, tererẽ ye fen, isi, Jesus ye gariyan kubũ yen. Tamo kayau ganan meleid bun, ĩ ereb nigin Jesus kobũ fiyem ado, naig be ĩ kaisã bagai biya lel anĩ, wogõ yen. <sup>48</sup> Age ye di, Jesus kayau irokenen, “Nau barai, ogon momoiya anim el yom. Waũ inosiya ado ule.”

<sup>49</sup> Jesus fau od wogõ ye mog, tamo taka, Juda neid uub fõ lo fiya mudur Jairus nẽ fõ bunem isin. ĩ iron, “Nẽ barai mogo laa fel. Baban õ tise morõ to wenẽf.”

<sup>50</sup> Jesus od enei karĩ ye fen, Jairus irokenen, “To kumĩ wo, momoi dogol wo, ago di, kayau fau el fiyẽf.”

<sup>51</sup> Jesus Jairus nẽ fõ bun wõ ye fen, takam ĩ geid, aaben ileya nigin katũ fedin, Pita, Jon, Jems ado, kesu nẽ tama sina dogol. <sup>52</sup> Tamo kayau ganan, ĩ nigin waud gudũf fen, inã legur mog, Jesus iron, “To inã waleg. Kayau naal ĩ laa fiya sã, ĩ mulã yenek.”

<sup>53</sup> Idi Jesus kasã difiyen, idi keleĩ, kayau naal laa fel. <sup>54</sup> Anĩ ere, Jesus ĩ ima yales fen, iron, “Neu kesu, fã wo!” <sup>55</sup> Kayau nẽ uur kelen, age fe di, kaisã bagai, fã yale ifaren. Age fe di, Jesus, ĩ ereb taka ifen yõya nigin, idi irokenẽdin. <sup>56</sup> Kayau nẽ

sina tama terefeit de di, ereb wō yel anī, taka to dirokenēf nigin, Jesus idi katū fedin.

## 9

### *Jesus In Dō Fiya Tar Tuwelf Sur Fedin (Matyu 10:5-15; 14:1-12; Mak 6:7-29)*

<sup>1</sup> Jesus in dō fiya tar tuwelf iweigneīd fen, kuru fedin. Agef fen, ī, idi kaa sesen ganan dirudiyouf nigin ado, dagi el difediyouf nigin total ifeneīd fen, megeir fedin. <sup>2</sup> Ī, idi Negur nē tano nigin wogō douf nigin ado, dagi adodo el difediyouf nigin sur fedin. <sup>3</sup> Jesus idi irokenēdin, “Delē uyōgouf nigin ereb taka to walogouf, manig sã, faa sã, bret sã, moni sã, kolos uru to walogouf, tekelei dogol. <sup>4</sup> Fō nanī be bun sō gouf, an ubodōg ile, taun anī utorōgouf. <sup>5</sup> Tamo kayau ā to daleyēi ken, ā to karī diyeīf, sain ā nedi taun anī utorōg fen, yeī aas tu welege di, idi ā kiwai difenein anī keleīf.” <sup>6</sup> Anī nigin, idi fafã de, fonō fonō diyo ken, modoū ganan bun, biya od wogō de fen, tamo kayau dagi el difedin.

<sup>7</sup> Galili lo fiya nē mudur Herod, anī ganan wō yef ilef anī, karī ye fen, wau togun, ere nigin, tunim dirok, Jon ī laa bun tamal mata kel fã yen, <sup>8</sup> tunim dirok, Eliya wō yen, age fe di, tunīg dirok, profet kulu temeleid anidi taka mata kel fã yen. <sup>9</sup> Anī ere, Herod iron, “Aya Jon ula gudū afen. Enei aim, ī nigin karī auf?” Age ye fen, ī Jesus ileya nigin kisi fen.

### *Jesus Faif Tausen Tamo Saaf Ifenēdin (Matyu 14:13-21; Mak 6:30-44; Jon 6:1-14)*



<sup>10</sup> Sain aposel idi keku den, idi age difen anī Jesus wogō difiyen. Age de di, Jesus idi geif irou, idi mugu diya, taun taka Betsaida dilen. <sup>11</sup> Anī ere, tamo kayau musei anī kelei ken, Jesus dō difen. Jesus idi aan fiyeīd, Negur nē tano nigin wogō fiyeīd fen, idi dagi el fiya nē anidi el fedin.

<sup>12</sup> Aragau di, in dō fiya tar tuwelf, ī gein disi diron, “Tamo kayau susur wo di, idi fonō kalilī fiya fonō fonō dile fen, saaf ado yenēya modoū dilouf, ere nigin, ada ein gerere tuan tabodok.”

<sup>13</sup> Jesus aitedin yale iron, “Idi dāf nigin ereb āgem wenēdigouf.”

Idi solo de diron, “Ada bret faif, gau uru ado dogol. Ada tele, tamo kayau enei ganan nigin saaf to na talouf, are kisi feleya sã.” <sup>14</sup> (Faif tausen tamo age fiya an dibodon.)

Anī ere, Jesus in dō fiya tar irokenēdin, “Tamo kayau, mala fire fire fifti age fiya bun, ubodnēdig.” <sup>15</sup> In dō fiya tar age dife di, ganan dibodadan. <sup>16</sup> Jesus, bret faif gau uru ado yale, saa ilun itad fen, ī Negur de fiye ken, anī mumā fedin. Agef fen, ī in dō fiya tar ifenēdin, tamo kayau wagedin gō difouf nigin. <sup>17</sup> Idi ganan don kisi felen. In dō fiya tar, tamo kayau bret gau ado dokon, tunī ifaren anī fito difen, karam tuwelf isokosen.

*Pita Kristus Nigin Kurō Fesin*  
(*Matyu 16:13-28; Mak 8:27-9:1*)

<sup>18</sup> Sain Jesus mugun kosē yen, in dō fiya tar idi ī weim. Ī idi to fedin, “Tamo kayau idi, aya nigin ai dedig?”

<sup>19</sup> Idi solo de diron, “Tunĩ dirok, Jon naan igunēdiya tamo, tunĩ dirok, Eliya, are tunĩg dirok, profet kulu temeleid anidi taka mata kel fā yen.”

<sup>20</sup> Jesus to fedin, “Ba ā uleg? Aya nigin ā ai gef?”

Pita aiten yale iron, “Ō anĩ Negur nē Kristus.”

<sup>21</sup> Age ye di, Jesus enei taka to dirokenēf nigin, idi wedereid total iron. <sup>22</sup> Age ye fen, ĩ iron, “Tamo Naal ĩ darau musei yale fen, mudur adodo, pris odudug, lo ifelnēdiya tamo idim dudum di-fiyēf. Age de fen, ĩ dukesi di, naa towo bure fele di, mata kel fā youf.”

<sup>23</sup> Age ye fen, Jesus idi ganan irokenēdin, “Aib taka aya dō fiyau fenē, ĩ yogon oroya dudum fe fen, yogon aa tetek, naa ganan faali fe, aya dō fiyauf. <sup>24</sup> Aib taka, yogon bouwa buru, mata ibodōf nigin oro fef, are fō yalauf, anĩ aib taka yogon mata bouwa buru, aya nigin ye fen, irailauf, are kel yalouf. <sup>25</sup> Tamo taka ĩ teneub enĩ ganan kakarai fe, akorou ye fen, ĩ yogo bou fō yalauf be irailauf, ere biya ĩ yalouf? <sup>26</sup> Aib taka, aya nigin ado neu od nigin, mama fouf are, sain Tamo Naal, in fula fiya medeīya, Tama nē ado, engel fateul neid fula fiya medeīya ado disiyouf bun, ĩg ĩ nigin mama fouf. <sup>27</sup> Aya ā momoi arokeneik, tunĩ ein difaref, fau to gare de mog, idi Negur nē tano dilouf.”

### *Jesus Bouwa Falei Felen*

*(Matyu 17:1-8; Mak 9:2-8)*

<sup>28</sup> Jesus enei irokeli fen, naa eit age fiya ilele di, ĩ, Pita, Jon, Jems yale, kosē youf nigin arei ilun diselen. <sup>29</sup> ĩ kosē ye mog, yogon nawa falei felen, agef fen, yogon kolos, kolimei filiya nē lalan gen,

wõ yen. <sup>30</sup> Tamo uru, Moses Eliya ado, <sup>31</sup> fula fiya medeïya ado wowã de fen, Jesus geid wogõ den. Idi Jesus teneub itorõf anï nigin wogõ den, anï ï Jerusalem oun kisi falauf. <sup>32</sup> Pita ï, ne tã tar geid, mulã nigin meleid morõ kelen, anï ere, idi oditekei meleid bi fel fen, idi Jesus nẽ fula fiya medeïya ado, tamo uru ï geid difaren anï dilen. <sup>33</sup> Tamo idi Jesus ditornẽ mog, Pita Jesus irokenen, “Odug, ada ein ibodõya nigin biya bagai. Ada salafat towo tanouf, taka ogon, taka Moses nẽ, taka Eliya nẽ.” (Ï wogõ yen anï, ï yogo keleï sã.)

<sup>34</sup> Age ye mog, lalo isi, idi kerub fedi di, idi lalo bun dilel mog, kumï den. <sup>35</sup> Ait taka lalo bunem wõ ye fen, iron, “Eï neu Kesu, ayam ï agirnen. Ï karï wiyëg.” <sup>36</sup> Ait anï wogõ yele di, idi Jesus mugu dilen. In dõ fiya tar anidi, enei dogo bun dogol ibodon, idi ereb dilen anï, sain anï bun, taka to dirokenen.

*Jesus Kesu Kaa Sane Ado El Fiyen*

*(Matyu 17:14-18, 22, 23; Mak 9:14-27, 30-32)*

<sup>37</sup> Naa taka bun, idi arein tamal disi mog, tamo kayau musei Jesus tarabã difiyen. <sup>38</sup> Guru fiya atun, tamo takam iweig iron, “Tise, aya õ agonok, õ neu kesu ulekanauf, ere nigin, ï neu kesu tekelei bagai. <sup>39</sup> Kaa sanem ironẽ di, ï terẽ adod ye, ui yedig. Kaa sanem kesu yũ irã di, tererẽ ye fen, awa bun sali moku fedig. Agef fen, kaisã to folõ fiye kele fen, ï bouwa daũ fedig. <sup>40</sup> Aya, on dõ fiya tar kaa sane diruwauf nigin agonẽdin, anï ere, idi kisi feleya sã.”

<sup>41</sup> Jesus solof iron, “Sain enei bun, tamo kayau momoiya sã, sane bagai. Sain ganï aya ã geid

tabod ken, ã nigin wau aukesilauf? Ogon kesu ein urousi.”

<sup>42</sup> Kesu anĩ isi mog, kaa sanem kesu tenebur yũ irã di, tererẽ yen. Anĩ ere, Jesus kaa sane ou fiyen, agef fen, kesu anĩ el fiye ken, ã tama kel ifenen.

<sup>43</sup> Age fe di, idi ganan, Negur nẽ megeir odug nigin terefeit den.

Idi ganan, Jesus age fen anĩ ganan nigin, terẽ de mog, Jesus in dõ fiya tar irokenẽdin, <sup>44</sup> “Ereb aya arokeneĩf anĩ wedereĩ unog. Tamo Naal ã fau kiwai tamo imeid bun dinou fenẽ.” <sup>45</sup> Anĩ ere, idi od enĩ nẽ gariya nigin nene den. Idi nigin gariya anĩ inokon, anĩ nigin, idi od anĩ to kelei ken, ã to fiyẽya nigin kumĩ den.

### *Ai Anĩ Odug Bagai?*

*(Matyu 18:1-5; Mak 9:33-40)*

<sup>46</sup> Jesus nẽ dõ fiya tar idi, aim anĩ idi atun odug ibodõf nigin, luwa diroun. <sup>47</sup> Jesus idi neid kisi kelei ken, kesu naal taka yale iroule, ã sirin ifarnen. <sup>48</sup> Agef fen, ã idi irokenẽdin, “Aib taka, aya yanau bunem, kesu naal eig fiya taka yalef are, ã aya yaleyaf. Aib taka ã aya yaleyaf are, ã aya sur fiyan anĩ yalef. ã ganan atun, taka ã naal bagai are, ã anĩ odug bagai.”

<sup>49</sup> Jon iron, “Odug, tamo taka, õ yanã nem kaa sesen iruid mog, amã mailen. Anĩ nigin, amã ã katũ mafiyẽf nigin age mafen, ere nigin, ã neda takam sã.”

<sup>50</sup> Anĩ ere, Jesus iron, “To katũ wiyẽg, taka ã kiwai to ifeneik, are ãgenei.”

*Samaria Tamo Kayau Jesus Kiwai Difenen*

<sup>51</sup> Jesus saa ilun yale irou iseleya nē naa dodole di, ĩ Jerusalem ileya nigin wau kuturolen. <sup>52</sup> Age fe di, ĩ arū tamo uyu sur fedo di, idi Jesus nē ereb ereb dodok fiya nigin, Samaria fonō dilen. <sup>53</sup> Anī ere, tamo kayau an to aan difiyen, ere nigin, ĩ Jerusalem ilauf nigin age fen. <sup>54</sup> Sain in dō fiya tar Jems Jon ado, anī dile fen, idi to difen, “Odug, ō amā yā saa ilun tamal maweig di, isi, idi daū fediyouf nigin oroyok de?” <sup>55</sup> Anī ere, Jesus falei yel, ou fiyēdin, <sup>56</sup> age de fen, idi fonō taka bun dilen.

*Jesus Dō Fiyēya Bun Kafī Fiya Fire Fire  
(Matyu 8:19-22)*

<sup>57</sup> Idi naab luwe dile fen, tamo taka Jesus irokenen, “Ō narib ulauf are, aya ō dō ayōf.”

<sup>58</sup> Jesus aiten yale iron, “Gaū kuī idi, yenēya nē modoū ku ado, ninā lalo bun diyok idi, uru ado, anī ere, Tamo Naal ĩ mudur inoya nē modoū sã.”

<sup>59</sup> Jesus tamo takag irokenen, “Dō wiya.”

Anī ere, tamo iron, “Odug, fau de, folō wiya len, aya ele, neu dei mū afel fen.”

<sup>60</sup> Jesus ĩ irokenen, “Laa tamo idi, laa tutur abob mumā difouf. Anī ere, ō ule, Negur nē tano nigin wogō wo.”

<sup>61</sup> Baban takag iron, “Odug, aya ō dō ayōf, anī ere, folō wiya len, kelau ele, neu ibor tar dabuo afiyeid fen.”

<sup>62</sup> Jesus solof iron, “Taka ĩ dur bun ima ino fen, koriri yedig anī, Negur nē tano nigin kabī yaleya to kisi falauf.”

# 10

## *Jesus In Dõ Fiya Tar Sewenti-tu Sur Fedin (Matyu 11:20-27; 13:16, 17)*

<sup>1</sup> Anĩ dumen, Odug sewenti-tu tamo igirneĩd fen, idi, ĩ taun ganan ado modoũ ilauf nẽ bun, uyulil uru uru susur fedin. <sup>2</sup> Jesus idi irokenẽdin, “Kabier saaf musei biya bure felen, anĩ ere, kabĩ tamo musei sã. Age fiya nigin, kabĩ marau, Odug to wiyẽg, kabĩ tamo sur fedin di, yogon kabier dilauf. <sup>3</sup> Uleg! Aya ã sipsip naal gen, gaũ kuĩ atun sur ayeik. <sup>4</sup> Æ moni nẽ kodol be, faa be, su be to walogouf, agog fen, naab luwen taka to aan wiyẽgouf.

<sup>5</sup> “Fõ taka aaben ulagouf, uruwa urõgouf, ‘Fõ enei wau inosiya ado.’ <sup>6</sup> Tamo taka wau inosiya nẽ anĩ an ibodõf are, ãgenei wauĩ inosiya ĩ bun ibodõf, sãf are, ã bun kel isiyouf. <sup>7</sup> Fõ anĩ bun ubodõgouf, saaf ado naan yõya nigin idi difeneĩf, are wãgouf, ere nigin, kabĩ tamo ĩ mala solo yaleyã kisi feleyã. Fõ fõ to walegef uyõg.

<sup>8</sup> “Æ taun taka bun ulege di, idi ã aan diyeĩf, ã ereb wagein dinouf anĩ wãgouf. <sup>9</sup> Dagi adodo an difaref, el wiyẽdig fen, idi urokenẽdigouf, ‘Negur nẽ tano mogo ã nigin melsã.’ <sup>10</sup> Anĩ ere, ã taun taka bun ulege di, idi ã to aan diyeĩf, naab toko tokõ ge fen, urõgouf, <sup>11</sup> ‘Ægenei taun nẽ aas yemã bun degẽ fen anĩg, amã kema ã bun tu mafef. Anĩ ere, ã enei keleĩ youf bagai, Negur nẽ tano mogo melsã.’ <sup>12</sup> Aya ã arokeneik, es fiya naa anĩ bun, taun anĩ, in darau Sodom taun darau dalen anĩ wal fiya, yalouf.

13 “Korasin taun, õ malalon ado! Betsaida taun, õ malalon ado! ã bun memelik musei anodin, age fiya gen anĩ, Taia ado Saidon taun bun wõ yem are, mogo kulu waud falei de fen, wau gudũ fiya nẽ gabar difoun ken, aasur dibodom. 14 Anĩ nigin, es fiya sain bun, ã, morõ Taia ado Saidon taun dalouf anĩ wal fiya, walogouf. 15 Õ Kapenaum taun, õ yanã anĩ saa ilun iselauf de? Sã bagai, õ laa neid modoũ bun usilauf.

16 “Taka ã karĩ yeik, aya karĩ fiyaf, taka ã ã iruyeik, are aya iruyaf, anĩ ere, taka ã aya iruyaf, are ã aya sur fiyan anĩ iruf.”

17 Sewenti-tu tamo idi, kulĩya ado keku de, disi diron, “Odug, õ yanã bunem kaa seseneg morõ di, dõ difen.”

18 Jesus solof iron, “Aya, Satan saa ilunem kolimei lalan gen kakur fen, kubũ ye mog, ailen. 19 Aya, ã, gogour, ambei lalai wedig fen, kiwai nẽ totol ganan wal gouf nigin, megeir afenein. Ereb takam to tadũ yeĩf. 20 Anĩ ere, kaa sigoramã dõ difel ge fen, to wauĩ kulĩ youf, anĩ ere, ãgenei yeneĩ saa ilun itoton nigin, wauĩ kulĩ youf.”

21 Sain anĩ bun, Jesus, Awa Uur Fateul bunem, kulĩya isokos fen, iron, “Dei, saa ado teneub nẽ Odug, aya õ yanã alesef, ere nigin, safina eneidi, kisi biya ado keleĩ adodo to dilouf nigin, õ unokon, ago fen, simõ gen dibodon anidi bun yaor won. Dei, enĩ are ogon waũ filolõ fiya biya bunem agon.

22 “Ereb ereb ganan, Dei ã aya bun inon. Taka nem Naal ã ai ya nigin keleĩ sã, Dei yogo dogol keleĩ. Taka nem Dei ã ai ya nigin keleĩ sã, Naal

yogo dogol ado, tunĩ idi Naalum Dei ifelnēdiyof nigin igirnēdif anidim dogol keleĩ.”

<sup>23</sup> Age ye fen, Jesus falei yel, in dō fiya tar lo feid fen, idi dogol irokenēdin, “Meleim ã ulegedif anĩ dilef are el fedif. <sup>24</sup> Ere nigin, aya ã arokeneik, profet musei, king geid, ã ulegef anĩ dilou fenē nigin waud yenen, anĩ ere, idi meledim to dilen, idi ã karĩ gef anĩ karĩ dou fenē nigin waud yenen, anĩ ere, idi wederedim to karĩ den.”

*Samaria Tamo Tobonunã Biya Ado Nē Yaab Od*

<sup>25</sup> Sain taka bun, lo keleĩ tamo taka fã ye fen, Jesus kisi fiyen. Ĩ Jesus to fiyen, “Tise, aya naig afe di, mata faimud ibodkeleya anĩ alouf?”

<sup>26</sup> Jesus ĩ irokenen, “Negur nē Itotoya bun Lo ere yef? Ō uwesedig anĩ, ere yōdig?”

<sup>27</sup> Lo keleĩ tamom Jesus solof irokenen, “ Ō, Odug ogon Negur ĩ nigin waũ adok, malākanon adok, ogon megeir adok, ogon kisi adok bunem, waũ laaf yenēf.\* Takag, ‘Ō ogo nigin waũ laa fef gen, nē tã nigineg ago waũ laa fouf.’\*\*”

<sup>28</sup> Jesus tamo anĩ irokenen, “Ō de tutuk solo wol. Enei ago di, ō mata ibodkeleya walouf.”

<sup>29</sup> Anĩ ere, lo keleĩ tamo ĩ, Jesus ĩ nigin keleĩ biya sã fiyēf anĩ itor ken, Jesus to fiyen, “Age fiyauf are, ai anĩ neu tã?”

<sup>30</sup> Jesus solof iron, “Tamo taka Jerusalem taun tamal Jeriko taun isil mog, bē tamo imeid bun ilen. Idi yogon kolos dinukeis dũ di, laa gen yen mog, ditornē diyalelen. <sup>31</sup> Sain anĩ bun, pris taka naab tekelei anĩ dōf isilen, tamo are de ile fen,

---

\* **10:27:** Diuteronomi 6:5      \* **10:27:** Levitikas 19:18



ĩ fasis fe tokō felen. <sup>32</sup> Age fiya gen, Lewi tamo takag modoũ anĩ bun isi, tamo are de ile fen, ĩ fasis fe tokō felen. <sup>33</sup> Anĩ ere, Samaria tamo taka iyok isin, tamo yenen nē isi, wō ye, tamo anĩ ile fen, ĩ nigin wau yun. <sup>34</sup> ĩ wagen ilen, moul wain ado gudũ fiya bun fi fel fen, ifokenen. Agef fen, tamo are yales, yogon donki teten ino irou ilen, tamo irouya fō bun ino fen, kulatun fiyen. <sup>35</sup> Naa taka di, ĩ tu silwa koin moni yalis, tamo irouya fō marau ifen ken, iron, ‘Kulatun wiyēf, sain aya kelauf bun, õ baban mala teten be uran, are aya kela afonōf.’

<sup>36</sup> “Õ kisi wof, towo eneidi atun, ai anĩ, bē tamo imeid bun ilen anĩ ĩ ne tā?”

<sup>37</sup> Lo keleĩ tamo solof iron, “Tamo ĩ nigin wau yun anĩ.”

Jesus ĩ irokeken, “Ule, ĩ age fen gen, ago.”

### *Marta Maria Ado Neid Fō Bun*

<sup>38</sup> Jesus, in dō fiya tar geid, naab luwe dile fen, Jesus fonō taka bun wō yen, an kayau yana Marta yogon fō bun Jesus ilauf nigin, Jesus irokenen. <sup>39</sup> ĩ tura yana Maria, ĩ anĩ, Odug ye gariyan ibod ken, ĩ wogō yen anĩ karĩ yen. <sup>40</sup> Anĩ ere, Marta erēb erēb dodok fiya anĩ bun kisi yen ken, Jesus wagen isi to fiyen, “Odug, neu turau itorna di, aya mugu kabĩ alef anĩ nigin, õ to kisi wof de? ĩ uroken, aya isenna!”

<sup>41</sup> Age ye di, Odug aiten yalen, “Marta, Marta, õ erēb erēb musei nigin suwē wo fen, waũ morok, <sup>42</sup> anĩ ere, tekelei dogol õ nigin biya. Maria ĩ biya ani igirim, anĩ taka nem to yalelkenēf.”

# 11

## *Jesus Kosēya Nigin Ifelnēdin* (*Matyu 6:9-13; 7:7-11*)

<sup>1</sup> Naa taka bun, Jesus modoũ taka bun kosē yen. Sain ĩ bure fele di, yogon dō fiya tamo takam Jesus irokenen, “Odug, amā kosēya nigin ufelnamā, Jon, ne dō fiya tar ifelnēdin gen.”

<sup>2</sup> Jesus idi irokenēdin, “Sain ā kosē gouf, eig ge urōgouf:

“ ‘Dei,  
ō yanā fateul ibodōf,  
ogon tano isiyouf.

<sup>3</sup> Naa mugu mugu bun, naa anĩ nē saaf wanamāf.

<sup>4</sup> Ganan amā bun mosor dinof, amā idi neid mosor nigin wederamā tu kelef, age fiya bagai, ōg amā nemā mosor nigin wederē tu kel.

Ago fen, kisi famāya bun to uroulemāf.’ ”

<sup>5</sup> Age ye fen, ĩ idi irokenēdin, “Āgenei taka ĩ, ne mou ado, anĩ bō atun ĩ gein ile fen, irokenēf, ‘Mou, bret towo nem usenna, <sup>6</sup> ere nigin, aya neu tã taka, aya bun delē isil, anĩ ere, aya ĩ yōya nē ereb taka sã.’

<sup>7</sup> “Age ye di, ĩ aaben tamal anim irōf, ‘Aya kabĩ totol to wana. Sukar mogo kotũ felel, aya neu kesu tar geid mogo fataren mainek. Aya fã au fen, ereb taka ifonōya kisi feleya sã.’ <sup>8</sup> Aya ā arokeneik, ĩ, ne mou nigin to fã ye fen, bret ifenēf, anĩ ere, tamo are kukīya sã kinĩ yei fiyē di, fã ye fen, ereb ĩ orof anĩ kilei ifenēf.

<sup>9</sup> “Anĩ nigin, aya ā arokeneik, to gouf, agef ā ifeneĩf; umirēgouf, ā gurug gouf; godu godu gouf,

ã sukar kã feneĩf. <sup>10</sup> Aibem taka to fouf, yalouf; aibem taka imirek, gurug fouf; aibem taka godu godu fouf, sukar kã fel kenēf.

<sup>11</sup> “Ã tama tar, aim āgenei kesu gau nigin to fef, anĩ ban gogour wenēgouf de? <sup>12</sup> Takag, ĩ tataro faat nigin to fef, ĩ ambei wenēgouf de? <sup>13</sup> Ã seseneĩ bagai, anĩ ere, āgenei kesu safina biya biya anĩ ifenēdiya, ā kelei bagai youf are, āgenei anĩ wal fiya, Temeĩ saa ilun ibodok, Awa Uur Fateul aib idi to difiyek, idi ifenēdiyof bagai!”

*Jesus Belsebub Ado Difiyen*

*(Matyu 12:22-30, 43-45; Mak 3:20-27)*

<sup>14</sup> Jesus ait ifokeleya nē kaa sane irun. Sain kaa sane iyawo di, tamo ait ifokelen od wogō yen, age fe di, tamo kayau musei terē den. <sup>15</sup> Anĩ ere, tamo tunĩ diron, “Are kaa sane neid mudur Belsebub yana bunem, ĩ kaa sesen irudif.” <sup>16</sup> Tunĩ Jesus kisi difiye ken, saa ilun tamal uris nigin to difen.

<sup>17</sup> Jesus idi neid kisi kelei ken, idi irokenēdin, “Tano taka yogo kiwai ifen ken, fara fouf, are sane lauf, fō taka yogo kiwai ifen ken, fara fouf, are kubũ youf. <sup>18</sup> Satan ĩ yogo kiwai ifen ken, fara fouf are, yogon tano naig fe ifarauf? Aya enĩ orok, ere nigin, ā urōgef, aya Belsebub yana bunem kaa sesen arudif. <sup>19</sup> Are aya Belsebub yana bunem kaa sesen arudif are, ere bunem āgenei dō fiya tar kaa sesen dirudidig? Anĩ nigin, idim ā es diyēf. <sup>20</sup> Anĩ ere, aya Negur nē ima gege bunem kaa sesen arudif are, Negur nē tano mogo ā bun isil.

<sup>21</sup> “Tamo megeir ado taka, ĩ waila kisi feleya ado yogon fō lo fef are, in safina are totoũ. <sup>22</sup> Anĩ ere, taka ĩ yogon megeir wal fiya anim ironē lai

fiye ken, yogon waila ï anï bun totol yaledig anï son fe fen, in safina gadõ founf.

<sup>23</sup> “Taka ï aya to fedẽ fiyaf, ï neu kiwai, takag, ï aya ado to kuru mafef are, ï firagagaũ fef.

<sup>24</sup> “Sain kaa sane tamo bun tamal ulõ yeis fen, gerere tuan ile, si inoya modoũ imirek ile to fotou fef. Agef fen, ï irok, ‘Aya fõ atoron anï bun baban kelauf.’ <sup>25</sup> Sain ï kel isif, fõ ani waï difel fen, madur difen anï ilef. <sup>26</sup> Anï nigin, ï ile fen, baban kaa sesen ï wal fiya sewen anï geif irou isif, age de fen, idi namen dile difaref. Age dife di, tamo anï gai sane bagai lef, uruwa bun nẽ tobonunã anï wal fiya.”

<sup>27</sup> Jesus eneidi nigin wogõ ye mog, tamo kayau atun kayau taka iweig iron, “Sinã õ gõ yo ken, su ifonon, are ï el fiyek.”

<sup>28</sup> ï solof iron, “Age fiya ban, Negur nẽ od karï de fen, dõ difef anidi, el fedif.”

### *Jona Bun Uris* (*Matyu 12:38-42*)

<sup>29</sup> Tamo kayau guru fiya mala oduge di, Jesus iron, “Tamo kayau, gama sain enei bun dibodok, are sane bagai. Idi memelik nigin to difef, anï ere, taka to afenëdiyounf, de profet Jona nẽ uris anï dogol afenëdiyounf. <sup>30</sup> Jona are Niniwe taun tamo kayau bun uris, age fiya bagai, Tamo Naal ïg sain enei nẽ tamo kayau bun uris. <sup>31</sup> Es fiya sain bun, Kuin Saut tamal fã ye fen, tamo kayau sain enei bun geid, idi neid mosor nigin kurõ falaisiyounf, ere nigin, kayau anï Solomon nẽ keleï karï youf nigin, teneub idiyan tamal isin, gama taka Solomon wal fiya are yeir. <sup>32</sup> Es fiya sain

bun, Niniwe tamo kayau fã de fen, tamo kayau sain enei bun geid, idi neid mosor nigin kurõ difalaisiyouf, ere nigin, idi mogo Jona wogõ ye di, waud falei den, gama taka Jona wal fiya are yeir.

*Bouwa Nê Lam*  
(*Matyu 5:15; 6:22, 23*)

<sup>33</sup> “Taka nem lam tõf fen, to iminēyan be, beĩ kur inodig, age fiya ban, in yoki bun iseginēdig, age fe di, idi aabē disif anidi lalan dilouf. <sup>34</sup> Malã are bouwã nê lam. Õ malã biyauf are, ogon bouwã gananeq lalan barikãf. Anĩ ere, õ malã sesen lauf are, ogon bouwãg gugum kalauf. <sup>35</sup> Anĩ nigin, lalan õ ado anĩ gugum keleya nigin lo walauf. <sup>36</sup> Age fiya nigin, ogon boũ gananeq lalan barikãf fen, siri sitakã to gugum ouf are, lam nê lalan õ bun so fe di, yaor ledig gen, bouwa gananeq oditekei lalan ouf.”

*Jesus Farisia Tamo Ado Lo Ifelnēdiya Tamo Isisnēdin*  
(*Matyu 23:1-36; Mak 12:38-40*)

<sup>37</sup> Sain Jesus wogõ ye bure fele di, Farisia tamo takam ĩ, Jesus ado saaf dãf nigin iweignē di, aaben ile, tebol bun ibodon. <sup>38</sup> Anĩ ere, Farisia tamo ĩ, Jesus ima ketem kulo fiya sã, saaf nigin ibodon anĩ ile fen, terē yen.

<sup>39</sup> Age fe di, Odug ĩ irokenen, “Farisia tamo ã, kap ado beĩ agara kulo gedig, anĩ ere, ã namein akorouya ado sanem barikã. <sup>40</sup> ã neneya tamo! Negur agara inon anĩ, nameq to inon de? <sup>41</sup> Anĩ ere, ereb beĩ namen ibodok anĩ maleq wenēdigouf, ago ge di, ereb ereb gananeq ã bun fliya ibodõf.

42 “Farisia tamo ã meleĩlon ado, ere nigin, ã ãgenei edẽ, bakso ado, kabier tamal ererb ererb ganan farag fen, ten tekelei Negur wenẽgedig, anĩ ere, ã lo es fiya ado Negur nigin wau laa fiya utorõgedig. ã dum nẽ anĩ dõg fen, uruwa nẽ anĩg to utorõgem, are dem.

43 “Farisia tamo ã meleĩlon ado, ere nigin, ã Juda neid uub fõ bun modoũ malabag ibodõya ado, maket modoũ bun tamo kayau idim sere diyeik anĩ oroyeik.

44 “Ã meleĩlon ado, ere nigin, ã tamo mekura dede fiya gen, tamo idi keleĩ sa ken, teten diyõdig.”

45 Lo keleĩ tamo taka Jesus irokenen, “Tise, õ enei urõ di, õ amãg kono wamak.”

46 Jesus solof iron, “Lo keleĩ tamo, ãg meleĩlon ado, ere nigin, ã tamo kayau, morõ idi faali fiya nigin malai bagai anĩ wenẽdigedig, anĩ ere, ã aug imeĩ gege tekelei idi isennẽdiya nigin to fitei yedig.

47 “Ã meleĩlon ado, ere nigin, ã profet neid matmat unogedig, anĩ ere, ã tubuĩ tarem idi didenkesin. 48 Anĩ nigin, ãgenei tubuĩ tar profet age difedin anĩ, ã megeir ge fen, yaor gef, ere nigin, idi profet didenkesin, ã idi neid matmat unogedig. 49 Age fiya nigin, Negur yogon kisi biya bunem iron, ‘Aya fau idi bun profet, aposel ado sur afediyouf, age afe di, idi tunĩ didenkeis fen, tunĩ kafĩ fiya difenẽdiyof.’ 50 Anĩ nigin, teneub inon gariya bunem isif, profet ganan neid naudeid fi felen anĩ nẽ mala solo, tamo kayau gama sain enei bun idim dalouf, 51 Abel nẽ

naud bunem ile, Sekaraia ï tempel alta ado atun dukesin in naud bun. Aya ã momoi arokeneik, naud enĩ ganan nẽ mala solo, tamo kayau gama sain enei bun idim dalouf.

<sup>52</sup> “Lo keleĩ tamo, ã meleĩlon ado, ere nigin, ã keleĩ nẽ ki walelegen, ã aug namen ileyã sa ken, ã idi namen dilef anidi neid sukar katĩ welegef.”

<sup>53</sup> Sain Jesus modoũ anĩ itoron, Farisia tamo, lo ifelnẽdiya tamo geid, ï bun kiwai totol dino, to fiya fire fire musei to difiyen, <sup>54</sup> erob od wogõ youf bun dirounẽf nigin tari difiyen.

## 12

### *Weder Irouya Ado Tai Fiya (Matyu 10:26-33)*

<sup>1</sup> Dirub kele di, tamo kayau tausen musei biya guru difen, anĩ bun idi abob tete tete lalai de difaren, age dife di, Jesus in dõ fiya tar ketem irokeneid fen, iron, “Ã, Farisia tamo neid yis nigin lo welegei, are mala yaleya tobonunã. <sup>2</sup> Gama erob dede fiya yenek, are ganan fau lelek falauf, gama erob iminẽyan yenek, are ganan fau yaorouf. <sup>3</sup> Ã gugum bun wogõ gen anĩ, fau gaa lalan bun karĩ douf, ã aaben wedereim kosesẽ gen anĩ, fau fõ sokoronem kurõ difesiyouf.

<sup>4</sup> “Neu mou tar, aya ã arokeneik, idi bouwa dukeis fen, anĩ dumen erob taka baban age fiya kisi feleyã sã anidi to kumĩ wodig. <sup>5</sup> Anĩ ere, ã aib kumĩ wiyẽgouf anĩ afelneif: Ï bouwa yukeis fen, dumen ã hel bun irãyeif nigin megeir ado anĩ kumĩ wiyẽgouf. Ariya, aya ã arokeneik, ï kumĩ wiyẽg. <sup>6</sup> Fisisir faif, tuwenti toea nẽ nem

na nigin to sur gedig de? Anĩ ere, Negur ĩ anidi taka nigin to weder tu keledig. <sup>7</sup> Momoi, Negur āgenei mudureĩ bun fatiyeĩ ganan iwes yalen. To kumĩ wog, ā fisisir musei wal fediya.

<sup>8</sup> “Aya ā arokeneik, aibem taka, aya nigin tamo meleid bun kurō falaisiyouf, Tamo Naal ĩg, ĩ nigin Negur nē engel meleid bun kurō falaisiyouf. <sup>9</sup> Anĩ ere, taka ĩ, aya nigin tamo meleid bun wa fouf, ayag ĩ nigin Negur nē engel meleid bun wa afouf. <sup>10</sup> Taka ĩ, Tamo Naal nigin kiwai ifen ken, kobu yef are, in mosor yalelauf. Ani are, taka ĩ, Awa Uur Fateul kiwai ifen ken, kono fiyek, in mosor to yalelauf.

<sup>11</sup> “Sain ā Juda neid uub fō bun guri diyeĩ diroule, mudur adodo yeneid adodo meleid bun difarneĩf, an wauĩ moro ken, aug isenneĩf nigin naig mafouf, ere mauf, wog fen, to sii yeĩf, <sup>12</sup> ere nigin, sain anĩ bun, Awa Uur Fateul ereb wogō gouf nigin, ifelneĩf.”

### *Neneya Tamo Safina Ado Nē Yaab Od*

<sup>13</sup> Tamo kayau musei atun, tamo takam Jesus irokenen, “Tise, neu turau urokenē di, amā urom akor foi mafouf.”

<sup>14</sup> Jesus solof iron, “Aim aya ā atun es fiya tamo be, foi fiya tamo igrnan?” <sup>15</sup> Age ye fen, Jesus idi irokenēdin, “Lo welegei, ereb ereb ganan bun akorouya anĩ lo welegei, tamo nē mata in safina musei bun to ibodok.”

<sup>16</sup> Age ye fen, ĩ yaab od enei idi irokenēdin, “Tamo taka safina musei ado, ne teneub bun saaf musei yaledig. <sup>17</sup> ĩ kisi yalen, ‘Aya naig afouf? Aya neu saaf inoya nē modoũ sã.’



18 “Agef fen, ï iron, ‘Aya eig afouf anï de. Neu ki narï afeleid fen, odug nuwa anodiyouf, an neu saaf ado ereb ereb ganan anouf. 19 Age afel fen, aya yug nigin orõf, “Õ ereb ereb biyai biyai musei biya, yar musei nẽ unof. Ibodõya karika, saaf, naan wokon, waũ el fouf.” ’

20 “Anï ere, Negur ï irokenen, ‘Õ neneya! Bõ enei bun bagai, aya ogon mata alelkonõf. Age afe di, aim ogo nigin dodok won anï yalouf?’ 21 “Taka ï yogo nigin, agef safina kuru fef, anï ere, Negur mala bun maleg ibodok, ï bun eig bagai fe, wõ youf.”

### *To Osig*

*(Matyu 6:25-34)*

22 Age ye fen, Jesus in dõ fiya tar irokenëdin, “Age fiya nigin, aya ã arokeneik, ã ãgenei bouweï mata ibodõf nigin to osig fen, ere saaf tãf gouf, ã ãgenei bouweï nigin to osig fen, ere gabar tafilaïf gouf. 23 Mata anï saaf wal fiya, bouwa anï gabar wal fiya. 24 ã kalog uledigedig, idi saaf to diteneidig, idi saaf to u difedig, idi ki be, udũ inoya modoũ sã, anï ere, Negur ifoutnëdidig. ã ninã anidi wal fediya bagai! 25 ã takam yogon mata nigin osi ye fen, aua tekelei tobol fiya kisi feleya de? 26 ã naal bagai enei age fiya kisi feleya sã nigin, ere nigin anï ã ereb ereb tunï nigin osi gef?

27 “Aa munï naig fe odugedig anï ulegedig. Idi kabï to daledig, to diwadig. Anï ere, aya ã arokeneik, kulu King Solomon yogon fula fiya medeïya bun naki gegẽ biya biya ifonun animeg,

aa munĩ taka to wal fen. <sup>28</sup> Anĩ ere, Negur dubur aa munĩ gama dogol ifarauf, nile di, yã irãf anĩ, agef naki fediyouf are, ã idi wal fediya bagai, Negur naig fe ã ifounneĩf, ã momoiya naal bagai ado! <sup>29</sup> Anĩ nigin, ã wauĩ ere saaf wãgouf be, ere naan wãgouf anĩ bun to unog, anĩ bun to osig. <sup>30</sup> Are haiden idi enĩ ganan nigin meleid dimirẽdig. Ægenei Temeĩ ã lau gef anĩ ganan keleĩ. <sup>31</sup> Anĩ ere, Negur nẽ tano umirẽg, ago ge di, safina eneidig ifeneĩf.

<sup>32</sup> “Musei sã ã, to kumĩ wog, ere nigin, ãgenei Temeĩ, tano anĩ ã ifeneĩya nigin wau al fen. <sup>33</sup> Ægenei safineĩ na sur ge fen, maleg wenẽdigouf. Æ mugu mugu moni nẽ kodol to serek fouf anĩ uwagouf, agog fen, saa ilun nẽ safina biya biya to sa kalauf anĩ kuru gouf, an bẽ tamo non to isidig, tutũ to dãf. <sup>34</sup> Ægenei safina biya biya ibodok nẽ an, wauĩg an yenẽf.

*Jesus Kel Isiyouf Nigin Ololo Fiya  
(Matyu 24:43-51)*

<sup>35</sup> “Kabĩ nẽ naki ufonũg fen, ãgenei lam tõg saika wog, <sup>36</sup> tamo idi, nedi odug, tamo kayau ado bagu fiya nẽ tar bunem kelouf nigin tari difedig, anĩ bunem, sain ĩ isi, sukar godu godu fe di, idi sã kaisã bagai ĩ sukar kã difelkenẽf anidi gen ago gouf. <sup>37</sup> Ferfer anidi ololo dife mog, nedi odug isi ilediyof anĩ, idi nigin deuf, aya ã momoi arokeneik, ĩ fau yogo kabĩ nẽ naki ifoun kel, ferfer tebol bun ibodneĩd fen, isi, aruneid yalouf. <sup>38</sup> Ferfer anidi saika difel mog, nedi odug, bõ atun be, we ado be isi ilediyof anĩ, idi nigin

deuf. <sup>39</sup> Anĩ ere, ã enei keleĩ youf: Fõ marau ã, sain nanĩ be bun, bẽ tamo isiyouf anĩ keleĩ youf are, ã yogon fõ lo fe di, to narĩ fouf. <sup>40</sup> Æg saika gouf, ere nigin, Tamo Naal ã fau sain to isiyouf gouf bun isiyouf.”

<sup>41</sup> Pita to fen, “Odug, õ yaab od enei amã nigin de, ganan nigin urok?”

<sup>42</sup> Odug solof iron, “Ferfer taka aim anĩ, dõ fiya biya, kisi biya ado de? Ì, yogon odugem ã yogon odug nẽ fõ bun, anidi neid saaf dogo neid sain kilei, dõf ifenẽdiyof nigin, ima bun inof. <sup>43</sup> Sain tamo odug kelouf bun, ferfer biya bagai age fe di, ilouf, tamo odug ã el fiyẽf. <sup>44</sup> Aya ã momoi arokeneik, tamo odug ã, yogon safina ganan, ferfer anĩ ima bun inouf. <sup>45</sup> Anĩ ere, ferfer taka ã wau bun irõf, ‘Neu tamo odug isiya nigin sain meluk yalef,’ age ye fen, ã gariya ino, tamo ferfer ado kayau ferfer iden ken, ã yogo saaf biya naan biya yokon, aai sã fedig. <sup>46</sup> Ferfer anĩ nẽ tamo odug, in isiya nẽ naa ferfer to isiyouf ye fen, kisif mog, in isiya sain ã keleĩ sã mog, isiyouf. Tamo odug, ferfer anĩ gudũf fisik fe fen, momoiya sã geid, nedi modoũ bun inenẽf.

<sup>47</sup> “Ferfer taka ã, yogon tamo odug nẽ oroya keleĩ ken, to dodok fef be, yogon odug orof anĩ to dõf age fef, ã fau wõf musei fouf. <sup>48</sup> Anĩ ere, taka ã to keleĩ ken, darau yaleya nẽ anĩ age fef, ã musei to wõ fouf. Aib taka ã musei ifenen, ã bun musei yaleya nigin irokenẽf, agef fen, taka ã lo fouf nigin musei biya ifenen, ã bun musei biya yalouf nigin to fiyẽf.

*Jesus Maur Gudū Fiya Nigin To Isin, Isoreya Nigin*

*(Matyu 10:34-36)*

<sup>49</sup> “Aya tenebur yã arou asiyouf nigin asin, yã mala kaur mogom are, aya orou bagai fiyam. <sup>50</sup> Anĩ ere, aya naan igũya taka fau alouf, anĩ nigin, aya wau fatuk morok ile, anĩ kisi falauf. <sup>51</sup> ã kisi gef, aya tenebur ein maur gudū fiya arou asiyouf nigin asin de? Sã bagai, aya ã arokeneik, isoreya nigin asin. <sup>52</sup> Gama ilauf bun, ibor tekelei bun, idi faif fara de fen, towom uru kiwai difenēdi di, urum towo kiwai difenēdiyof. <sup>53</sup> Idi fara de fen, tamam kesu kiwai ifenē di, kesum tama kiwai ifenēf, sina, ne barai kiwai ifenē di, ne barai sina kiwai ifenēf, sina yanawau kiwai ifenē di, yanawau kayau sina kiwai ifenēf.”

*Sain Nigin Es Fiya*

*(Matyu 16:2, 3)*

<sup>54</sup> Jesus tamo kayau musei irokenēdin, “Sain ã gaa ileyen budū fã ye di, uleg fen, ã kaisã bagai urōgedig, ‘Uyē isiyouf,’ ago ge di, age fedig. <sup>55</sup> Takag, yau karag maaĩ ubunem fũ fef, ã urōgedig, ‘Uruwa dō fadauf,’ are agef wō yedig. <sup>56</sup> ã mala yaleya tamo! Teneub saa ado suma dinof anĩ uleg fen, es gouf nigin ã keleĩ. Naig fe di, sain enei nē suma es fiya nigin ã to keleik de? <sup>57</sup> “Ere nigin ã aug ereb biya anĩg to es gedig? <sup>58</sup> Õ ogon kiwai ado medistret bun uleg fen, naab luwen ogon kiwai ado od madur wouf, to agouf are, ã ã yale, es fiya tamo bun inenōf, age fe di, es fiya tamo ã polis bun inenō di, polis ã kalabus

bun inenõf. <sup>59</sup> Aya õ arokonok, õ wareg ganan to unolauf are, õ kalabus bun to kutũ wesiyouf.”

## 13

### *Wauĩ Falei Gouf, Sãf, Inanakalauf*

<sup>1</sup> Sain anĩ bun, tunĩ an difaren anidim, Pailat Galili temeleid tunĩ neid naudeid ado dogo neid sesewi fiya nẽ safina ekul fen anĩ, Jesus diroke-nen. <sup>2</sup> Jesus solof iron, “Ã kisi gef, Galili temeleid eneidi age de darau dalen nigin, idi neid mosor Galili temeleid ganan neid mosor wal fiya de? <sup>3</sup> Aya ã arokeneik, sã bagai! Anĩ ere, ã wauĩ to falei gouf are, ãg ganan inanakalauf. <sup>4</sup> Takag, Siloam fõ meluk tamo kayau bun kubũ ye fen, idi eitín idenkesin. Ã kisi gef, idi neid mosor, tamo kayau ganan Jerusalem taun difaref neid mosor wal fiya de? <sup>5</sup> Aya ã arokeneik, sã bagai! Anĩ ere, ã wauĩ to falei youf are, ãg ganan inanakalauf.”

<sup>6</sup> Age ye fen, Jesus yaab od enei iron, “Tamo taka, aa fig tekelei yogon wain kabier itenen, anĩ ã ile, faat nigin mala itoton, anĩ ere, taka to ilen. <sup>7</sup> Anĩ nigin, ã wain kabĩ lo fiya tamo irokenen, ‘Yar towo aya asi, aa fig enei bun faat nigin malau atoton, anĩ ere, taka to ailen. Utu urã! Ere nigin teneub gígiru yakasif?’

<sup>8</sup> “Kabĩ lo fiya tamo solof iron, ‘Odug, baban yar tekelei utorkana len, aya gariyan ku kalĩ afel, yaro te anouf. <sup>9</sup> Yar taka bun biyauuf, are deuf! Sãf are, utu urã.’”

*Jesus, Kayau Taka Bagiya Fe Fesen, Sabat Naa Bun El Fiyen*

<sup>10</sup> Sabat naa taka bun, Jesus Juda neid uub fõ taka bun od ifelnēdin. <sup>11</sup> Kayau taka, yar eitín kaa sanem irounen nigin dagi ado, an ibodon. Kayau ì bagiya fe fesen, agef fen, ì madur ifareya kisi feleya sã bagai. <sup>12</sup> Sain Jesus kayau anĩ lof fen, ì wagen iweigne ken, ì irokenen, “Kayau, õ ogon dagi bun tamal õ karika afonok.” <sup>13</sup> Age ye fen, Jesus ì bun ima ino di, kaisã bagai kayau ì madur le ifar fen, Negur yana yalesen.

<sup>14</sup> Juda neid uub fõ nẽ mudur, Jesus Sabat naa bun dagi el fiyen nigin, name sane fen, tamo kayau irokenēdin, “Kabĩ yaleya nigin naa sigis ado. Anĩ nigin, naa anidi bun usig el yeĩf, Sabat naa bun sã.”

<sup>15</sup> Odug ì irokenen, “Ã, mala yaleya tamo! Ã mugu mugu Sabat naa bun, āgenei bulmakau be, donki be difaredig modoũ bun tamal birug fen, naan ifenēdiya nigin to gurig ulegedig de?” <sup>16</sup> Kayau enei, ì Abraham nẽ barai, ì Satanem sain meluk yar eitín ifokelnen, ì ifõya anĩ bun tamal Sabat naa bun to karika afenēf de?”

<sup>17</sup> Jesus od enei wogõ ye di, yogon kiwai tar ganan mama fedin, anĩ ere, Jesus ereb ereb biya bagai age fen ganan nigin, tamo kayau musei ganan waud al fen.

*Masted Faat Yis Ado Nẽ Yaab Od*  
(*Matyu 13:31-33; Mak 4:30-32*)

<sup>18</sup> Anĩ nigin, Jesus to fen, “Negur nẽ tano anĩ, ere taka gen? Ere bun aya kisi afe di, susu falauf?”

<sup>19</sup> Are masted faat gen, anĩ tamo takam yale fen, yogon kabier itenen. Anĩ odug fen, aa wõ ye di, ninã ilun temeleid disi, were bun dibodadan.”

<sup>20</sup> Baban ï to fen, “Negur nē tano anī, ere taka bun aya kisi afe di, susu falauf? <sup>21</sup> Are yis gen, anī kayau takam yale fen, flawa odug ado falei fe di, ganan gē yen.”

*Bobog Kidō*  
(*Matyu 7:13, 14, 21-23*)

<sup>22</sup> Jesus Jerusalem taun ilauf nigin naab luwen iyok ile fen, taun ado fonō fonō ile, od ifelnēdin. <sup>23</sup> Takam Jesus to fiyen, “Odug, are teke tekelei dogol kel yalediyof de?”

Jesus idi irokenēdin, <sup>24</sup> “Bobog kidō anī ileyā nigin kabī total walogouf, ere nigin, aya ā aro-keneik, musei idi namen dilauf nigin age difouf, anī ere, to kisi falauf. <sup>25</sup> Sain fō marau fā ye fen, sukar inolalauf, ā serē ufareg fen, godu godu ge ugonēgouf, ‘Odug, sukar kā wanamāf.’

“Anī ere, ï solof irōf, ‘Aya ā keleī sā, ā nainenem usigen.’

<sup>26</sup> “Age ye di, ā urōgouf, ‘Amā ō geid saaf naan ado ton, ago fen, ō nemā naab bun od ufelnamak uyon.’

<sup>27</sup> “Anī ere, ï solof irōf, ‘Aya ā keleī sā, ā nainenem usigen. Ā sane ago gedig ganān, aya malau bun uyaleleg!’

<sup>28</sup> “Sain Abraham, Isak, Jakop, profet ganān geid, Negur nē tano bun uledig fen, ā aug mayarē irarāyeif, an inā wifirig fen, goboreī kikokō youf.

<sup>29</sup> Tamo kayau gaa iseyan temeleid, gaa ileyān temeleid, yat temeleid, fa temeleid disi, Negur nē tanon tar bun idi neid modoū dalouf. <sup>30</sup> Momoj, an idi dumen dibodok fau malabag dibodōf, idi malabag dibodok fau dumen dibodōf.”

*Jesus Jerusalem Nigin Wau Gudū Fen  
(Matyu 23:37-39)*

<sup>31</sup> Sain anī bun, Farisia tamo tunī Jesus garan disi dirokenen, “Modoū enei utor ken, taka bun ule. King Herod ī ō inokesiyou fenē.”

<sup>32</sup> Jesus solof iron, “Uleg, gaū kuī anī urokenēg, ‘Gama ado nil, aya kaa sesen aruid fen, tamo kayau el afediyouf, age afe fen, naa towo bun, aya neu kabī anī uyu katō afalauf.’ <sup>33</sup> Anī ere, aya gama, nil, arā toko tokō afouf, momoi bagai profet taka Jerusalem taun to ito ken, firen laa fouf!

<sup>34</sup> “O Jerusalem, Jerusalem, ō profet udenkeis fen, ō bun sur fedig anidi, meein meein wedidig, sain ganī aya ō wau afon ken, ogon gerē tar kuru afediyouf nigin age afedig, tataro sina momou waye farumen kuru fedig gen, anī ere, ō utorōdig!

<sup>35</sup> Ulegouf, āgenei fō ā bun fonou lef. Aya ā arokeneik, ā aya baban to uleyagauf ile, ā fau urōgouf, ‘Odug yana bunem isif ī el fiya ado.’\* Sain anī bun, ā aya uleyagauf.”

## 14

*Jesus Farisia Tamo Taka Nē Fō Bun*

<sup>1</sup> Sabat naa taka bun, Jesus, Farisia tamo uyu irouya taka nē fō bun, saaf yōya nigin ilen, idi an Jesus ololo difen. <sup>2</sup> Jesus wagen an, tamo taka bou didīya nigin darau yaledig anī ibodon. <sup>3</sup> Jesus, Farisia tamo, lo keleī tamo geid to fedin, “Sabat naa bun, dagi el fediya anī lo dō fiya de, sã?” <sup>4</sup> Anī ere, idi mutū difaren. Anī nigin, Jesus tamo anī yale, el fiye kel sur fiyē di, ilen.

\* **13:35:** Sam 118:26



<sup>5</sup> Agef fen, ï idi to difen, “Ã taka, Sabat naa bun, kesu be, bulmakau be taka kuren isilauf, ã kaisã bagai to dï wasagauf de?” <sup>6</sup> Age ye di, idi od solof irôya kisi feleya sã.

<sup>7</sup> Jesus, tamo tebol bun modoũ malabag anï gei dife di, ile fen, ï idi yaab od enei irokenëdin, <sup>8</sup> “Tamo kayau ado bagu fiya nẽ tar bun, aib ò iweignõf are, modoũ malabag anï to walouf, ere nigin, tamo taka ò wal yôya iweignen be. <sup>9</sup> Age foug are, ã uru iweigneim marau isi, ò irokonõf, ‘Ogon modoũ anï, tamo enei wenẽ.’ Age ye di, ò mama yo ken, modoũ dumen bagai anï walouf. <sup>10</sup> Anï ere, ò iweignõf are, modoũ dumen anï walouf, ago di, iweignom marau isiyouf, ï ò irokonõf, ‘Mou, modoũ biya bun godo urou usel.’ Age fe di, ò modoũ malabag anï wale di, ã iweigneim turã tar ganan meleid bun ò yanã odug adouf. <sup>11</sup> Ere nigin, aib taka yogo yana yalesef, fau lai fesilauf, aib taka ï yogo yana lai fesilef, Negur ï yana yalesauf.”

<sup>12</sup> Age ye fen, Jesus fõ marau irokenen, “Sain ò gaa atun saaf be, bõ saaf wenëdiyof fenẽ, ogon mou tar, naud turã tar, sirag tar be, nẽ tâ tar safina inid adodo to uweignëdiyof, agouf, idi aba diweignõf, anï bun ò mala solo difonõf. <sup>13</sup> Anï ere, sain ò tar unouf, maleg, bouweid sesen, yeid kirorôya, meleid ifofakeleya anï uweignëdiyof, <sup>14</sup> agouf, Negur ò el yõf. Idi aba ò ke de difonôya kisi feleya sã, anï ere, madur tamo neid mata kel fãya bun, Negur ò mala solo ifonõf.”

*Tar Odug Nẽ Yaab Od*  
(Matyu 22:1-10)

15 Tamo tebol bun weim dibodon anidi takam, od enei karĩ ye fen, ĩ Jesus irokenen, “Negur nē tanon tar bun tamo saaf yāf anĩ, ĩ el fiya ado.”

16 Jesus solof iron, “Tamo taka tar odug dodok fe fen, musei iweignēdin. 17 Tar sain bun, ĩ iweignēdin anidi irokenēdiyof nigin yogon ferfer sur fen, ‘Usig, gama ereb ereb ganan dodok felel.’

18 “Anĩ ere, idi ganan de tekelei gen galā od dinon. Uyulil ĩ iron, ‘Aya gama bagai kabĩ na alen, anĩ nigin, aya anĩ ailau fenē alauf. O malalon ado, aya to asiyouf.’

19 “Taka iron, ‘Aya bulmakau ten na alen, anĩ idi naig fiya anĩ ailau fenē elef. O malalon ado, aya to asiyouf.’

20 “Takag iron, ‘Aya gama bagai kayau mata alen nigin, aya isiya kisi feleya sã.’

21 “Ferfer kel ile, ne odug od enei irokenen. Age fe di, fõ marau name sane fen, yogon ferfer irokenen, ‘Kaisã bagai ule, taun nē naab odug, naab nanaal ado dõ wo fen, maleg, bouweid sesen, meleid ifofakeleya, yeid kirorõya anidi guri urou usi.’

22 “Ferfer iron, ‘Odug, õ urom are mogo age afel, anĩ ere, modoũ fau lolokã.’

23 “Age ye di, odug yogon ferfer irokenen, ‘Naab uyok ule fen, fonõ fonõ naabur tamo kayau idi anĩ disiyouf nigin total bagai urokenēdi di, disiyouf, neu fõ isokosauf. 24 Aya ã arokeneik, aya tamo idi aweignēdin anidi taka, neu tar bun saaf bagai to kobũ de dilouf.’ ”

*Kisi Es Wo Fen, Jesus Dõ Wouf  
(Matyu 10:37, 38)*

<sup>25</sup> Tamo kayau musei, Jesus weim dile fen, ï falei yel, idi irokenēdin, <sup>26</sup> “Taka ï aya gein isif, ne tama, sina, ne kayau, kesu tar, ne tura tar, main tar, yogon matag to itorōf are, ï neu dō fiya tamo wō youf nigin kisi feleya sã. <sup>27</sup> Takag, taka ï yogon aa tetek to faali fe fen, aya dō fiyaf, ï neu dō fiya tamo wō youf nigin kisi feleya sã.

<sup>28</sup> “Ã taka, fō meluk taka inoya nigin orouf are, ï tetun ibod ken, fō inolauf nigin moni kisi feleya ado be anĩ es foug, age fiya sã de? <sup>29</sup> Ere nigin, ï fō gariya ino mã, inoleya to kisi falauf are, tamo kayau ganan anĩ dile fen, kasã difiye ken, <sup>30</sup> dirōf, “Tamo enei fō kare fen, anĩ ere, inoleya kisi feleya sã.’

<sup>31</sup> “Takag, king taka, king taka ado kusĩ douf nigin, ï ten tausen kusĩ tamo adom, king taka tuwenti tausen kusĩ tamo ado kusĩ disif anĩ, kusĩ bun wal fiyēya kisi feleya be sã be anĩ, tetun ibod ken, es foug, age fiya sã de? <sup>32</sup> ï to kisi falauf are, ï king taka fau gerō ifar mog, wowor fiya tamo sur fedi di, idi komo fiya nigin to difiyēf. <sup>33</sup> Age fiya gen bagai, ã taka ï, ereb ereb ganan ï ado anĩ to itorōf are, ï neu dō fiya tamo wō youf nigin kisi feleya sã.

<sup>34</sup> “Anĩ nigin, sol ï biya, anĩ ere, in kai sa kalauf are, naig fe di, ï baban kai youf? <sup>35</sup> Sol age fiya are, teneub ado falei fiya nigin ado, gaar te ado falei fiya nigned to biya, anĩ nigin dirailedig.

“Aib ï karīya nigin weder ado, utornē karī youf.”

# 15

## *Sipsip Fõ Yelen Nē Yaab Od* (Matyu 18:12-14)

<sup>1</sup> Takis yaleya tamo, mosor adodo geid ganan, Jesus karĩ difiyēf nigin ĩ non disin. <sup>2</sup> Anĩ ere, Farisia tamo, lo ifelnēdiya tamo geid, nauseir de fen, diron, “Tamo enei, mosor adodo aan fiyeĩd fen, weim saaf doko.”

<sup>3</sup> Age de di, Jesus yaab od enei irokenēdin, <sup>4</sup> “Ã taka wan hundred sipsip ado, anĩ tekelei iminkalauf are, ĩ nainti-nain sipsip yaorin itorneĩd fen, iminkelen anĩ imirek ile fotou fedig, age fiya sã de? <sup>5</sup> Sain ĩ fotou fouf, ĩ wau adod fen, yale, benerin orowa sef, <sup>6</sup> fõ bun ilauf. Agef fen, ĩ ne mou tar ado, ne tã tar gou feid irõf, ‘Ã aya geid kulĩ tauf. Aya neu sipsip fõ yelen anĩ fotou afel.’ <sup>7</sup> Aya ã arokeneik, age fiya gen bagai, mosor ado tamo taka wau falei yef bun, saa ilun kulĩya odug adouf anim, nainti-nain madur tamo baban faleiya nē sã idi nigin kulĩya wal fiya.

## *Silwa Koin Moni Iminkelen Nē Yaab Od*

<sup>8</sup> “Takag, kayau taka silwa koin moni ten ado, anĩ tekelei iminkalauf are, ĩ lam tõf, fõ waĩf fen, el fe imirek ile fotou fouf, age fiya sã de? <sup>9</sup> Sain ĩ fotou fouf, ĩ ne mou tar ado, ne tã tar gou feid irõf, ‘Ã aya geid kulĩ tauf. Aya neu silwa koin moni iminkelen anĩ fotou afel.’ <sup>10</sup> Age fiya gen bagai, aya ã arokeneik, mosor ado tamo taka wau falei yef ĩ nigin, Negur nē engel meleid bun kulĩya odug wõ yef.”

## *Kesu Fõ Yelen Nē Yaab Od*

<sup>11</sup> Jesus tobol fe iron, “Tamo taka kesu uru adon. <sup>12</sup> Ibuyem tama irokenen, ‘Dei, akor neu anĩ fara wana.’ Anĩ nigin, temeid yogon safina idi atun foi fen.

<sup>13</sup> “Anĩ bure fel fen, sain meluk to ilele di, kesu ibuye, safina ã ado ganan kuruf yale irou, teneub taka bun gerõ biya ilen, an in safina tobonunã to biya bun daũ felen. <sup>14</sup> Ñ ereb ereb ganan daũ fele di, teneub anĩ bun naũ odug wõ yen, age fe di, ã bun lau fiya wõ yen. <sup>15</sup> Anĩ nigin, ã ile, fõ morou taka bun kabĩ yalouf nigin to fiyẽ di, fõ moroum ã bor saaf ifenẽdiyof nigin yogon kabier sur fen. <sup>16</sup> Ñ naũ bagai nigin bor saaf dõ di, ãg anĩ yõya nigin orodig, anĩ ere, takam ereb taka to ifenẽdig.

<sup>17</sup> “Ñ kisi kelen sain, ã iron, ‘Neu dei ã kabĩ tamo musei ado, idi saaf barikã. Aya ein naum laa fiyau fenẽ! <sup>18</sup> Aya fã au, neu dei garan kelau fen, ã arokenẽf: Dei, aya saa ilun ado õ bun mosor anon. <sup>19</sup> Aya to biya nigin, neu kesu to wouf, ogon kabĩ tamo oroi waledin taka gen waleyau.’ <sup>20</sup> Anĩ nigin, ã fã ye, tama gein ilen.

“Anĩ ere, ã fau gerõ iyok isi mog, tama ã kesu ile fen, ã nigin wau fatuk yũ di, kesu gein gudu ref ile, kakarai fiye ken, umã fiyen.

<sup>21</sup> “Kesum tama irokenen, ‘Dei, aya saa ilun ado õ bun mosor anon. Aya to biya nigin, neu kesu to wouf.’

<sup>22</sup> “Anĩ ere, tama ã yogon ferfer irokenẽdin, ‘Gamanem kolos biya bagai waleg urousig, ã ufounnẽg, ima gege bun sai unog fen, ye bun su unokenẽg. <sup>23</sup> Bulmakau lubu bou dĩa waleg urousig ukesig. Ada tar tano tokon, sigigi tafouf.

<sup>24</sup> Ere nigin, neu kesu enei laa fen anĩ baban matal, ĩ fõ yelen anĩ baban fotou tafiyem.’ Anĩ nigin, idi gariya dino sigigi difen.

<sup>25</sup> “Sain anĩ bun, kesu matu ĩ kabier ibodon. Dum ĩ iyok isi, fõ kelẽ fiye ken, fõ non kui de gurũ de mog, karĩ yen. <sup>26</sup> Agef fen, ĩ kabĩ tamo taka iweigne ken, to fiyen, ‘Oun ere naig difef?’ <sup>27</sup> Kabĩ tamo ĩ aiten yale iron, “Turã kel isil, anĩ tamã bulmakau lubu bou dĩa yum, ere nigin, tamam ĩ bouwa totoũ biya bagai ado kel yalel.’

<sup>28</sup> “Age ye di, tura matu name sane fen, fõ bun ileyã nigin itoron. Age fe di, tama mayarẽ ile wowor fiyen. <sup>29</sup> Anĩ ere, kesu ĩ tama solof irokenen, ‘Ulefe, yar enei ganã aya õ sigor taka to wal afe fen, arunã alef asin. Anĩ ere, õ aya meme lubu taka wana di, neu mou tar geid to sigigi mafen. <sup>30</sup> Anĩ ere, õ naal enei are, ogon safina, kayau bouweid na nẽ sur difedig anidi bun daũ fel fen, fonõ isi di, õ bulmakau lubu bou dĩa ukenem!’

<sup>31</sup> “Tama iron, ‘Neu kesu, õ aya ado faimud tabodõdig. Safina ganã aya ado, are ogon. <sup>32</sup> Anĩ ere, ada sigigi tafe fen, wauda al fem bagai, ere nigin, turã enei laa fen anĩ baban matal, ĩ fõ yelen anĩ baban fotou tafiyem.’ ”

## 16

### *Kabĩ Tamo Neid Orowa Tobonunã Sane Kisi Biya Ado Nẽ Yaab Od*

<sup>1</sup> Takag, Jesus in dõ fiya tar irokenẽdin, “Safina musei ado tamo taka, ĩ yogon kabĩ tamo neid orowam in safina daũ fef yeya karĩ yen. <sup>2</sup> Anĩ

nigin, ï iweignē ile di, to fiyen, ‘Eï ere od anï ò nigin karï auf? Ogon kabï walen anï faded wo di, karï auf, ere nigin, ò baban kabï tamo neid orowa to ubodōf.’

<sup>3</sup> “Kabï tamo neid orowa yogo nigin iron, ‘Gama aya naig afouf? Neu odug neu kabï yalelkanaf. Aya meku yaleya nigin totolou sã, agef mâng, aya nonïya nigin mama ado. <sup>4</sup> Aya naig be afouf are aya keleï, anï bunem sain aya neu kabï ein atorōf are, tamo kayau neid fō bun ileyã nigin aan difiyauf.’

<sup>5</sup> “Age ye fen, ï, yogon odug bun wareg dalen anidi mugu mugu iweignēdi di, disin. ï tamo uyulil anï to fiyen, ‘Ö neu odug bun wareg ganï walen?’

<sup>6</sup> “Ï aiten yale iron, ‘Eit handred galen aa oliv moul alen.’” Kabï tamo neid orowa ï irokenen, ‘Ogon wareg ditoton wale, kaisã ubod ken, fo handred utot.’

<sup>7</sup> “Age ye di, ï uyulil dō fiyen anï to fiyen, ‘Ba ò wareg ganï walen?’

“Ï solof iron, ‘Wan handred wit bek alen.’

“Kabï tamo neid orowam ï irokenen, ‘Ogon wareg ditoton wale, eiti utot.’

<sup>8</sup> “Yogon odug ï, kabï tamo neid orowa idegēya tamal, ï kisi el fe yale fen, age fen nigin, yana yalesen. Ere nigin, tamo kayau teneub enei bun temeleid kisi el de dale fen, ereb dogo neid nigin tamo kayau lalan bun temeleid wal fediya age difedig. <sup>9</sup> Aya ã arokeneik, teneub enei nē safina bunem ã aug nigin neï mou tar waledigouf, anï bunem, sain safina sa kalauf, mata gai ibodkeleyã bun aan diyeïf.

<sup>10</sup> “Taka ã ereb naal bagai el fe lo fef, odug buneg agef lo fouf, taka ã naal bagai bun idegek, odug buneg idegêf. <sup>11</sup> Anĩ nigin, ã tenebur enei nê safina to el ge lo gen ouf are, aim ã momoi nê safina lo fiya nigin ineneĩf? <sup>12</sup> ã takan nê safina to el ge kulatun gen ouf are, aim anĩ ã safineĩ ifeneĩf?

<sup>13</sup> “Kabĩ tamo takam odug uru bun to kabĩ yalouf. Taka nigin to wau yen ken, taka nigin wau laa fouf be, taka anĩ aruna yale fen, taka anĩ to awa yãf. ã Negur nigin ado moni nigin aruna yaleya kisi feleya sã.”

<sup>14</sup> Farisia tamo moni nigin waud laa fedig anĩ, od enei ganan karĩ de fen, Jesus kasã difiyen. <sup>15</sup> Age dife di, Jesus idi irokenēdin, “ã bagai anĩ, tamo meleid bun, ã aug nigin biya age mafef gedig, anĩ ere, Negur ã wauĩ keleĩ bagai. Tamo ereb nigin waud fatuk difenek, are Negur mala bun ninir bagai.”

### *Ifelnēdiya Od Tobol Fiya*

<sup>16</sup> “Lo nê od ado, profet neid od wogõ def disi, Jon bun daun. Sain anĩ bunem, Negur nê tano nigin biya od wogõ def disif, age fe di, ganan namen ileyã nigin mugu mugu teĩbir def. <sup>17</sup> Saa teneub ado iminkeleyã nigin are karika, anĩ ere, Lo bun itotoya togo fiya naal bagai taka to iminkalauf.

<sup>18</sup> “Taka ã aiwa iru fen, kayau taka yalouf are, ã seseirã inof, taka ã kayau tamo takam irun anĩ yalouf are, ã seseirã inof.

### *Safina Musei Tamo Ado Lasarus*



19 “Safina musei ado tamo taka, naa ganan bun kolos naki biya, saaf biya, ibodōya biya ibodōdig. 20 Maleg taka yana Lasarus, gurumam barikā, safina musei ado tamo ne bobogē yenēdig. 21 Agef fen, ĩ, safina musei ado tamo nē tebol bunem kuku ref anī yāf nigin orodig. Gaũg disi, guruma seum difedig.

22 “Dum maleg tamo laa fe di, engelem Abraham wagen dirou diselen. Safina musei ado tamog laa fe di, mū difen. 23 Laa neid modoũ bun, safina musei ado tamo darau odug yale fen, ĩ gerō mala irakel, Lasarus Abraham wagen ibod mog, ilen. 24 Agef fen, ĩ Abraham iweigne ken, iron, ‘Dei Abraham, aya nigin waũ ino ken, Lasarus sur wiyē di, ima gege uyum naan kobũf fen, ırousi baleu felu kouf, ere nigin, aya yā enei bun darau odug alef.’

25 “Anī ere, Abraham aiten yale iron, ‘Kesu, õ mata ubodon sain, õ ereb ereb biya wale mog, Lasarus ĩ ereb ereb to biya yalen, anī karĩ wo, anī ere, gama ein ĩ wau wã fe di, õ darau odug bun ubodok. 26 Takag, enei ganan teten, amã ã geid atun meku odug inon, anī bunem, idi ein tamal ã gein isiya nigin kisi feleya sã, takam an tamal amã gein ibal isiya nigineg kisi feleya sã.’

27 “Ĩ aiten yale iron, ‘Age fiyauf are, Dei, aya õ agonok, neu dei nē fõ bun Lasarus sur wiyē di, isilauf, 28 ere nigin, aya turau tar faif dibodok. Utorneĩ len, wedereid irouwauf, age fe di, idig darau odug nē modoũ enei bun to disiyouf.’

29 “Abraham solof iron, ‘Idi Moses nē itotoya ado profet neid itotoya ado, utorneĩd len, idi anıdı

bun wedereid dinouf.’

<sup>30</sup> “Ī iron, ‘Age fiya sã, Dei Abraham, laa bun tamal takam idi bun isilauf are, idi waud falei youf.’

<sup>31</sup> “Anĩ ere, Abraham tamo anĩ irokenen, ‘Idi Moses nẽ od ado profet neid od nigin to wedereid dinouf are, laa bun tamal takam fã ye fen, idi irokenẽdiyofeg to karĩ douf.’ ”

## 17

### *Jesus Mosor Ado Momoiya Nigin Ifelnẽdin (Matyu 18:6, 7, 21, 22; Mak 9:42)*

<sup>1</sup> Jesus in dõ fiya tar irokenẽdin, “Ereb ererb tamo mosor bun inenẽdiyof anĩ isiyof bagai, anĩ ere, tamo nanĩ be bunem isif, ĩ malalon ado. <sup>2</sup>Taka ĩ nanaal enidi taka mosor bun inenẽya ban, ĩ meein odug guyutu bun ifo ken, maaĩwõ irãya nigin biya bagai. <sup>3</sup>Anĩ nigin, ã lo welegei. “Õ turã mosor inouf, ou wiyẽf, anĩ ĩ falei youf are, õ in mosor nigin wederẽ tu kel. <sup>4</sup>Ī naa tekelei bun, õ bun mosor ino sewen fouf, ĩ õ gein isi, sewen fe irõf, ‘Aya awaul,’ õ in mosor nigin wederẽ tu kel.”

<sup>5</sup> Aposel idi Odug dirokenen, “Nemã momoiya odug wouf!”

<sup>6</sup> Jesus solof iron, “Ã momoiya naal, masted faat gen adouf are, aa enei urokenẽgouf, ‘Kusu wale, usil maaĩwõ ufarauf,’ ago ge di, ã sigoreĩ dõ fouf.

<sup>7</sup> “Ã taka, yogon ferfer kabier teneub yũf be, sipsip lof fen, kabierem isi mog, ne maraum tau, ‘Kaisã bagai saaf yõya nigin usi ubod,’ fiyẽf de? <sup>8</sup>Age fiya ban, ĩ eig youf, ‘Neu saaf dodok wol fen, õ naki wol, arunau wale, akas bure afele di, gama

õ saaf ado naan wāf.’ <sup>9</sup> Ī irokenē di, dōf age fen nigin, maraum ferfer tau de wiyal fiyēf de? <sup>10</sup> Anī nigin, ã ereb ereb irokeneik anī ganān dōg, ago weleg fen, āg eig ge urōgouf, ‘Amā ferfer to biya, amā nemā kabī anī dogol malel.’ ”

### *Jesus Tamo Ten Lepra Dagi Adodo El Fedin*

<sup>11</sup> Jesus Jerusalem ileya nigin, Samaria ado Galili distrik daū atu iyok ilen. <sup>12</sup> Ī fonō taka bun ile mog, tamo ten lepra dāgi adodo, ĩ fotou difiyen. Idi gerom difar fen, <sup>13</sup> aiteid odug nem diweig diron, “Jesus, Odug, amā nigin malalon yō!”

<sup>14</sup> Sain ĩ idi ileid fen, iron, “Uleg, aug bouweĩ pris ufelnēdigouf.” Age ye di, idi dīle mog, bouweid biya len.

<sup>15</sup> Idi neid taka bouwa biya len anī ile fen, kel isi, ait odugem Negur yana yalesen. <sup>16</sup> Jesus ye gariyan kubū ye yen ken, de wiyal fiyen, ĩ Samaria tamal.

<sup>17</sup> Age fe di, Jesus to fen, “Ten ganān to biya ledin de? Tamo nain idi nain difaref? <sup>18</sup> Takam to kel isi, Negur yana yalesel, yaū enei dogol de?” <sup>19</sup> Jesus age ye fen, ĩ irokenen, “Fā wale fen, ule, ogon momoiyam õ el yom.”

### *Jesus Negur Nē Tano Nigin Wogō Yen*

*(Matyu 24:23-28, 37-41)*

<sup>20</sup> Sain taka, Farisia tamom, Negur nē tano ere sain isiyouf nigin Jesus to difiyē di, Jesus solof iron, “Negur nē tano, malam ileya kisi feleya sã bunem isidig, <sup>21</sup> tamo to ‘Eĩ yeir,’ be, ‘Your oun,’ be douf, ere nigin, Negur nē tano are ã atun ibodok.”

<sup>22</sup> Age ye fen, Jesus yogon dō fiya tar irokenēdin, “Sain isi di, Tamo Naal nē naa taka ileya nigin oroyeĩf, anĩ ere, ã anĩ to ulogouf. <sup>23</sup> Tamom dirokeneĩf, ‘Í your!’ be, ‘Í yeir!’ douf. ã, to uleg, idi to dō wedig. <sup>24</sup> Ere nigin, Tamo Naal, yogon naa bun, kolimei filiya lalan saa gariyanem irou, idikeleyan isiledig gen. <sup>25</sup> Anĩ ere, uruwa ĩ darau musei yale di, tamo kayau sain enei bun dibodok anidi ĩ dudum difiyēf.

<sup>26</sup> “Noa nē sain bun age fen gen, age fiya bagai Tamo Naal nē sain buneg age fouf. <sup>27</sup> Tamo kayau saafei de fen, naanuei den, tamo kayau yalef, kayau tamo difenek difen, age de dile mog, Noa waag namen ilen. Agef mog, kuwei isi fen, idi ganan daũ fedin.

<sup>28</sup> “Lot nē sain buneg de age difen, tamo kayau saafem, naanem difen, na dalef, na sur difef, saaf diten, fō dino mog, difen. <sup>29</sup> Anĩ ere, naa Lot Sodom taun itor ilen bun, yã ado meein salfa, saa bunem uyē gen kukur fen, idi ganan daũ fedin.

<sup>30</sup> “Age fiya gen bagai, Tamo Naal yaorouf nē naa bun, agef wō youf. <sup>31</sup> Naa anĩ bun, taka ĩ yogon fō agaran ibod mog, in safina namen ibodok anĩ yalouf nigin to kel isilauf. Age fiya bagai, taka ĩ kabier ibodok, yogon safina yalouf nigin to kel ilauf. <sup>32</sup> Lot nē kayau bun kisi gouf! <sup>33</sup> Taka ĩ yogon mata yalouf nigin kisi fouf, ĩ mata anĩ fō yalauf. Taka ĩ yogon mata anĩ itorōf are, ĩ yogon mata irou kafĩ falauf. <sup>34</sup> Aya ã arokeneik, bō anĩ bun, tamo uru idi fatar tekelei bun denēf, tekelei yalouf, taka itornēf. <sup>35</sup> Kayau uru idi wit

ditutu mog, tekelei yalouf, taka itornēf.”\* 37 Idi to difen, “Odug, õ urok anĩ nain wõ youf?” Jesus idi irokenēdin, “Nain be laa yenek nē an, tum guru difouf.”

## 18

### *Kayau Waab Tuwa To Yu Kelen Nē Yaab Od*

<sup>1</sup> Age ye fen, Jesus, in dō fiya tar idi faimud kosēya nigin tuweid to yūf anĩ ifelnēdiyof nigin, yaab od taka irokenēdin. <sup>2</sup> Ī iron, “Taun taka bun, es fiya tamo taka ibodon, ĩ Negur to kumĩ fiyēdig, tamog to iwesnēdig. <sup>3</sup> Taun anĩ bun an, kayau waab taka ibodon, ĩ es fiya tamo bun toku kel fen, yogon kiwai mala solo ifenēf nigin irokenēyai yedig.

<sup>4</sup> “Es fiya tamo ĩ kaisā to karĩ fiyen, anĩ ere, dum ĩ yogo nigin iron, ‘Aya Negur to kumĩ afiyek, tamog to awesnēdif, <sup>5</sup> anĩ ere, kayau waab enei toku morõ ifanaf nigin, in morõ anĩ ail fen, kayau ĩ irok anĩ age afouf, anĩ bunem ĩ to kel fen, morõ ifanauf!’ ”

<sup>6</sup> Jesus age ye fen, iron, “Es fiya tamo sane, erēb ĩ iron anĩ karīg. <sup>7</sup> Negur yogon igirnēdin anidi, bõ ado gaa ado diweig dirokenēdig nigin, ĩ lo nē madur fiya to ifenēdiyof de? Ī sain meluk to karĩ fiyēdiyof de? <sup>8</sup> Aya ā arokeneik, ĩ kaisā bagai lo nē madur fiya ifenēdiyof. Anĩ ere, Tamo Naal isiyof sain bun, tenebur ein ĩ momoiya fotou fouf de?”

---

\* **17:35:** Itotoya tunĩ eig de ditoton: itornēf. 36 Tamo uru idi kabier difarauf, tekelei yalouf, taka itornēf.

*Farisia Tamo Taka, Takis Yaleyta Tamo Ado Nē Yaab Od*

<sup>9</sup> Tunī idi dogo nigin amā madur bagai de fen, tunī meleid irim lai difedidig anidi bun, Jesus yaab od eneig irokenēdin, <sup>10</sup> “Tamo uru tempel bun kosē douf nigin diselen, taka Farisia tamo, taka takis yaleyta tamo. <sup>11</sup> Farisia tamo ifar fen, yogo nigin kosē yen, ‘Negur ō de ayok, aya tamo tunī gen sã, bē diledig, sane age difedig, seseirã dinodig, takis yaleyta tamo enei geneg sã. <sup>12</sup> Aya uub tekelei bun naa uru kuri au fen, ereb ereb ganan aya alef anī, ten teke tekelei ō afonōdig.’

<sup>13</sup> “Anī ere, takis yaleyta tamo ã so rel ifaren. ã saa iluneg to itad fen, anī ere, ã akor yu ken, iron, ‘Negur, aya nigin waũ inōf, aya mosor temelou.’

<sup>14</sup> “Aya ã arokeneik, Farisia tamo anī sã, takis yaleyta tamo enei, Negur mala bun ã madur fen, fō bun ilen. Ere nigin, taka ã yogo yana yalesef, Negur ã yana lai fouf, taka ã yogo yana lai fef, Negur ã yana yalesauf.”

*Kesu Nanaal Jesus Geid*

*(Matyu 19:13-15; Mak 10:13-16)*

<sup>15</sup> Takag, tamo kayau, Jesus kesu momoug kobũ fediyouf nigin ã wagen guri difeid disin. Age dife di, in dō fiya tar anī dile fen, idi ou difiyēdin. <sup>16</sup> Anī ere, Jesus kesu ã wagen iweigneid fen, iron, “Uturnēdig len, kesu nanaal aya wageun disiyouf, idi to katũ wedig, ere nigin, Negur nē tano are eig fediya neid. <sup>17</sup> Aya ã momoi arokeneik, aib taka ã, Negur nē tano, kesu naal age fiya gen to yalouf are, ã Negur nē tanon to bagai ilauf.”

*Uyu Irouya Tamo Safina Musei Ado  
(Matyu 19:16-30; Mak 10:17-31)*

<sup>18</sup> Uyu irouya tamo taka Jesus to fiyen, “Tise biya, aya ere naig afe fen, mata faimud ibodkeleya alouf?”

<sup>19</sup> Jesus ã irokenen, “Ere nigin õ aya anĩ biya wiyaf? Aibem taka biya sã, Negur yogo dogol.  
<sup>20</sup> Õ ãtãfiya keleĩ: ‘Õ seseirã to unouf, õ tamo taka to ukesiyouf, õ to bẽ walouf, õ taka nigin idegẽya od to urõf, sinã tamã yeneid walesauf.’\*”

<sup>21</sup> Age ye di, ã iron, “Enei ganan aya kesu naalun dõ afef asin.”

<sup>22</sup> Jesus enei karĩ ye fen, ã irokenen, “Õ fau tekelei anĩ inĩ sã. Ogon safina ganan na nigin sur wo fen, maleg tamo weneĩd, agouf anĩ õ saa ilun safina biya adouf. Ago wol fen, usi, aya dõ wiya.”

<sup>23</sup> Anĩ ere, ã od enei karĩ ye fen, wau fatuk gudũ fen, ere nigin, ã safina musei biya ado. <sup>24</sup> Jesus ã lege fiye ken, iron, “Safina musei adodo tamo, Negur nẽ tano bun ileyã nigin, gai malai bagai!  
<sup>25</sup> Momoi, kamel ã, gabar iwayã nẽ nil ku bun ileyã nigin, karika bagai, safina musei ado tamo, Negur nẽ tano bun ileyã nigin, malai bagai.”

<sup>26</sup> Idi od anĩ karĩ de fen, to difen, “Age fiyauf are, aim anĩ mata ibodkeleyã anĩ yaleya nigin kisi feleyã?”

<sup>27</sup> Anĩ ere, Jesus solof iron, “Ereb tamom age fiya nigin kisi feleyã sã anĩ, Negur age fiya nigin kisi feleyã.”

<sup>28</sup> Pita Jesus irokenen, “Ulef, amã õ dõ mayõf nigin, ereb ereb ganan amã ado anĩ matoron!”

---

\* **18:20:** Eksodas 20:12-16; Diuteronomi 5:16-20

<sup>29</sup> Age ye di, Jesus idi irokenēdin, “Aya ã momoi arokenēik, aib taka fō, kayau, tura tar, sina tama tar be, gere tar, Negur nē tano nigin itoron, <sup>30</sup> ĩ mala solo musei bagai sain enĩ bun yalouf, ĩ dumen isiyouf buneg mata faimud ibodkeleya yalouf.”

*Jesus In Laa Nigin Irō, Towo Fen*  
(*Matyu 20:17-19; Mak 10:32-34*)

<sup>31</sup> Age ye fen, Jesus, in dō fiya tar tuwelf firen geif iroule irokenēdin, “Ulegēf, ada Jerusalem teselef, erēb erēb ganān Tamo Naal nigin profet ditoton anĩ, fau kisi falauf. <sup>32</sup> ĩ fau haiden Israel sã anidi imeid bun ilauf. Idi ĩ fau diselinēf, kono difiyēf, disisnēf, wagĩ difiye ken, dukesiyouf. <sup>33</sup> Naa towo bun, ĩ fau baban mata kel fã youf.”

<sup>34</sup> Anĩ ere, dō fiya tar, enei ganān taka to kelein. Od anĩ nē gariya idi bun iminen, agef fen, idi ĩ erēb nigin irok anĩ to kelein.

*Maleg Tamo Mala Ifofakeleya Anĩ Mala Fara Felen*  
(*Matyu 20:29-34; Mak 10:46-52*)

<sup>35</sup> Sain Jesus Jeriko kelē fiyē mog, tamo taka mala ifofakeleya, naab yerin nonĩ yef ibodon. <sup>36</sup> ĩ tamo kayau musei disi dilef ya karĩ ye fen, erēb wō yef anĩ nigin to fedin. <sup>37</sup> Idi ĩ dirokenen, “Jesus Nasaret tamal isi ilef.”

<sup>38</sup> Age de di, ĩ iweig iron, “Jesus, Dawid Naal, aya nigin malalon yō!”

<sup>39</sup> Tamo uyu dilen anidim sakã difiye ken, foro yalauf nigin dirokenen, anĩ ere, ĩ wade bagai iweig iron, “Dawid Naal, aya nigin malalon yō!”



<sup>40</sup> Jesus dē yel fen, tamo ĩ wagen dirou disiyouf nigin irokenēdin. Ĩ isi melsā di, Jesus ĩ to fiyen,  
<sup>41</sup> “Aya ō ere age afonōf ani, ō oroyok?”

Tamo anĩ solof iron, “Odug, aya malau kelē yalau fenē.”

<sup>42</sup> Age ye di, Jesus ĩ irokenen, “Malā fara wol, ogon momoiya anim el yom.” <sup>43</sup> Kaisā bagai, ĩ mala fara fel fen, Jesus dōf, Negur yana yalesen. Tamo kayau ganan anĩ dile fen, idig Negur yana dalesen.

## 19

### *Sakeus, Takis Yaleya Tamo*

<sup>1</sup> Jesus Jeriko taun wō ye fen, atu iyok ilen.

<sup>2</sup> Tamo taka yana Sakeus an ibodon. Ĩ takis yaleya tamo neid mudur, safina musei ado. <sup>3</sup> Ĩ Jesus ĩ ai bagai anĩ ilouf nigin oron, anĩ ere, ĩ tobega tamo nigin ĩ kisi feleya sã, ere nigin, tamo kayau musei dinonolnen. <sup>4</sup> Anĩ nigin, ĩ ket gudu ref ile, Jesus ilouf nigin aa fig ilun sō yen, ere nigin, Jesus naab anĩ dōf, are isi ilauf.

<sup>5</sup> Sain Jesus modoũ anĩ bun ulō yeis fen, mala ilun ira ken, ĩ irokenen, “Sakeus, kaisā bagai kutũ weis. Gama aya ogon fō bun abodōf bagai.” <sup>6</sup> Age ye di, ĩ kaisā kutũ yeis fen, wau sere fiya ado Jesus aan fiyen.

<sup>7</sup> Tamo kayau ganan enei dile fen, kosesē kurā den, “Ĩ mosor ado tamo nē fō bun mogo ilef.”

<sup>8</sup> Anĩ ere, Sakeus ifar fen, Jesus irokenen, “Odug, ulef! Gama yeir aya neu safina atun fara afe fen, sitakā maleg tamo afenēdiyof, aya idegēya bunem tunĩ neid safina alen are, aya idi

mugu mugu mala solo aiwa ifenēya teten ano fen, afenēdiyof.”

<sup>9</sup> Age ye di, Jesus ī irokenen, “Gama kel yaleya anī fō enei bun isil, ere nigin, tamo enī, īg Abraham naal taka. <sup>10</sup> Ere nigin, Tamo Naal fō delen anidi imirneīd fen, kel gei fouf nigin isin.”

*Ferfer Ten Moni Imeid Bun Inon Nē Yaab Od  
(Matyu 25:14-30)*

<sup>11</sup> Idi od enei karī de mog, Jesus tobol fe, yaab od taka irokenēdin, ere nigin, ī mogo Jerusalem melsā ifaref, anī nigin, tamo kayau Negur nē tano kaisā bagai wō youf de fen, kisi difen. <sup>12</sup> Anī nigin, ī iron, “Tamo taka yana odug ado, ī king dinenē di, kel isiyouf nigin fō takā gerō bagai ilen. <sup>13</sup> Anī nigin, ī yogon ferfer ten iweig laisi fen, moni wan tausen kina mugu mugu ifeneīd fen, irokenēdin, ‘Moni enei kabī wenēg mog, aya kelauf.’

<sup>14</sup> “Anī ere, yogon tamo tar kiwai difen ken, eig de dirōf nigin ī dumen arū tamo sur difen, ‘Amā tamo enei nemā king wō youf nigin to oromak.’

<sup>15</sup> “Anī ere, ī king yana yale fen, fonō kel isin. Agef fen, ī, ferfer moni ifenēdin idi moni ado naig de kabī dalen anī ilouf nigin, iweignēdi di, disin.

<sup>16</sup> “Tamo uyu ī isi iron, ‘Odug, aya ogon wan tausen kina bun, ten tausen kina taka alen.’

<sup>17</sup> “Age ye di, yogon odug solof irokenen, ‘Ō ferfer biya, ō de agon! Ō safina naal bagai bun kabī biya walēn nigin, taun ten lo weid.’

<sup>18</sup> “Ī dō fiya taka isi iron, ‘Odug, aya ogon wan tausen kina bun, faif tausen kina taka alen.’

19 “Age ye di, yogon odug ïg irokenen, ‘Õ taun faif lo weid.’

20 “Age fe di, ferfer taka isi iron, ‘Odug, ogon moni yeir. Aya moni anĩ gabar masak nem sile afe fen, anokon. 21 Aya õ nigin kumĩ aun, ere nigin, õ tamo total ado. Õ ereb to unokon anĩ waledig, onom to utenen anĩ kusu wodig.’

22 “Yogon odug ï irokenen, ‘Aya ogon od bunem es ayõf, õ ferfer sane! Õ kelein, aya tamo total ado, ayam to anokon anĩ aledig, ayam to atenen anĩ kusu afedig de? 23 Ere wo fen, neu moni benk bun to unon? Ago wom are, sain aya kelauf bun, moni kabĩ yalen anĩ nẽ mala ado, moni õ benk wenen anĩ bagu fiya kel isin ado alem.’

24 “Age ye fen, odug idi difaren anidi iro-kenẽdin, ‘Yogon moni son ge fen, tamo ten tausen kina ado anĩ wenẽg.’

25 “Age ye di, idi ï dirokenen, ‘Odug, ï mogo ten tausen kina ado!’

26 “Odug solof iron, ‘Aya ã arokeneik, taka ï ado, aya teten anouf, anĩ ere, taka ï sã bagai, ereb taka ï ado areg, ï bun tamal son foug. 27 Anĩ ere, neu kiwai tar, aya nedi king ibodõya nigin to orodin anidi, ein wageun gurig urousig fen, malau bun udenkesig.’ ”

*Jesus Tamo Yana Ado Gen Jerusalem Ilen  
(Matyu 21:1-11; Mak 11:1-11; Jon 12:12-19)*

28 Jesus od enei wogõ yel fen, Jerusalem iseleya nigin, ï ketem uyu iselen. 29 Jesus Moul Arei\* bun Betfage ado Betani fonõ kelẽ fiye ken, in dõ fiya tar uru sur feid irokenẽdin, 30 “Fonõ wageik

\* 19:29: ‘Oliv Arei’ dedig.

anĩ bun uleg, an wõg fen, donki naal difon anĩ ulogouf, are aibem taka anĩ bun to iyon. Anĩ biru weleg fen, ein urou usig. <sup>31</sup> Taka nem to yeif, ‘Ere nigin ã anĩ biru gef?’ urokenẽgouf, ‘Odug anĩ kabĩ ifenẽf nigin.’ ”

<sup>32</sup> Anĩ nigin, uyu sur fedin idi dile, Jesus iro-kenẽdin kilei bagai anĩ fotou difen. <sup>33</sup> Idi donki naal biru de mog, anĩ nẽ marau tamo idi to difiyẽdin, “Ã ere nigin donki naal anĩ biru gef?”

<sup>34</sup> Idi ã solo de dirokenen, “Odug anĩ kabĩ ifenẽf nigin.”

<sup>35</sup> Idi donki naal anĩ Jesus wagen dirousi fen, idi neid gabar teten dirara ken, ã anĩ teten dinenẽ ibodon. <sup>36</sup> Jesus iyok ile mog, tamo kayau idi neid gabar naabur du difedin.

<sup>37</sup> Sain ã iyok isi, naab Moul Arei bunem isileya non, in dõ fiya tar ganan, memelik ganan inodin dilen nigin, waud al fiya ado aiteid odug nem Negur yana dalesen:

<sup>38</sup> “King, Odug yana bunem isif, are ã el fiya ado!”\*

Saa ilun wau inosiya ado, ilun bagai fula fiya medeïya ado!”

<sup>39</sup> Tamo kayau atun, Farisia tamo tunĩ Jesus dirokenen, “Tise, ogon dõ fiya tar sakã wiyeïd!”

<sup>40</sup> Anĩ ere, Jesus solof iron, “Aya ã arokeneik, idi foro dalauf are, meein eneidi diweig dirõf.”

<sup>41</sup> ã Jerusalem kelẽ fiye ken, taun anĩ ile, wau gudũ fe di, inã yale, <sup>42</sup> iron, “Õ Jerusalem naa enei bun, õ nigin erebem waũ inosiya irou isif anĩ õ keleim, are dem, anĩ ere, gama õ malã bun iminek. <sup>43</sup> Sain taka õ bun isiyouf, ogon kiwai

---

\* **19:38:** Sam 118:26

tar, ò bun teneub mudu dino, salili diyokel, afi diyokalauf. <sup>44</sup> Idi ò tenebur dale dirâyōf, ò ado gerē tar ogon kau namen difaref geid. Idi meein taka taka teten ditorō di, to ibodōf, ere nigin, Negur ò bun isin nē naa anī to ulegen nigin.”

### *Jesus Tempel Bun*

*(Matyu 21:12-17; Mak 11:15-19; Jon 2:13-22)*

<sup>45</sup> Jesus tempel modoū bun ile, idi ereb ereb na nigin sur de mog, an irudidin. <sup>46</sup> Agef fen, Jesus idi irokenēdin, “Negur nē Itotoya bun ibodok, ‘Neu fō are, kosēya nē fō ibodōf,’\* anī ere, āgem ‘bē tamo neid iminēya fō’\* unogen.”

<sup>47</sup> Naa ganan Jesus tempel bun ifelnēdidin. Anī ere, pris odudug, lo ifelnēdiya tamo, tamo kayau neid mudur adodo geid, Jesus dukesiyouf nigin naab dimiren. <sup>48</sup> Anī ere, idi age difouf nigin naab taka to dilen, ere nigin, tamo kayau ganan in od anī diroun.

## 20

### *Jesus Aim Igirnen Anī To Difyen*

*(Matyu 21:23-27; Mak 11:27-33)*

<sup>1</sup> Naa taka bun, Jesus tempel bun tamo kayau ifelneīd fen, biya od wogō yen. Agef mog, pris odudug, lo ifelnēdiya tamo, mudur adodo geid, ī gein disin. <sup>2</sup> Idi diron, “Aim ò igirnō di, ò ereb ereb enī ago wof anī urokanamā. Aim ò igirnon?”

<sup>3</sup> Jesus aitedin yale iron, “Ayag to fiya taka afeneīf. Solog urokanag, <sup>4</sup> Jon naan igunēdin are saa ilun tamal de, tamo bunem?”

---

\* **19:46:** Asaia 56:7      \* **19:46:** Jeremaia 7:11

<sup>5</sup> Idi dogo dogol katõ de fen, diron, “Ada, ‘Saa ilun tamal,’ tauf are, ã to fouf, ‘Ere nigin ã ã nigin to momoi wiyëgen?’ <sup>6</sup> Anĩ ere, ada, ‘Tamo bunem,’ tauf are, tamo kayau ganan meeinem dinadauf, ere nigin, idi Jon ã profet den.”

<sup>7</sup> Anĩ nigin, idi solo de diron, “Ï nain be tamal are amã keleĩ sã.”

<sup>8</sup> Age de di, Jesus iron, “Ayag ã to arokeneif, aim aya igrina di, aya ereb ereb enĩ age afedif.”

*Tamo Kabĩ Lo Difedig Nẽ Yaab Od  
(Matyu 21:33-46; Mak 12:1-12)*

<sup>9</sup> Jesus tobol fe, yaab od enei tamo kayau irokenẽdin, “Tamo taka wain kabĩ yale, ã mala solo yalouf nigin wain kabĩ, kabĩ tamo tunĩ imeid bun ino fen, sain meluk uyu takã ilen. <sup>10</sup> Fito fiya sain, ã ferfer taka wain kabĩ lo fiya tamo gedin, wain biya tunĩ difenẽf nigin sur fen. Anĩ ere, idi ã du ken, sur difiyẽ di, ima sãsã ilen. <sup>11</sup> Ï ferfer taka sur fen, anĩ ere, idi tamo anĩg du ken, mama difenẽ di, ima sãsã ilen. <sup>12</sup> Ï baban takag sur fe di, idi ãg darau difen ken, dumeitur diran.

<sup>13</sup> “Age dife di, wain kabĩ marau iron, ‘Aya ere naig afouf? Aya neu kesu, oboiyou, sur afouf. Idi ã anĩ karĩ difiyẽf be.’

<sup>14</sup> “Anĩ ere, kabĩ lo fiya tamo idi ã dile fen, abob dirokenen. Idi diron, ‘Eĩ ã akorouf. Ada ã taukeis fen, akor eĩ nedauf.’ <sup>15</sup> Anĩ nigin, idi ã wain kabĩ dumeitur dira ken, dukesin.”

Age dife di, wain kabĩ marau naig fediyouf? <sup>16</sup> Ï isi, kabĩ lo fiya tamo idenkeis fen, wain kabĩ anĩ tamo tunĩ ifenẽdiyof.”

Sain tamo kayau od enei karĩ de fen, idi diron, “Enei to bagai agef wõ youf!”

<sup>17</sup> Anĩ ere, Jesus idi lo feid le fen, to fedin, “Age fiyauf are, ere gariya nigin Negur nẽ Itotoya bun eig ye irok:

“Meein are fõ inoya tamom sane de fen, ditoron, meein anĩ gama monog tor wõ yen”<sup>\*</sup>?

<sup>18</sup> Aib taka meein anĩ teten kubũ youf, mereb fe fisik fouf, takag, aib taka meein anĩ ã teten kubũ youf, ã danĩf aas lauf.”

<sup>19</sup> Lo ifelnẽdiya tamo, pris odudug geid, Jesus kaisã bagai ironẽya nigin naab dimiren, ere nigin, idi kelein, ã idi nigin yaab od enei wogõ yen. Anĩ ere, idi tamo kayau nigin kumĩ den.

### *Sisa Takis Ifenẽya*

*(Matyu 22:15-22; Mak 12:13-17)*

<sup>20</sup> Anĩ nigin, idi Jesus ololo difiye ken, kofo tamo sur difedin, kofo tamo idi idegẽya bun madur tamo gen dilen. Idi Jesus ereb od wogõya bun kũ fenẽ di, diroune ken, Rom gawaman mudur nẽ lo fiya ado megeir bun dinenẽf nigin kisi difen.

<sup>21</sup> Anĩ nigin, kofo tamo Jesus to difiyen, “Tise, amã keleĩ, ogon wogõya ifelnẽya ado madur. Õ takam in oroya dõ wouf nigin wewu yõ di, in oroya dõ fen, taka wau morõ to wenẽdig, anĩ ere, õ momoi bun Negur nẽ naab ufelnamãdig. <sup>22</sup> Amã Sisa takis mafenẽf anĩ lo dõ fiya de, sã?”

<sup>23</sup> Anĩ ere, Jesus idi namedin idegẽya anĩ ile fen, irokenẽdin, <sup>24</sup> “Koin moni taka ufelnag. Ai nẽ malakanon ado itotoya anĩ bun ibodok?”

---

<sup>\*</sup> **20:17:** Sam 118:22

<sup>25</sup> Idi aiten dale diron, “Sisa nē.” Age de di, Jesus idi irokenēdin, “Age fiyauf are, Sisa nē are Sisa wenēg, Negur nē are Negur wenēg.”

<sup>26</sup> An Jesus mal atun wogō yen bun, idi ī irounēya kisi feleya sã. Idi ī solof iron anī bunem terefeit de fen, foro delen.

*Mata Kel Fāya Bun Ai Nē Kayau Ibodōf?*  
(*Matyu 22:23-33; Mak 12:18-27*)

<sup>27</sup> Sadusia tamo idi dirōdig, laa bun tamal mata to ke de fã dedig, dedig anī tunim, to fiya eig fiya ado Jesus wagen disin. <sup>28</sup> Idi diron, “Tise, Moses itotkanaman, are tamo taka, ne tura laaf fen, aiwa itornen, anī ere, kesu sãf are, tamo ī kayau waab anī yale fen, tura nē kesu diroukenēf.

<sup>29</sup> Gama tura tura sewen dibodon. Matu ketem kayau taka yalen, anī ere, kesu yaleya sã mog, tamo laa fen. <sup>30</sup> Matu dō fiya bagam kayau anī yalen, ī laa fe di, <sup>31</sup> ī dō fiya bagam kayau anī yalen, age de dile dile, tura tura sewen ganan kesu sã gare desin. <sup>32</sup> Dum kayau areg laa fen. <sup>33</sup> Anī nigin, dum laa bun tamal mata kel fāya sain bun, ī ai nē kayau ibodōf, ere nigin, tura tura sewen anidi adok ī dale dogolen?”

<sup>34</sup> Jesus aitedin yale iron, “Gama sain enei bun, tamo kayau yalef, kayau tamo yalef ya ibodok.

<sup>35</sup> Anī ere, sain anī bun, idi laa bun tamal mata kel fāya sain bun dibodōf nigin kisi feleya anidi, an tamo kayau yalef, kayau tamo yalef ya sãf, <sup>36</sup> idi baban gare deyag kisi feleya sã, ere nigin, idi engel gen. Idi laa bun tamal mata ke de fã def nigin, idi Negur nē gere tar. <sup>37</sup> Anī ere, arein aa yã wō yen nigin Negur nē Itotoya bun, Moseseg tamo



gare den anĩ mata ke de fã douf nigin ifelnen, ere nigin, ĩ Odug nigin iron, ‘Abraham nẽ Negur, Isak nẽ Negur, Jakop nẽ Negur.’\* <sup>38</sup> ĩ laa neid Negur sã, ĩ mata ibodõya neid Negur, ere nigin, ĩ bun ganan mata dibodok.”

<sup>39</sup> Lo ifelnẽdiya tamo tunĩ aiten dale diron, “Tise, õ de urok!” <sup>40</sup> Anĩ bunem idi kumĩ de fen, taka nem ereb taka nigin baban Jesus to, to fiyen.

*Ai Nẽ Kesu Anĩ Kristus?*

*(Matyu 22:41-23:7; Mak 12:35-40)*

<sup>41</sup> Age dife di, Jesus idi irokenẽdin, “Naig fe di, idi Kristus ĩ Dawid nẽ Naal dedig? <sup>42</sup> Dawid ĩ yogo Buk Sam bun kurõ falaisin:

“ ‘Negur neu Odug irokenen,

“Imau biya melem ubod mog,

<sup>43</sup> ogon kiwai tar

on yẽ inoya nẽ sawa anouf.” \*

<sup>44</sup> Dawid ĩ nigin ‘Odug’ yef, age fiyauf are, naig fe di, ĩ Dawid naaluouf?”

<sup>45</sup> Tamo kayau ganan karĩ difiyẽ mog, Jesus in dõ fiya tar irokenẽdin, <sup>46</sup> “Lo ifelnẽdiya tamo nigin lo welegei. Idi gabar meluluk difonunakel diyo ken, maket modoũ bun aan difiyẽdiyof anĩ orodidig. Age de fen, idi Juda neid uub fõ bun sia biyai biyai bun dibod ken, tar inoya bun modoũ malabag malabag bun dibodõdig. <sup>47</sup> Idi kayau waab idegnẽdiya bunem nedi fõ sosoin difeid fen, meleid yaleya nigin meluk bagai kosẽ dedig. Tamo age fediya, mala solo darau sane bagai dalouf.”

---

\* **20:37:** Eksodas 3:6      \* **20:43:** Sam 110:1

## 21

### *Kayau Waab Nē Safina Negur Ifenēya* (Mak 12:41-44)

<sup>1</sup> Jesus mala irā, tamo kayau safineid adodo, nedi kolekta moni tempel bogis bun dino mog, iledin. <sup>2</sup> Takag, ĩ lof mog, kayau waab maleg taka isi, peni giriya moni nanaal uru inon. <sup>3</sup> Agef fen, Jesus iron, “Aya ā momoi arokeneik, kayau waab maleg enĩ ĩ, ganan wal fediya, odug bagai bogis bun inol. <sup>4</sup> Tamo kayau enei ganan, dogo neid safineid bun tamal, nedi kolekta moni dinon, anĩ ere, kayau anĩ, maleg bun ĩ mata ibodōf nē anĩ ganan inon.”

### *Idikeleya Sain Nē Uris* (Matyu 24:1-35; Mak 13:1-31)

<sup>5</sup> In dō fiya tar tunĩ, tempel meein biya biya nem ado, safineid biyai Negur difenen anim, tempel naki difiyen anĩ nigin wogō den. Anĩ ere, Jesus iron, <sup>6</sup> “Ā ulegef enei nigin, sain fau isiyouf, meein enĩ taka to abob tete tete yenēf, anĩ adok fau isog irailauf.”

<sup>7</sup> Idi to difen, “Tise, ere sain eneidi wō youf? Ere uris anĩ, eneidi kisi falauf nigin wō youf?”

<sup>8</sup> Age de di, Jesus iron, “Takam to idegneif nigin lo weleg. Ere nigin, musei aya yanau nem disi dirōf, ‘Aya Kristus,’ takag, ‘Sain mogo melsak.’ Age de di, to dō wiyēdig. <sup>9</sup> Ā kusĩ nigin ado, kantri bun kiwai fen, gawaman narĩ difef ya karĩ gouf, ā to tererē gei. Ereb ereb enidi ketem wō youf bagai, anĩ ere, idikeleya anĩ, sain anĩ bun bagai to wō youf.”

<sup>10</sup> Age ye fen, Jesus idi irokenēdin, “Teneub taka fã ye fen, ï teneub taka nigin kiwai ifenēf, tano taka ï tano taka nigin kiwai ifenēf. <sup>11</sup> Mimĩ odug wowã youf, naũ odug ado dagi totol, modoũ taka taka bun wowã youf, ereb ereb kumĩya nē ado uris odudug, saa bun wowã youf.

<sup>12</sup> “Anĩ ere, eneidi ganan fau to wõ ye mog, idi kaka diyeyi ken, kafĩ fiya difeneĩf. Idi Juda neid uub fõ bun ado kalabus bun dineneĩf. Age de fen, ã king ado gawaman mudur adodo meleid bun dirouleyeĩf, anĩ ganan aya yanau nigin de fen, age diyeyĩf. <sup>13</sup> Naab enei bunem, ã idi meleid bun, aya nigin kurõ wesigouf. <sup>14</sup> Anĩ ere, ã idi meleid bun aug isenneĩya nigin dodok ge fen, to wogõ gouf nigin ã kisi ketem ufokeleg. <sup>15</sup> Ere nigin, aya, od ado kisi biya, ãgenei kiwai tar takam solof irõya be, kiwai ifenēya kisi feleya sã anĩ afeneĩf. <sup>16</sup> Anĩ ere, ã fau sineĩ temeĩ tarem, tureĩ tarem, sirag ado neĩ mou taremeg kiwai difenei ken, ã tunĩ laa bun dineneĩf. <sup>17</sup> Tamo ganan, aya yanau nigin de fen, ã kiwai difeneĩf. <sup>18</sup> Anĩ ere, mudureĩ bun, fatiyeĩ tekelei bagai to iminkalauf. <sup>19</sup> Megeir ifareya bunem, mata walogouf.

<sup>20</sup> “Sain ã Jerusalem kusĩ tamom salili dife mog, ulogouf, ã keleĩ youf, Jerusalem fonou inenēya anĩ melsak. <sup>21</sup> Age fiya ulogouf, idi Judia distrik bun dibodok, arein diya diselauf, idi taun anĩ bun dibodok, anenem diyalalauf, idi taun yerin difaref, namen to dilauf bagai. <sup>22</sup> Ere nigin, sain enei are, Negur nē Itotoya bun ibodok ganan kisi falauf nigin darau ifenēya nē sain. <sup>23</sup> Naa anĩ bun, kayau bouweid ado, kayau kesu su difenek ado,

idi meleidlon ado. Teneub anī bun, morō odug wō ye fen, Negur nē didi, tamo kayau enei bun isiyouf. <sup>24</sup> Idi dimig nem didenkeis, kalabus tamo gei difeid fen, teneub ganan bun diroulediyouf. Jerusalem fau haiden Israel sã anidim lalai difeid dile, haiden Israel sã anidi neid sain anī kisi falauf.

<sup>25</sup> “Uris gaa bun, ogō bun ado, barisa bun wō youf. Tenebur ein, teneub ganan bun moloun fire bagai fã ye fen, maaī gugu re di, idi kisi gurū ye fen, nene douf. <sup>26</sup> Tamo kayau, teneub bun ere wowã youf de fen, kumī de, meleid waī youf, ere nigin, saa nē megeir guyoyō douf. <sup>27</sup> Sain anī bun, tamo idi, Tamo Naal lalo bun megeir ado fula fiya medeīya barikã isi mog, dilouf. <sup>28</sup> Ereb erEB enei gariya ino, wō ye di, ufareg fen, mudureī utadseg, ere nigin, kel yaleyeīya are melsak.”

<sup>29</sup> Age ye fen, Jesus yaab od enei irokenēdin, “Ã aa fig ado aa ganan ulogouf. <sup>30</sup> Sain idi aarau ifiraūd mog, anī ã aug uleg fen, ã keleīdig, saneya melsak. <sup>31</sup> Age fiya bagai, erEB erEB eneidi wō ye mog, ulogouf are, ãg keleī youf, Negur nē tano are mogo melsak.

<sup>32</sup> “Aya ã momoi arokeneik, tamo kayau sain enei bun dibodok anidi to gare de mog, erEB erEB eneidi ganan wō youf. <sup>33</sup> Saa teneub ado sa kalauf, anī ere, neu od to bagai sa kalauf.

<sup>34</sup> “Lo walagauf, sãf are, saafei ge, aai naanuei ge fen, tenebur mata ibodōya nigin sii fiya anim, ãgenei wauī bun kafī yeī di, ã keleī sã mog, Negur nē naa kor gen ã bun isiyouf. <sup>35</sup> Naa are, tenebur tamo kayau ganan bun wō youf. <sup>36</sup> Eneidi ganan

wowã you fenē anī wal fiya kisi falauf nigin ado, Tamo Naal mala bun ufaragauf nigin, ã faimud ololo wog fen, kosē gouf.”

<sup>37</sup> Naa ganan, Jesus tempel bun ifelneïd fen, aragau ganan, Moul Arein isel fen, bõ an ibodõdig. <sup>38</sup> Age fe di, tamo kayau ganan, tempel bun karī difiyēf nigin, bonimeï bagai disidig.

## 22

*Judas Jesus Mudur Adodo Imeid Bun Inouf Nigin Yo Yen*

*(Matyu 26:1-5; Mak 14:1, 2, 10, 11; Jon 11:45-53)*

<sup>1</sup> Gama Bret Yis Sã Sifa naa, Pasa naa dedig melsã di, <sup>2</sup> pris odudug, lo ifelnēdiya tamo geid, Jesus yukesiya nigin naab dimiren, ere nigin, idi tamo kayau nigin kumī den. <sup>3</sup> Age fe di, Satan, Judas, Iskariot tamal dedig, tuwelf dõ fiya tar atun taka, ã namen ilen. <sup>4</sup> Age fe di, Judas ile, pris odudug ado tempel lo fiya tamo neid uyu irouya bun wõ ye fen, idi geid ã naig fe Jesus kiwai imeid bun inouf nigin katõ difen. <sup>5</sup> Idi od enī karī de, waud al fe fen, ã moni difenēf nigin dirokenen. <sup>6</sup> Judas ã yo ye fen, tamo kayau to guru de mog, Jesus idi imeid bun inouf nigin naab imirek ilen.

*Jesus In Aposel Geid Idikeleya Nē Bõ Saaf Don*

*(Matyu 26:17-35; Mak 14:12-31; Jon 13:21-30, 36-38)*

<sup>7</sup> Anī dumen, Bret Yis Sã anī nē naa wõ yen, anī bun idi Pasa naa nigin sipsip naal diden ken, sesewi difedig. <sup>8</sup> Jesus, Pita Jon ado sur feid fen, iron, “Uleg, ada Pasa naa nē saaf tãf nigin dodok wanadag.”

<sup>9</sup> Idi Jesus to difiyen, “Õ, amã nain anĩ, Pasa naa nẽ saaf tãf nigin, dodok mafouf anĩ oroyok?”

<sup>10</sup> Age de di, Jesus idi irokenẽdin, “Taun wõg fen, tamo taka darum naan ado isi fotou yeĩf, ã fõ bun ilauf anĩ dõg uleg. <sup>11</sup> Agog fen, ã fõ marau eig wiyẽg urokenẽgouf, ‘Tise õ irokonok: Aab nanĩ bun an, aya neu dõ fiya tar geid, Pasa naa nẽ saaf mãf?’ <sup>12</sup> Ago ge di, ã aab odug ilun anĩ ifelneĩf, an erab erab dodok de bure difelen. An neda nigin dodok gouf.”

<sup>13</sup> Age ye di, idi dile, Jesus irokenẽdin kilei erab erab age fiya dilen. Anĩ nigin, idi Pasa naa dodok difen.

<sup>14</sup> Sain wõ ye di, Jesus in aposel geid tebol bun dibodon. <sup>15</sup> Age de fen, Jesus idi irokenẽdin, “Aya darau yaleya sã mog, ã geid Pasa naa nẽ saaf tãf anĩ orouf bagai. <sup>16</sup> Ere nigin, aya ã arokeneik, aya baban Pasa naa nẽ saaf to ãf ile, anĩ fau Negur nẽ tano bun kisi falauf.”

<sup>17</sup> Age ye fen, ã kap yale, Negur de fiye ken, iron, “Enei waleg fen, ã atun foig. <sup>18</sup> Aya ã momoi arokeneik, aya baban wain to ãf ile, Negur nẽ tano isiyouf.”

<sup>19</sup> Age ye fen, Jesus bret yale, Negur de fiye ken, mumã fen. Agef fen, ã in dõ fiya tar ifeneĩd fen, iron, “Eĩ neu bouwau, ã nigin afeneik. Enei agog fen, aya nigin kisi gouf.”

<sup>20</sup> Age fiya bagai, saaf bure difel fen, Jesus kap yale, iron, “Kap enei, neu naudou bun, ã Negur geid bar itenẽya mata, naudou are ã nigin fi felef. <sup>21</sup> Anĩ ere, taka aya kiwai imeid bun inoyauf, are ein tebol bun urom imamã manof. <sup>22</sup> Momoi,

Tamo Naal ï nigin iron kilei agef ilauf, anï ere, tamo ï kiwai ifenek, ï malalon ado.” <sup>23</sup> Age ye di, idi dogo dogol toti difen, idi atun aim bagai tobonunã enei age fouf.

<sup>24</sup> Takag, idi atun aim anï odug bagai ibodõf nigin luwa diroun. <sup>25</sup> Age dife di, Jesus idi irokenẽdin, “Haiden neid king, dogo neid tamo kayau lo difedig, idi dogo neid megeir tamo kayau bun yaor difedig, are ada biya difadauf dedig. <sup>26</sup> Anï ere, ã age fiya anï to ago gouf. Age fiya ban, ã atun odug ibodok are, kesu naal gen ibodõf, takag, uyu irouya tamo ï, aruna yaleya tamo gen ibodõf. <sup>27</sup> Ai anï odug, taka tebol bun ibodok anï de, taka ï aruna yalef anï? Taka ï tebol bun ibodok anï sã de? Anï ere, aya ã atun aruna yaleya tamo gen abodok. <sup>28</sup> ã anï, neu kisi fiya isi di, aya bun toku ufaregen. <sup>29</sup> Neu Dei tano aya ifanan gen, ayag tano ã afeneik. <sup>30</sup> Age afe di, ã neu tanon, tebol bun saaf ado naan wãgauf, king nẽ sia bun ubodõg fen, Israel ibor tuwelf es gouf.

<sup>31</sup> “Simon, Simon, tamo wit biya ado wit ido foi fiya nigin age fedig gen, Satan ï ãgenei momoiya kisi yeï fenẽ nigin to fen. <sup>32</sup> Anï ere, aya, Simon õ nigin ogon momoiya to urofosiyouf nigin kosẽ aun. Anï nigin, sain õ kelouf, turã tar megeir wediyouf.”

<sup>33</sup> Anï ere, Pita aiten yale iron, “Odug, aya õ ado kalabus bun ado, laa bun ileyã nigin dodok afel.”

<sup>34</sup> Age ye di, Jesus iron, “Pita, aya õ arokonok, gama fau tataro kokorok yeya sã mog, õ wa fen, aya nigin keleï sã wo, towo wouf.”

<sup>35</sup> Age ye fen, Jesus idi to fedin, “Sain aya ã moni nê kodol, faa be, su sã sur ayein, ã ere taka lau gen de?” Idi solo de diron, “Sã.”

<sup>36</sup> Age de di, Jesus idi irokenêdin, “Anĩ ere, gama taka ã moni nê kodol adouf, yalouf, faag age fiya, taka ã dimig sã, yogon gabar na nigin sur fe fen, taka na yalouf. <sup>37</sup> Negur nê Itotoya bun eig ye ibodok, ‘Ĩ tamo sesen geid bagu difedin.’\* Aya ã arokeneik, enei aya bun kisi fel, agef wõ youf. Ariya, aya nigin itoton are mogo kisi felef.”

<sup>38</sup> In dõ fiya tar diron, “Ulef, Odug, dimig uru yeir.” Age de di, ã iron, “Are de.”

### *Jesus Moul Arein Kosë Yen*

*(Matyu 26:36-46; Mak 14:32-42)*

<sup>39</sup> Agef fen, Jesus aabê tamal ulõ yeis fen, gai age fedig gen, Moul Arein iselen, age fe di, in dõ fiya tareg ã dõ difiyen. <sup>40</sup> Modoũ anĩ bun wõ de fen, Jesus in dõ fiya tar irokenêdin, “Kisi fiya bun to kubũ gouf nigin kosë wog.” <sup>41</sup> Jesus yogon dõ fiya tar itorneĩd, meein irã di, ile kubũ youn age fyan ile, ibor bobou fe fen, kosë yen, <sup>42</sup> “Dei, õ oroyõf are, kap enĩ aya bun walelauf. Anĩ ere, neu oroya to dõ wouf, on oroya dõ wo.” <sup>43</sup> Engel taka saa ilun tamal, ã bun wõ ye fen, megeir ifenen. <sup>44</sup> Age fe di, Jesus wau morõ fatuk fe di, ã total bagai kosë yen, age fe di, maab, naud isidig gen, tenebur kuku ren.

<sup>45</sup> ã kosë yel fen, fã ye, in dõ fiya tar gedin kel ile, waud gudũ falaisil, den mog, iledin. <sup>46</sup> Agef fen, Jesus idi to fedin, “Ere nigin mulaĩ wenêgef? ã kisi fiya bun to kuku gouf nigin fafãg fen, kosëg.”

---

\* **22:37:** Asaia 53:12



*Jesus Dirounen*

*(Matyu 26:47-56; Mak 14:43-50; Jon 18:3-11)*

<sup>47</sup> Jesus fau wogō ye mog, tamo musei disin, tuwelf in dō fiya tar idi anī atun taka, Judas dedig inim uyu iroukenēdin. Ī Jesus umā fiyēf nigin non ilen. <sup>48</sup> Anī ere, Jesus ĩ to fiyen, “Judas, ō umāya bunem Tamo Naal kiwai wenēf de?”

<sup>49</sup> Sain Jesus nē dō fiya tar, ereb wō you fenē age fe di, dile fen, idi diron, “Odug, amā nemā dimig nem madenauf de?” <sup>50</sup> Age de fen, idi takam, pris mudur ado nē ferfer weder biyalē anī salōf iran.

<sup>51</sup> Anī ere, Jesus iron, “Baban enei to ago gouf!” Age ye fen, ĩ tamo anī nē weder kobūf fen, el fiyen.

<sup>52</sup> Agef fen, Jesus, pris odudug, tempel lo fiya tamo neid uyu irouya geid, mudur adodo, ĩ nigin disin anī irokenēdin, “Ā bē tamo ounēgouf gen, ā dimig adodo seburer adodo usigef de? <sup>53</sup> Naa ganan, aya ā geid tempel bun tabodon, anī ere, ā aya bun imeī taka to unogen. Anī ere, eī āgenei sain, are gugum irouneik nigin.”

*Pita Jesus Nigin Wa Fen*

*(Matyu 26:57, 58, 69-75; Mak 14:53, 54, 66-72; Jon 18:12-18, 25-27)*

<sup>54</sup> Idi Jesus dale, diroune ken, pris mudur ado nē fō bun dirou dilen. Pita ĩ so rel fen, dumeid dō fen. <sup>55</sup> Anī ere, sain idi fofomala atun yā kū de dibodon, Pita ĩg an weim dibodon, <sup>56</sup> Kabī kayau momoul taka, Pita yā sirin ibod mog, ilen. Kayau momoul anī Pita lo fel fen, iron, “Tamo eneig ĩ geid.”

<sup>57</sup> Anī ere, Pita waf fen, iron, “Kayau, aya ĩ keleī sã.”

<sup>58</sup> Sain naal ile di, taka nem ã ile fen, iron, “Õg idi neid taka.”

Anã ere, Pita iron, “Mou, aya sã!”

<sup>59</sup> Aua tekelei age fiya ile di, taka bagam ã nigin totol iron, “Momoi bagai, tamo eneig ã geid diyon, ere nigin, ãg Galili tamal.”

<sup>60</sup> Anã ere, Pita aiten yale iron, “Tamo, õ urok anã aya keleĩ sã!” Ñ irõ mog bagai, tataro kokorok yen. <sup>61</sup> Odug falei yel, Pita lo felen. Age fe di, Pita Jesus wogõ fiyen anã nigin weder fokõ yen, “Gama fau tataro kokorok yeya sã mog, õ aya nigin wa wo, towo wouf.” <sup>62</sup> Age fe di, ã mayarẽ ile fen, inã fatuk yalen.

*Kusã Tamo Jesus Diselinen*

*(Matyu 26:67, 68; Mak 14:65)*

<sup>63</sup> Tamo Jesus dirounen idi, ã diseline ken, wagã difiyen. <sup>64</sup> Age dife fen, idi Jesus mala difofakel fen, to difiyen, “Kurõ weis urokanamã! Aim õ inok?” <sup>65</sup> Age de fen, idi kono fiya od musei dirokenen.

*Jesus Juda Kaunsel Neid Kot Mala Bun Ifaren*

*(Matyu 26:59-66; Mak 14:55-64; Jon 18:19-24)*

<sup>66</sup> We fele di, tamo kayau neid mudur adodo neid kaunsel, are pris odudug, lo ifelnẽdiya tamo geid, weim guru de mog, Jesus idi gedin dirou dilen. <sup>67</sup> Idi diron, “Õ Kristus ouf are, amã urokanamã.”

Anã ere, Jesus aitedin yale iron, “Aya ã aro-keneif are, ã to momoi gouf, <sup>68</sup> agef fen, aya ã to ayeifeg, ã to solog urõgouf. <sup>69</sup> Anã ere, gama sain enei bunem ilauf ganan, Tamo Naal ã, Negur megeir ado ima biyalem ibodõf.”

<sup>70</sup> Age ye di, idi ganan to difiyen, “Age fouf are, ò anĩ Negur Naal de?”

Ĩ aitedin yale iron, “Ă de urōgef, aya anĩ.”

<sup>71</sup> Age ye di, idi diron, “Ere nigin ada, ĩ nigin od megeir fiya nigin tamo baban tamirēf? Ada ĩ sigoron bagai karĩ taul.”

## 23

### *Jesus Pailat Herod Ado Meleid Bun Ifaren*

*(Matyu 27:1, 2, 11-26; Mak 15:1-15; Jon 18:28-19:16)*

<sup>1</sup> Age de fen, guru fiya ganan fã de, Jesus Pailat bun dirou dilen. <sup>2</sup> Age de fen, idi mogo gariya dino, ĩ bouwa bun od du ken, diron, “Amã, tamo enei nemã tamo kayau ganan idegēya bunem sanen guri feid irou ile mog, mailen. ĩ Sisa takis ifenēya nigin katũ fiyeĩd fen, ĩ yogo nigin aya Kristus, aya king yen.”

<sup>3</sup> Anĩ nigin, Pailat Jesus to fiyen, “Ō Juda neid king de?” Jesus solof iron, “Are de yer, ò urok anĩ.”

<sup>4</sup> Age ye di, Pailat ĩ, pris odudug, tamo kayau geid irokenēdin, “Aya tamo enei bou bun mosor taka to ailel.”

<sup>5</sup> Anĩ ere, idi total dinon, “Ĩ Judia distrik ganan bun, in ifelnēya bunem tamo kayau waud yalen. ĩ Galili an gariya ino fen, tokō fel eineg isin.”

<sup>6</sup> Pailat anĩ karĩ ye fen, ĩ Galili tamal be anĩ to fen. <sup>7</sup> Pailat ĩ, Jesus Herod nē tano bun tamal yeya kelei ken, Herod gein sur fen, Herod ĩg sain anĩ bun Jerusalem ibodon.

<sup>8</sup> Herod Jesus ile fen, wau fatuk kulĩ yen, ere nigin, sain meluk bagai ĩ ileya nigin oron. ĩ nigin karĩ yen nigin, Herod ĩ Jesus bun memelik tunĩ ilouf nigin age fen. <sup>9</sup> Herod Jesus musei bagai to fiyen, anĩ ere, Jesus taka to solof iron. <sup>10</sup> Pris odudug, lo ifelnēdiya tamo geid an difaren, ĩ bou bun od total bagai dinon. <sup>11</sup> Age dife di, Herod yogon kusĩ tamo geid, Jesus kasã difiye ken, kono difiyen. Age dife fen, kolos biya difounne ken, Pailat wagen sur difiyē di, kel ilen. <sup>12</sup> Naa anĩ bun, Herod Pailat ado nigal dun, uruwa bun idi uruwom kiwain.

<sup>13</sup> Pailat ĩ, pris odudug, mudur adodo, tamo kayau geid iweigneĩd fen, <sup>14</sup> irokenēdin, “Ā tamo enei, tamo kayau waud yale fen, sane nigin weleid inon ge fen, waleg, urou usigel. Aya ã meleĩ bun to afiyem, anĩ ere, ã ĩ bou bun od unogen anĩ, tamo enei bun gariya taka to ailel. <sup>15</sup> Herod ĩg age fiya, anĩ nigin, ĩ kel sur fe di, ada gein isil. Anĩ ulogouf, ĩ yukesiya nigin ereb sane taka to age fen. <sup>16</sup> Anĩ nigin, aya darau dogol afen ken, atornēf.”\*

<sup>18</sup> Anĩ ere, idi sigoreid takai fen, diweig diron, “Tamo enei ukesiyouf! Barabas walis kanamã!” <sup>19</sup> (Barabas ĩ anĩ taun oun kusĩ yales fen, tamo yukesin nigin, kalabus bun dinenen.)

<sup>20</sup> Pailat, Jesus yalishēya nigin baban total bagai irokenēdin. <sup>21</sup> Anĩ ere, idi baba baban diweig diron, “Aa tetek bun ũf! Aa tetek bun ũf!”

---

\* **23:16:** Itotoya tunĩ eig de ditoton: atornēf.” <sup>17</sup> Gama ĩ, kalabus bun tamal tamo taka, Sifa bun yalis kenēdiyof bagai.

<sup>22</sup> Age de di, Pailat ï irõ, towo fen sain bun anï irokenëdin, “Ere nigin? Tamo enei, ere mosor inon? Aya ï yukesiya në gariya anï, ï bun taka to ailel. Anï nigin, aya ï darau afen ken, atornëf.”

<sup>23</sup> Anï ere, idi aiteid odudug fen, ï aa tetek bun yũf nigin, baba baban dirokenen. Age dife di, dogo neid aitedim, Pailat në od lai difiyen. <sup>24</sup> Anï nigin, Pailat, nedi oroya dõ fiya nigin kisi yale fen, irokenëdin. <sup>25</sup> Pailat ï, tamo kusï yales fen, tamo yukesi di, kalabus bun dinenen ï nigin tamo kayau to difiyen anï, yalisne ken, dogo neid oroya dõ difouf nigin Jesus ifenëdin.

### *Jesus Aa Tetek Bun Dun*

*(Matyu 27:32-44; Mak 15:21-32; Jon 19:17-27)*

<sup>26</sup> Idi Jesus dirou dile fen, Simon Sairini tamal, ï yogon fonom isi mog, luwen ï dale, aa tetek orowa se dife di, faali fe, Jesus dõ fen. <sup>27</sup> Tamo kayau musei, kayau idi ï nigin waud gudũf fen, inã dalen geid, dõ difiyen. <sup>28</sup> Anï ere, Jesus idi bun falei yel, idi irokenëdin, “Jerusalem në barai tar, aya nigin inã to waleg, ã aug nigin ado gereï tar nigin inã waleg. <sup>29</sup> Ere nigin, sain fau isiyouf bun, idi dirõf, ‘Kayau dali, kayau fau kesu gõ fiya sã, kayau kesu su ifenëya sã anidi el fedif!’ <sup>30</sup> Age de fen,

“ ‘idi arei dirokenëdiyof, “Teteman kukug!”  
areï mudu dirokenëdiyof, “Kerub  
wamãg!” ’\* ”

<sup>31</sup> Tamo, aa mata mog, enei age difedif are, meti youf sain bun, ere wõ youf?”

---

\* **23:30:** Hosia 10:8

<sup>32</sup> Lo wal fiya tamo uru idig, ĩ geid laa bun dinenēdiyof nigin dirou dilen. <sup>33</sup> Sain idi modoũ yana Mudur Tuwan dedig wõ de fen, an Jesus aa tetek bun dun, lo wal fiya tamo uru geid, taka biya melem, taka ki melem. <sup>34</sup> Age dife di, Jesus iron, “Dei, idi neid mosor nigin weder tu kel, ere nigin, idi keleĩ sa ken, enei age difef.” Age fe di, idi aisaĩ kodē de fen, yogon kolos idi atun foifu difen.

<sup>35</sup> Tamo kayau difar fen, lo difeid mog, mudur adodomeg ĩ kasã difiyē diron, “Ĩ tunĩ isennēdin, ĩ Kristus Negur igrinen ouf are, utornēg len, yogo bouwa isennēf.”

<sup>36</sup> Kusĩ tamog dise fen, diselinen. Idi wain makik ado difen ken, <sup>37</sup> diron, “Õ Juda neid king ouf are, ogo boũ usennēf.”

<sup>38</sup> Ĩ muduren itotoya eig ya yenen: Eĩ JUDA NEID KING.

<sup>39</sup> Lo wal fiya tamo aa tetek bun difaren anĩ takam, Jesus kono fiyē iron, “Õ Kristus ouf are, õ ogo usenne ken, amã usennamãf!”

<sup>40</sup> Anĩ ere, lo wal fiya tamo taka im, ne tã ou fiye ken, iron, “Õ kafĩ fiya tekelei walef, anĩ ere, õ Negur to kumĩ wiyek de? <sup>41</sup> Ada urom darau talef, are de, ere nigin, ada urom sane age tafen anĩ mala solo. Anĩ ere, tamo enei ereb sane to age fen.”

<sup>42</sup> Age ye fen, ĩ Jesus irokenen, “Jesus, sain õ ogon tano bun usel fen, aya karĩ wiyalauf.”

<sup>43</sup> Age ye di, Jesus tamo anĩ irokenen, “Aya õ momoi arokonok, gama õ aya ado paradis bun tabodõf.”

### *Jesus Laa Fen*

*(Matyu 27:45-56; Mak 15:33-41; Jon 19:28-30)*

<sup>44</sup> Gaa atun tuwelf kilok age fiya bun, teneub ganan bun gugum kelef ile, tri kilok aragaun, <sup>45</sup> ere nigin, gaa mala ifokelen. Age fe di, tempel nẽ gabar anĩ atusil serek fe, uru wõ yen. <sup>46</sup> Jesus ait odug nem iweig iron, “Dei, neu uur õ imã bun anof.” Agef iro ken, ï oboi irour yalen.

<sup>47</sup> Kusĩ tamo neid orowa, Jesus age fiya ile fen, Negur yana yales iron, “Momoi, tamo eĩ madur tamo.” <sup>48</sup> Tamo kayau ganan idi lo fiya nigin guru difen, ereb anĩ wõ ye di, meledim dilen, are idi waud gudũf fen, akoreid du ken, firagagaũ difen. <sup>49</sup> Anĩ ere, idi Jesus keleĩ anidi ganan, idi atun kayau Galilim ï dõ de disin anidig, so del difar fen, eneidi wõ ye di, lo difen.

### *Jesus Mũ Difen*

*(Matyu 27:57-61; Mak 15:42-47; Jon 19:38-42)*

<sup>50</sup> Tamo taka yana Josef, ï kaunsel taka, madur tamo biya bagai, <sup>51</sup> anĩ nigin, ï idi neid tobonuneid ado od difon anĩ nigin to yo yen. Ì Judia distrik bun Arimatea taun tamal, ï Negur nẽ tano isiyouf anĩ tari fen. <sup>52</sup> Josef ï, Pailat gein ile, Jesus bou buru yalouf nigin to fiyen. <sup>53</sup> Agef fen, ï Jesus bou buru yale, irou isil, gabar lalau nem silef fen, matmat sa bun ku dalen an inenen, ku anĩ bun an taka to dinenen. <sup>54</sup> Naa anĩ dodok fiya naa, Sabat naa mogo gariya inou fenẽ melsã.

<sup>55</sup> Kayau Jesus geid Galilim disin, Josef dõ de, matmat ado, Jesus bouwa buru naig de dinof anĩ, lo difen. <sup>56</sup> Age difel fen, idi fonõ dile, bou wã fiya nẽ marasin ado moul sumeĩ biya bagai dodok

difen. Anĩ ere, idi Sabat naa nigin ãtãfiya dõ de fen, si dinon.

## 24

### *Jesus Mata Kel Fã Yen*

*(Matyu 28:1-10; Mak 16:1-8; Jon 20:1-10)*

<sup>1</sup> Uub nẽ naa matu bun\* bonimei bagai murei ado, kayau idi, bou wã fiya nẽ marasin dodok difen anĩ dale fen, matmat bun dilen. <sup>2</sup> Age dife fen, idi matmat bun meein wele feleya dilen. <sup>3</sup> Anĩ ere, sain idi meku namen dilen, idi Odug Jesus nẽ bouwa buru an to dilen. <sup>4</sup> Idi enei nigin kisi musei dale mog bagai, tamo uru kolos medeĩya barikã siridin difaren. <sup>5</sup> Age dife di, kayau kumĩ de fen, kususu de, teneub lo difen, anĩ ere, tamo idi kayau dirokenẽdin, “Ã ere nigin laa atun mata tamo umirnẽgef? <sup>6</sup> Ì ein sã, ì mogo fã yel! Ì Galili oun ã geid ubodõg fen, irokenein anĩ, wedereĩ fokõ youf, <sup>7</sup> ì iron, “Tamo Naal mosor adodo imeid bun dino di, ì aa tetek bun dukesiyouf, age dife di, naa towo bun, ì baban mata kel fã youf.’ ” <sup>8</sup> Age de di, kayau idi, in od anĩ wedereid fokõ yen.

<sup>9</sup> Sain idi matmat bunem ke de, disi fen, aposel ilewen tunĩ ganan geid, enei ganan wogõ difiyẽdin. <sup>10</sup> Kayau idi are Maria Magdala tamal, Joana, Maria Jems nẽ sina. Kayau anidi, kayau tunĩg geid, enei aposel wogõ difiyẽdin. <sup>11</sup> Anĩ ere, idi kayau nigin to momoi den, ere nigin, kayau neid od, idi bun auya gen. <sup>12</sup> Anĩ ere, Pita fã yale,

---

\* **24:1:** Are Sande.



matmat bun gudu re ilen. Ī ku bun itin, gabar lalau dogol yen mog, ilen, agef fen, ereb anĩ wõ yen anĩ nigin, ĩ kisi musei yalef ile, yogon fõ bun ilen.

*Emaus Naab Luwen*  
(Mak 16:12, 13)

<sup>13</sup> Naa de anĩ bun, idi neid tamo uru, fonõ taka yana Emaus dilen, Jerusalem anenem Emaus are ilewen kilomita age fiya. <sup>14</sup> Idi urom, ereb ereb ganan wõ yen anĩ abob dirokenek dilen. <sup>15</sup> Idi eneidi nigin diro ken, katõ de dile mog, Jesus yogo isi, weim diyok dilen. <sup>16</sup> Anĩ ere, idi Jesus keleĩa nigin meleid ifofakelen.

<sup>17</sup> Age dife di, Jesus idi to fedin, “Ā ere nigin naab luwen katõ ge usigef?” Idi dẽ del fen, idi neweid wau gudũ fiya ado agogon delen. <sup>18</sup> Idi taka yana Kleopas Jesus solof irokenen, “Õ ege Jerusalem nẽ ki tamo nigin, naa eneidi bun an ereb ereb wõ yen anĩ, õ keleĩ sã de?”

<sup>19</sup> Age ye di, Jesus idi irokenẽdin, “Ere bagai?” Idi Jesus dirokenen, “Jesus Nasaret tamal nigin. Ī profet taka, Negur ado tamo kayau ganan meleid bun, od ado tobonunã bun megeir barikã. <sup>20</sup> Pris odudug, neda mudur ado idim, ĩ laa bun dinenẽf nigin imeid bun dino di, aa tetek bun dukesin. <sup>21</sup> Anĩ ere, amã waumã iron, im anĩ Israel tamo kayau kel gei foug maun. Anĩ dogol sã, enei ganan wõ yen are, gama naa eneim mogo naa towo ilef. <sup>22</sup> Takag, amã nemã kayau tunĩg, amã terẽ difamam. Gama bonimeĩ bagai, idi matmat bun dilel, <sup>23</sup> anĩ ere, idi yogon bouwa buru to dilel. Idi dile, meleid seleulã kurãf fen, engel diledin, engel

idi dirokenēdil, Jesus ĩ mata ibodok, difiyēdi di, disi, amã dirokanamam. <sup>24</sup> Age de di, amã tunĩ matmat bun dile, kayau wogō del gen bagai dilel, anĩ ere, idi Jesus to dilel.”

<sup>25</sup> Jesus idi irokenēdin, “Ã neneya bagai, ã profet wogō den anĩ ganan, wauĩ bun momoiya nigin folo reya bagai! <sup>26</sup> Kristus ĩ darau enei yale fen, yogon fula fiya medeĩya namen to ilauf de?” <sup>27</sup> Age ye fen, ĩ Moses ado profet ganan neid itotoya bunem gariya ino fen, yogo nigin Negur nē Itotoya ganan bun ibodok anĩ, idi faded fedin.

<sup>28</sup> Idi fonō dilef nē anĩ kelē difiye ken, Jesus tokō feleya nigin suma ino genen. <sup>29</sup> Anĩ ere, idi total bagai dirokenen, “Amã geid tabodōf, ere nigin, gaa mogo kuru kelef, gugum irousif.” Anĩ nigin, Jesus idi geid dibodōf nigin namen ilen.

<sup>30</sup> Sain ĩ idi geid tebol bun dibod ken, ĩ bret yale, Negur de fiyē, mumãf fen, gariya ino ifenēdin. <sup>31</sup> Age fe di, idi meleid fara fele di, idi Jesus nigin kelein. Age dife di, ĩ idi meleid bun iminkelen. <sup>32</sup> Idi abob dirokenen, “Sain ĩ naab luwen wogō fada fen, Negur nē Itotoya faraf ifelnadal mog, ada namedan wauda to tōf yalel de?”

<sup>33</sup> Age de fen, idi fã de dale, kaisã bagai Jerusalem keku de dilen, an idi aposel ilewen, tamo tunĩ idi geid, guru de difar mog, fotou difedi di, <sup>34</sup> diron, “Are momoi! Odug fã ye fen, Simon bun wō yen.” <sup>35</sup> Age de di, tamo uru ereb naab luwen wō yen ado, Jesus ĩ bret mumã fe di, idi Jesus nigin naig de kelein anĩ wogō den.

*Jesus In Dõ Fiya Tar Bun Wõ Yen*  
*(Matyu 28:16-20; Mak 16:14-18; Jon 20:19-23;*  
*Aposel 1:6-8)*

<sup>36</sup> Idi fau enei nigin wogõ de mog, Jesus yogo idi atun ifar fen, irokenëdin, “Wau inosiya ã ado ibodõf.”

<sup>37</sup> Idi baraũ mailef de fen, terë de fen, kumĩ den.

<sup>38</sup> Age dife di, Jesus idi irokenëdin, “Ere nigin ã wauĩ morõ fef, ere nigin ã wauĩ bun kisi uru wõ yef? <sup>39</sup> Aya imau yeu ado feleg. Eĩ aya yug bagai! Kobũ wiyag fen, uleg. Baraũ ã aya bouwau ado, tuwau ado uleyagef gen sã, ã bou sã, tuwa sã.”

<sup>40</sup> Jesus enei iro ken, ã ima ye ado ifelnëdin.

<sup>41</sup> Age fe di, idi waud kulĩya ado terëya bunem, fau waud to momoi de di, Jesus idi to fiyëdin, “Ã ereb yõya nẽ taka ein tau ado?” <sup>42</sup> Idi gau yã tamal masak taka difenen, <sup>43</sup> age dife di, Jesus gau yale, meledin yon.

<sup>44</sup> Jesus idi irokenëdin, “Enei are, aya fau ã geid tabodon sain bun arokenein. Ereb ereb ganan, aya nigin Moses nẽ Lo bun, profet neid itotoya bun ado, Buk Sam bun ditoton anĩ ganan kisi falauf bagai.”

<sup>45</sup> Agef fen, Jesus idi Negur nẽ Itotoya keleĩ youf nigin, waud kã fenëdin. <sup>46</sup> ã idi irokenëdin, “Negur nẽ Itotoya bun eig ye irok: Kristus ã fau darau yale fen, laa bun tamal naa towo bun mata kel fã youf, <sup>47</sup> age fe di, wau faleiya ado, mosor nigin weder tu keleya nẽ od anĩ, fau ã yana bunem teneub ganan bun, Jerusalem anenem gariya dino fen, wogõ de dilauf. <sup>48</sup> ã enei ulegen nigin kurõ walaisi gouf. <sup>49</sup> Aya esel fen, neu Dei

sur afouf yen anĩ, ã bun sur afouf, anĩ ere, taun anĩ bun ubodõgef uleg, ã megeir saa ilun tamal anim ifounneif.”

*Jesus Saa Ilun Iselen*

*(Mak 16:19, 20; Aposel 1:9-11)*

<sup>50</sup> Sain Jesus idi gurif irou, Betani non dilen, an ã ima yales fen, el fiya ifenẽdin. <sup>51</sup> Ì idi el feid le fen, ã itornẽdi di, saa ilun irou iselen. <sup>52</sup> Age fe di, idi ã yana dales fen, waud kulĩya odug ado, Jerusalem ke de dilen. <sup>53</sup> Age de fen, idi tempel bun toku dibod ken, Negur yana dalesedig.

**Mata Ifeněya Ně Od**  
**The New Testament in the Marik Language of Papua**  
**New Guinea**  
**Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

**The New Testament**

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

---

PDF generated using Haiola and XeLaTeX on 21 Feb 2024 from source files dated 31 Aug 2023

d7099f9d-3bdf-5620-8eb3-7e6c51cab7ea